

GOVERNMENT OF INDIA
NATIONAL LIBRARY, CALCUTTA.

Class No.

B

915

Book No.

T479b

N. L. 38.

MGIPC—S1—12 LNL/58—23-5-58—50,000.

ଶ୍ରୀଶ୍ରୀନିତ୍ୟା ମଣ୍ଡଳୀ
୨୭ମେ ମାର୍ଚ୍ଚ ୨୦୨୨

ମାଂସାତ୍ୟ ପ୍ରସଙ୍ଗ

পাশ্চাত্য ভ্রমণ

রবীন্দ্রনাথ ঠাকুর



বিশ্বভারতী-গ্রন্থালয়

২১০ নং কর্ণওয়ালিস স্ট্রীট, কলিকাতা

বিশ্বভারতী গ্রন্থপ্রকাশ-বিভাগ
২১০ নং কর্ণওয়ালিস্ স্ট্রীট, কলিকাতা
প্রকাশক—শ্রীকিশোরীমোহন সাত্তর


পাশ্চাত্য ভ্রমণ

প্রকাশ পরিচয়

প্রথম সংস্করণ

...

আশ্বিন, ১৩৪৩



শান্তিনিকেতন প্রেস, শান্তিনিকেতন, (বীরভূম)।
প্রভাতকুমার মুখোপাধ্যায় কর্তৃক মুদ্রিত।

শ্রীযুক্ত চারুচন্দ্র দত্ত

বন্ধুবরেষু—

আমার বয়স ছিল সতেরো। পড়াশুনায় কঁাকি দিয়ে গুরুজনের উদ্বেগভঞ্জন হয়েছি। মেজদাদা তখন আমেদাবাদ জজিয়তি করছেন। ভদ্রঘরের ছেলের মানরক্ষার উপযুক্ত ইংরেজি যে-ক'রে-হোক জানা চাই; সেজন্তে আমার বিলেত নিরীক্ষাসন ধাৰ্য্য হয়েছে। মেজদাদার ওখানে কিছুদিন থেকে পড়ন করতে হবে তার প্রথম ভিৎ, হিতৈষীরা এই স্থির করেছেন। সিভিল সার্ভিসের রঙ্গভূমিতে আমার বিলিতি কায়দার নেপথ্যবিধান হোলো।

বালক বয়সে আত্মপ্রকাশটা থাকে চাপা। জীবনে তখন উপর-ওয়ালাদেরই আধিপত্য; চলৎশক্তির স্বাতন্ত্র্যটা দখল করে আদেশ উপদেশ অনুশাসন। স্বভাবত মেনে-চলবার মন আমার নয়, কিন্তু আমি ছিলুম ভোলা মনের মানুষ, আপন খেয়াল নিয়ে থাকতুম, আমাকে দেখতে হোত নেহাৎ ভালো মানুষের মতো। ভাবীকালে বিস্তর কথাই কইতে হয়েছে, তার অঙ্কুরোদগম ছিল নিঃশব্দে। একদিন যখন বারান্দার রেলিং ধ'রে একলা চুপ করে বসে ছিলুম, পাশ দিয়ে যেতে যেতে বড়দাদা আমার মাথা নাড়া দিয়ে বললেন, রবি হবে ফিলজফর। চুপ ক'রে থাকার ক্ষেত্রে ফিলজফি ছাড়াও অগ্র ফসল ফলে।

ক্ষেতে প্রথম দেখা দিল কাঁটা গাছ, চাষ-না-করা জমিতে। বিশ্বকে খোঁচা মেরে আপন অস্তিত্ব প্রমাণ করবার সেই ঔদ্ধত্য। হরিণ-বালকের প্রথম শিং উঠলে তার যে চাল হয় সেই উগ্রচাল প্রথমে কৈশোরের।

বালক আপন বাল্যসীমা পেরোবার সময় সামা লজ্জন করতে চায় লাফ দিয়ে। তার পরিচয় সুরু হয়েছিল মেঘনাদবধকাবোর সমালোচনা যখন লিখেছিলেম পনেরো বছর বয়সে। এই সময়েই যাত্রা করেছি বিলেতে। চিঠি যেগুলো লিখেছিলুম তাতে খাঁটি সত্য বলার চেয়ে খাঁটি স্পর্ধা প্রকাশ পেয়েছে প্রবল বেগে। বাঙালির ছেলে প্রথম বিলেতে গেলে তার ভালো লাগবার অনেক কারণ ঘটে। সেটা স্বাভাবিক, সেটা ভালোই। কিন্তু কোমর বেঁধে বাহাছুরি করবার প্ররুত্তিতে পেয়ে বসলে উণ্টো মৃষ্টি ধরতে হয়। বলতে হয়, আমি অল্প পাঁচজনের মতো নই, আমার ভালো লাগবার যোগ্য কোথাও কিছুই নেই। সেটা যে চিত্তদৈন্তের লজ্জাকর লক্ষণ এবং অর্ধাচীন মূঢ়তার শোচনীয় প্রমাণ, সেটা বোঝবার বয়স তখনো হয়নি।

সাহিত্যে সাবালক হওয়ার পর থেকেই ঐ বইটার পরে আমার ধিক্কার জন্মেছিল। বুঝেছি, যে দেশে গিয়েছিলুম সেখানকারই যে সম্মান হানি করা হয়েছে তা নয়, ওটাতে নিজেরই সম্মানহানি বিস্তর লোকের বারবার অনুরোধ সত্ত্বেও বইটা প্রকাশ করিনি। কিন্তু আমি প্রকাশে বাধা দিলেই ওটা যে অপ্রকাশিত থাকবে এই কোতূহল-মুখর যুগে তা আশা করা যায় না। সেই জন্তে এ লেখার কোন্ কোন্ অংশকে লেখক স্বয়ং গ্রাহ্য এবং ত্যাজ্য ব'লে স্বীকার করেছে সেটা জানিয়ে রেখে দিলুম। যথাসময়ে ময়লার-ঝুলি হাতে আবর্জনা কুড়োবার লোক আসবে, বাজারে সেগুলো বিক্রি হবার আশঙ্কাও যথেষ্ট আছে। অনেক অপরাধের অনেক প্রায়শ্চিত্ত বাকি থাকে ইহলোকে, প্রেতলোকে সেগুলো সম্পূর্ণ হোতে থাকে।

এ বইটাকে সাহিত্যের পংক্তিতে আমি বসাতে চাই, ইতিহাসের পংক্তিতে নয়। পাঠ্য জিনিষেরই মূল্য সাহিত্যে, অপাঠ্য জিনিষেরও

মূল্য ইতিহাসে। ঐতিহাসিককে যদি সম্পূর্ণ বঞ্চিত করতে পারতুম তবে আমার পক্ষে সেটা পুণ্যকর্মে, স্মরণ্য মুক্তির পথ হোত। নিজের কাব্য সম্বন্ধে এই ত্যাগের সাধনায় প্রবৃত্ত হোতে বারবার সঙ্কল্প করেছি। কিন্তু দুর্বল মন, সজ্ববদ্ধ আপত্তির বিরুদ্ধে ব্রত পালন করতে পারিনি। বাছাই করবার ভার দিতে হোলো পরশুপাণি মহাকাালের হাতে। কিন্তু মুদ্রায়ন্ত্রের যুগে মহাকাালেরও কর্তব্যে ক্রটি ঘটছে। বইগুলির বৈষয়িক স্বত্ব হারিয়েছি বলে আরো দুর্বল হোতে হোলো আমাকে।

য়ুরোপ-প্রবাসীর পত্রশ্রেণী আগাগোড়া অরক্ষণীয় নয়। এর স্বপক্ষে একটা কথা আছে সে হচ্ছে এর ভাষা। নিশ্চিত বলতে পারিনে কিন্তু আমার বিশ্বাস, বাংলা সাহিত্যে চলতি ভাষায় লেখা বই এই প্রথম। আজ এর বয়স হোলো প্রায় ষাট। সেক্ষেত্রেও আমি ইতিহাসের দোহাই দিয়ে কৈফিয়ৎ দাখিল করব না। আমার বিশ্বাস বাংলা চলতি-ভাষার সহজ প্রকাশপট্টতার প্রমাণ এই চিঠিগুলির মধ্যে আছে।

তারপরে লেখার জঙ্গলগুলো সাফ করবামাত্র দেখা গেল, এর মধ্যে শ্রদ্ধা বস্তুটাই ছিল গোপনে, অশ্রদ্ধাটা উঠেছিল বাহিরে আগাছার মতো নিবিড় হয়ে। আসল জিনিষটাকে তারা আচ্ছন্ন করেছিল, কিন্তু নষ্ট করেনি। এইটে আবিষ্কার ক'রে আমার মন অত্যন্ত প্রসন্ন হয়েছে। কেননা, নিন্দানৈপুণ্যের প্রার্থী ও চাতুর্য্যকে আমি সর্বাস্তঃকরণে ঘৃণা করি। ভালো লাগবার শক্তিই বিধাতার শ্রেষ্ঠ পুরস্কার মানবজীবনে। সাহিত্যে কুংসাবিলাসীদের ভোজের দাদন আমি নিইনি, আর কিছু না হোক, এই পরিচয়টুকু আমি রেখে যেতে চাই।

একটা কথা আপনাকে বলা বাহুল্য। ইংরেজের চেহারা সেদিন আমার চোখে যেমনটা ধরা পড়েছিল সেটা যে নেহাৎ আমার বাল্যবুদ্ধি ও অনভিজ্ঞতার সৃষ্টি সে কথা বললে সম্পূর্ণ সত্য কথা বলা হবে না।

এই প্রায় ষাট বছরের মধ্যে সেখানকার মানুষের যে পরিবর্তন হয়েছে তাকে ক্রমশ অভিব্যক্তির আখ্যা দেওয়া যায় না। এক-এক সময়ে ইতিহাস-সতরঞ্চের বড়ে তার এক পা চাল ছেড়ে দিয়ে লুপ্তা চালে চলতে সুরু করে। পাশ্চাত্যে তাই ঘটেছে। সেদিনকার পাসপোর্টে তার যে ছবিটা ছিল সে ছবি আজ একেবারেই চলবে না।

সেই প্রথম বয়সে যখন ইংলণ্ডে গিয়েছিলেম, ঠিক মুসাফেরের মতো বাইনি। অর্থাৎ রাস্তা দিয়ে চলতে চলতে বাহির থেকে চোখ বুলিয়ে যাওয়া বরাদ্দ ছিল না।—ছিলেম অতিথির মতো, ঘরের মধ্যে প্রবেশ পেয়েছিলুম। সেবা পেয়েছি, স্নেহ পেয়েছি, কোথাও কোথাও ঠকেছি, দুঃখ পেয়েছি। কিন্তু তারপরে আবার যখন সেখানে গিয়েছি, তখন সভায় থেকেছি, ঘরে নয়। আমার তৎপূর্বকালের অভিজ্ঞতা সর্বাক্সসম্পূর্ণ যদি বা না হয় তবু সত্য। যে-ডাক্তারের বাড়িতে ছিলুম তিনি ভদ্রশ্রেণীর এবং শ্রদ্ধেয়, কিন্তু সমুদয় ভদ্রশ্রেণীর প্রতীক তিনি না হোতে পারেন। ইংলণ্ডে আজও বর্ণসাম্য যতই থাক শ্রেণীভেদ যথেষ্ট। সেখানে এক শ্রেণীর সঙ্গে আর এক শ্রেণীর মনোবৃত্তি ও ব্যবহারের মিল না থাকাই স্বাভাবিক। সেদিনও নিঃসন্দেহ ছিল না। আমি সেদিনকার সাধারণ গৃহস্থ ঘরের এবং একটি বিলাসিনী ঘরের পরিচয় কাঁড়ে থেকেই পেয়েছি। তার কিছু কিছু বর্ণনা চিঠিগুলির মধ্যে আছে।

কয়েকটি চিঠিতে তখনকার দিনের ইঙ্গবঙ্গের বিবরণ কিছু বিস্তারিত করেই দিয়েছি। আজ এরা লুপ্ত জীব। কোথাও কোথাও তার বর্তমান অভিব্যক্তির কিছু কিছু চিহ্ন দেখতে পাওয়া যায়, এমন কি ধারা বিলেতে বান নি তাঁদেরও কারো কারো চালেচলনে ইঙ্গবঙ্গী লক্ষণ অকস্মাৎ দুটে ওঠে। সকালের ইঙ্গবঙ্গদের অনেককে আমি প্রত্যক্ষ জানতুম। তাঁদের অনেকখানি পরিচয় পেয়েছি তাঁদের নিজেরই মুখ

থেকে । যদি এর মধ্যে কোনো অভ্যুক্তি থাকে সে তাঁদেরই স্বরূত । আমার সামনে বর্ণনায় নিজেদেরও বেআক্ৰ করতে ভয় পাননি, যেহেতু মুখচোরা ভালোমানুষ বালকটিকে তাঁরা বিপদজনক ব'লে সন্দেহ করেন নি । আজ তাঁদের কাছে ক্ষমা চাইতে গেলে আরো কয়েকদিন অপেক্ষা করতে হবে । তাঁরা আছেন বৈতরণীর পরপারে ।

আমার বিলাতের চিঠিতে “এবার মলে সাহেব হব” গানটি উদ্ধৃত করেছিলাম । আমার স্নেহভাজন বন্ধু শ্রীযুক্ত চারু বন্দ্যোপাধ্যায় বঙ্গসাহিত্যে হাজারসের দৃষ্টান্তস্বরূপ ঐ গানটি আমার রচনা ব'লে প্রচার করেছেন । তাতে অনামা রচয়িতার মান ঝেঁচে গেছে, কিন্তু আমার বাঁচেনি । আমার বিশ্বাস যথোচিত গবেষণা করলে আমার লেখা থেকে ওর চেয়ে ভালো দৃষ্টান্ত পাওয়া যেতেও পারে ।

এই পত্রগুলি যখন লেখা হয়েছিল তার বারো বছর পরে আর একবার বিলেতে গিয়েছিলাম । তখনো দেশের বদল খুব বেশি হয়নি । সোঁদিন যে ডায়ারি লিখেছি তাতে আছে আঁচড়কাটা ছবি— একাগাডিতে চলতে চলতে আশেপাশে এক নজরে দেখার দৃশ্য ।

বইগুলির পুনঃ সংস্করণের মুখবন্ধে এই চিঠিখানি আপনাকে সম্বোধন ক'রে লিখছি । তার কারণ, বিলেত সম্বন্ধে আপনার অভিজ্ঞতা অনেক প্রশস্ত ও গভীর—সেই ভূমিকার উপর রেখে এই চিঠিগুলি ও ডায়ারির যথাযোগ্য স্থান নির্ণয় করতে পারবেন এবং ভুল ক্রটি ও অতিভাষণের অপরিহার্যতা অনুমান ক'রে ক্ষমা করাও আপনার পক্ষে কঠিন হবে না । ইতি ২৯ আগষ্ট, ১৯৩৬ ।

আপনাদের

রবীন্দ্রনাথ ঠাকুর

নিবেদন

“পাশ্চাত্য-ভ্রমণে” দুই সময়ের লেখা যুরোপের দুইটি ভ্রমণ বৃত্তান্ত
সহিল।

ইহার গোড়াতে আছে, চলিত ভাষায় কবির আদিতম গল্প-রচনা
“য়ুরোপ-প্রবাসীর পত্র,”—গ্রন্থাকারে যার প্রথম প্রকাশ ১২৮৮ সালে।
সে আজ প্রায় চুয়ান বৎসর পূর্বের কথা।

“য়ুরোপ-যাত্রীর ডায়ারি” প্রথম প্রকাশের সময় দুইটি খণ্ডে বিভক্ত
ছিল। ১২৯৮ সালের বৈশাখে ভূমিকাস্বরূপে ইহার প্রথম খণ্ড এবং
১৩০০ সালের ৮ই আশ্বিন যাত্রা-বিবরণ লইয়া দ্বিতীয় খণ্ড প্রকাশিত
হয়। স্বতন্ত্র গ্রন্থহিসাবে পরে আর ইহাদের প্রকাশ ঘটে নাই। শুধু
দ্বিতীয় খণ্ডটি ১৩১৪ সালে আর একবার “বিচিত্র প্রবন্ধ” গ্রন্থের অন্তর্ভুক্ত
হইয়াছিল। “বিচিত্র প্রবন্ধের” আধুনিক সংস্করণে (১৩৪২, চৈত্র)।
তাহাও বাদ দেওয়া হইয়াছে। দ্বিতীয় খণ্ডটিই এই গ্রন্থে রক্ষিত হইল।
ইতি আশ্বিন, ১৩৪৩।

প্রকাশক

যুরোপ-প্রবাসীর পত্র

উপহার

ভাই জ্যোতিদাদা,

ইংলণ্ডে যাঁহাকে সৰ্ব্বাপেক্ষা অধিক মনে পড়িত,
ভাঁহারই হস্তে এই পুস্তকটি সমৰ্পণ করিলাম ।

স্নেহভাজন

রবি ।

পাশ্চাত্য ভ্রমণ

য়ুরোপ-প্রবাসীর পত্র

প্রথম পত্র

বিশে সেপ্টেম্বরে আমরা “পূনা” ষ্টীমারে উঠলেম। পাঁচটার সময় জাহাজ ছেড়ে দিলে। আমরা তখন জাহাজের ছাতে দাঁড়িয়ে। আস্তে আস্তে আমাদের চোখের সামনে ভারতবর্ষের শেষ তটরেখা মিলিয়ে গেল। চারিদিকের লোকের কোলাহল সহিতে না পেরে আমি আমার নিজের ঘরে গিয়ে শুয়ে পড়লেম। গোপন করবার বিশেষ প্রয়োজন দেখছিনে, আমার মনটা কেমন নিঃস্বীৰ, অবসন্ন, স্তিমিমাণ হয়ে পড়েছিল, কিন্তু দূর হোকগে—ওসব করুণ রসায়ক কথা লেখবার অবসরও নেই ইচ্ছেও নেই ; আর লিখলেও, হয় তোমার চোখের জল থাকবে না, নয় তোমার ধৈর্য্য থাকবে না।

সমুদ্রের পায়ে দণ্ডবৎ ! ২০শে থেকে ২৬শে পর্য্যন্ত যে ক’রে কাটিয়েছি তা আমিই জানি ! “সমুদ্র পীড়া” কা’কে বলে অবিশ্রি জানো, কিন্তু কী রকম তা জানো না। আমি সেই ব্যামোয় পড়েছিলেম,

সে কথা বিস্তারিত ক'রে লিখলে পাষাণেরও চোখে জল আসবে! ৬টা দিন, মশায়, শয্যা থেকে উঠিনি। যে ঘরে থাকতেন, সেটা অতি অন্ধকার, ছোটো; পাছে সমুদ্রের জল ভিতরে আসে তাই চারদিকের জানলা সম্পূর্ণরূপে বন্ধ। অস্বাভাবিকরূপে ও অবাস্থ্যপূর্ণ দেহ হয়ে ছয়টা দিন কেবল বেঁচে ছিলেম মাত্র। প্রথম দিন সন্ধ্যাবেলায় আমাদের একজন সহযাত্রী আমাকে জোর ক'রে বিছানা থেকে উঠিয়ে খাবার টেবিলে নিয়ে গেলেন। যখন উঠে দাঁড়ালেম তখন আমার মাথা ভিতর যা-কিছু আছে সবাই মিলে যেন মারামাৰি কাটাকাটি আরম্ভ ক'রে দিলে, চোখে দেখতে পাইনে, পা চলে না, সর্কাজ টলমল করে! দু পা গিয়েই একটা বেঞ্চিতে গিয়ে ব'সে পড়লেম। আমার সহযাত্রীটি আমাকে ধরাধরি ক'রে জাহাজের ডেক-এ নিয়ে গেলেন। একটা রেলের উপর ভর দিয়ে দাঁড়ালেম। তখন অন্ধকার রাত। আকাশ মেঘে আচ্ছন্ন। আমাদের প্রতিকূলে বাতাস বইছে। সেই অন্ধকারের মধ্যে—সেই নিরাশ্রয় অকূল সমুদ্রে দুই দিকে অগ্নি উৎক্ষিপ্ত করতে কবতে আমাদের জাহাজ একলা চলেছে, যেখানে চাই সেইদিকেই অন্ধকার, সমুদ্র ফুলে' ফুলে' উঠছে—সে এক মহা গম্ভীর দৃশ্য!

সেখানে বেশিক্ষণ থাকতে পারলেম না। মাথা ঘুরতে লাগল। ধরাধরি ক'রে আবার আমার ক্যাবিনে এলেম। সেই-যে বিছানায় পড়লেম, ছ দিন আর এক যুহুর্ন্তের জঞ্জল মাথা তুলিনি। আমাদের যে ষ্টুয়ার্ড ছিল, (যাত্রীদের সেবক)—কারণ জানিনে—আমার উপর তার বিশেষ রূপাদৃষ্টি ছিল। দিনের মধ্যে যখন-তখন সে আমার জন্তে খাবার নিয়ে উপস্থিত করত; না খেলে কোনো মতেই ছাড়ত না। সে বলত, না খেলে আমি ইঁদুরের মতো দুর্বল হয়ে পড়ব (weak as a rat)। সে বলত সে আমার জন্তে সব কাজ করতে পারে। আমি তাকে যথেষ্ট

সাধুবাদ দিতেম, এবং জাহাজ ছেড়ে আসবার সময় সাধুবাদের চেয়ে আরো কিঞ্চিৎ সারবান পদার্থ দিয়েছিলেম।

৩ দিনের পর আমরা যখন এডেনের কাছাকাছি পৌছলেম, তখন সমুদ্র কিছু শান্ত হোলো। সেদিন আমার ষ্টুয়র্ড এসে ন'ড়ে চ'ড়ে বেড়াবার জন্তে আমাকে বারবার অনুরোধ করতে লাগল। আমি তার পরামর্শ শুনে বিজ্ঞানা থেকে তো উঠলেম, উঠে দেখি যে সতিাই ইঁদুরের মতো দুর্কল হয়ে পড়েছি। মাথাটা যেন ধার-করা, কাঁধের সঙ্গে তা'র ভালো রকম বনে না; চুরি-করা কাপড়ের মতো শরীরটা যেন আমার ঠিক গায়ে লাগছে না। ঘর থেকে বেরিয়ে ছাত্তের উপর গিয়ে একটা কেদারায় হেলান দিয়ে পড়লেম। অনেক দিনের পর বাতাস পেয়ে বাঁচলেম। দুপুর বেলা দেখি একটা ছোটো নৌকো সেই সমুদ্র দিয়ে চলেছে। চারদিকে অনেক দূর পর্যাস্ত আর ডাঙা নেই, জাহাজস্বক্ক লোক অবাক। তারা আমাদের ষ্টীয়ারকে ডাকতে আরম্ভ করলে; জাহাজ থামল। তারা একটা ছোটো নৌকায় ক'রে কতকগুলি লোক জাহাজে পাঠিয়ে দিলে। এরা সকলে আরব দেশীয়, এডেন থেকে মস্কটে যাচ্ছে। পথের মধ্যে দিকভ্রম হয়ে গেছে, তাদের সঙ্গে বা জলের পিপে ছিল, তা ভেঙে গিয়ে জল সমস্ত নষ্ট হয়ে গেছে; অথচ যাত্রী অনেক। আমাদের জাহাজের লোকেরা তাদের জল দিলে। একটা মাপ খুলে কোন দিকে ও কতদূরে মস্কট, তাদের দেখিয়ে দিলে; তারা আবার চলতে লাগল। সে নৌকো যে মস্কট পর্যাস্ত পৌছবে, তাতে সকলেই সন্দেহ প্রকাশ করতে লাগল।

২৮শে সেপ্টেম্বর শনিবার সকালে ঘুম থেকে উঠেই দেখি, আমাদের সম্মুখে সব পাহাড় পর্বত উঠেছে। অতি সুন্দর পরিষ্কার প্রভাত; সূর্য্য সবোমাত্র উঠেছে, সমুদ্র অতিশয় শান্ত। দূর থেকে সেই পর্বতময়

ভূভাগের প্রভাতদৃশ্য এমন সুন্দর দেখাচ্ছে যে কী বলব। পর্বতের উপর রঙিন মেঘগুলি এমন নত হয়ে পড়েছে, যে মনে হয় যেন, অপরিমিত সূর্য্যকিরণ পান ক'রে তাদের আর দাঁড়াবার শক্তি নেই, পর্বতের উপরে যেন অবসন্ন হয়ে পড়েছে। আয়নার মতো পরিষ্কার শাস্ত সমুদ্রের উপর ছোটো ছোটো পাল-তোলা নৌকাগুলি আবার কেমন ছবির মতো দেখাচ্ছে।

এডেনে পৌঁছে বাড়িতে চিঠি লিখতে আরম্ভ করলেম কিন্তু লিখতে গিয়ে দেখি যে এই ক-দিন নাড়াচাড়া খেয়ে মাথার ভিতরে যেন সব উল্টোটা পাল্টা হয়ে গেছে, বুদ্ধির রাজ্যে একটা অরাজকতা ঘটেছে; কী ক'রে লিখব, ভালো মনে আসছে না। ভাবগুলো যেন মাকড়সার জালের মতো, ছুঁতে গেলেই অমনি ছিঁড়ে খুঁড়ে যাচ্ছে। কিসের পর কী লিখব, তার একটা ভালো রকম বন্দোবস্ত করতে পারছি নে। এই অবস্থায় লিখতে আরম্ভ করলেম, এমন বিপদে প'ড়ে তোমাকে যে লিখতে পারিনি তাতে তোমার ক্ষোভের কারণ কিছুই নেই।

দেখো, সমুদ্রের উপর আমার কতকটা অশ্রদ্ধা হয়েছে। কল্পনায় সমুদ্রকে যা মনে করতাম, সমুদ্রে এসে দেখি তার সঙ্গে অনেক বিষয় মেলে না। তীর থেকে সমুদ্রকে খুব মহান ব'লে মনে হয়, কিন্তু সমুদ্রের মধ্যে এলে আর ততটা হয় না। তার কারণ আছে; আমি যখন বনের উপকূলে দাঁড়িয়ে সমুদ্র দেখতাম তখন দেখতাম, দূর দিগন্তে গিয়ে নীল জল নীল আকাশে মিশিয়ে গিয়েছে, কল্পনায় মনে করতাম যে, একবার যদি ঐ দিগন্তের আবরণ ভেদ করতে পারি—ঐ দিগন্তের যবনিকা ওঠাতে পারি, অমনি আমার সম্মুখে এক অকূল অনন্ত সমুদ্র একেবারে উথলে উঠবে। ঐ দিগন্তের পর যে কী আছে তা আমার কল্পনাতেই থাকত; তখন মনে হোত না, ঐ দিগন্তের পরে আর এক

দিগন্ত আসবে। কিন্তু যখন সমুদ্রের মধ্যে এসে পড়ি, তখন মনে হয় যে, জাহাজ যেন চলছে না, কেবল একটি দিগন্তের গণ্ডীর মধ্যে বাঁধা আছে। আমাদের কল্পনার পক্ষে সে দিগন্তের সীমা এত সঙ্কীর্ণ যে কেমন তৃপ্তি হয় না। কিন্তু দেখো, একথা বড়ো গোপনে রাখা উচিত; বাস্তবিক থেকে বায়রণ পর্য্যন্ত সকলেরই যদি এই সমুদ্র দেখে ভাব লেগে থাকে, তবে আমার না লাগলে দশজনে হেসে উঠবে; গ্যালিলিওর সময়ে একথা বললে হয়তো আমাকে কয়েদ যেতে হোত। এত কবি সমুদ্রের স্বত্ববাদ করেছেন যে আজ আমার এই নিন্দায় তাঁর বোধ হয় বড়ো একটা গায়ে লাগবে না। যখন তরঙ্গ ওঠে, তখন বোধ করি সমুদ্র বেশ দেখায়, কিন্তু আমার ছুঁতগাক্রমে সমুদ্রের তরঙ্গ উঠলেই আমার এমন মাথা ঘুরতে থাকে যে আমার দেখাশুনো সব ঘুরে যায়।

আমি যখন ঘর থেকে বেরোতে আরম্ভ করলেম, তখন জাহাজের যাত্রীদের উপর আমার নজর পড়ল ও আমার উপর জাহাজের যাত্রীদের নজর পড়ল। আমি স্বভাবতই “লেডি”-জাতিকে বড়ো ডরাই। তাঁদের কাছে ঘেঁসতে গেলে এত প্রকার বিপদের সম্ভাবনা যে, চাণক্য পণ্ডিত থাকলে “লেডি”-দের কাছ থেকে দশ সহস্র হস্ত দূরে থাকতে পরামর্শ দিতেন। এক তো, মনোরাজ্যে নানা প্রকার শোচনীয় দুর্ঘটনা ঘটবার সম্ভাবনা—তাঁজাড়া সর্ব্বদাই ভয় হয় পাছে কী কথা বলতে কী কথা বলে ফেলি, আর আমাদের অসহিষ্ণু লেডি তাঁদের আদব-কায়দার তিলমাত্র ব্যতিক্রম সহিতে না পেরে দারুণ ঘৃণায় ও লজ্জায় একেবারে অভিভূত হন। পাছে তাঁদের গাউনের অরণ্যের মধ্যে ভেবাচেকা খেয়ে যাই, পাছে আহারের সময় তাঁদের মাংস কেটে দিতে হয়, পাছে মুরগীর মাংস কাটতে গিয়ে নিজের আঙুল কেটে বসি,—এই রকম

সাত পাঁচ ভেবে আমি জাহাজের লেডিদের কাছ থেকে অতি দূরে থাকতেম। আমাদের জাহাজে লেডির অভাব ছিল না, কিন্তু জেন্টেলম্যানেরা সর্বদা খুঁৎ খুঁৎ করতেন যে, তাদের মধ্যে অল্পবয়স্ক বা স্ত্রী একজনও ছিল না।

পুরুষ যাত্রীদের মধ্যে অনেকের সঙ্গে আলাপ পরিচয় হোলো। ব—মহাশয়ের সঙ্গে আমাদের যথেষ্ট ঘনিষ্ঠতা হয়েছিল। তাঁর কথা অনর্গল, হাসি অজস্র, আহার অপরিমিত। সকলের সঙ্গেই তাঁর আলাপ, সকলের সঙ্গেই তিনি হাসি-তামাসা ক’রে বেড়ান। তাঁর একটা গুণ আছে, তিনি কখনো বিবেচনা ক’রে, মেজে ঘ’ষে কথা কন না; ঠাট্টা করেন, সকল সময়ে তার মানে না থাকুক, তিনি নিজে হেসে আকুল হন। তিনি তাঁর বয়সের ও পদমানের গাঙ্গার্য্য বুকে হিসাব ক’রে কথা কন না, মেপে জুকে হাসেন না ও ছুদিক বজায় রেখে মত প্রকাশ করেন না, এই সকল কারণে তাঁকে আমার ভালো লাগত। কত প্রকার যে ছেলেমানুষী করেন তার ঠিক নেই। বুদ্ধির বৃদ্ধি ও বালকত্বের সাদাসিদা নিশ্চিন্ত ভাব একত্রে দেখলে আমার বড়ো ভালো লাগে। আমাকে তিনি “অবতার” বলতেন, Gregory সাহেবকে “গড়্‌গড়ি” বলতেন, জাহাজের আর এক যাত্রীকে “কুহিমংস্” ব’লে ডাকতেন; সে বেচারীর অপরাধ কী তা জানো? সাধারণ মানুষদের চেয়ে তার ঘাড়ের দিকটা কিছু খাটো ছিল, তার মাথা ও শরীরের মধ্যে একটা যোজক পদার্থ ছিল না বললেও হয়। এই জন্তে ব—মহাশয় তাকে মংস্ শ্রেণীভুক্ত করেছিলেন। কিন্তু আমি যে কেন অবতার শ্রেণীর মধ্যে প’ড়ে গিয়েছিলেম, তার কারণ সহজে নির্দেশ করা যায় না।

আমাদের জাহাজের T—মহাশয় কিছু নূতন রকমের লোক। তিনি ঘোরতর ফিলজফর মানুষ। তাঁকে কখনো চলিত ভাষায় কথা কইতে

শুনিনি। তিনি কথা কইতেন না, বক্তৃতা দিতেন। এক দিন আমরা দুই চারজনে মিলে জাহাজের ছাতে দুদণ্ড আমোদ প্রমোদ করছিলাম, এমন সময়ে দুর্ভাগ্যক্রমে ব—মহাশয় তাঁকে বললেন “কেমন সুন্দর তারা উঠেছে,” এই আমাদের ফিলজফর তারার সঙ্গে মনুষ্য জীবনের সঙ্গে একটা গভীর সম্বন্ধ বাধিয়ে দিয়ে বক্তৃতা শুরু করলেন—আমরা “মুখেতে চাহিয়া থাকে ফ্যাল্ ফ্যাল্ করিয়া” রইলাম।

আমাদের জাহাজে একটি আন্ত জনবল ছিলেন। তাঁর তাল-বৃক্ষের মতো শরীর, ঝাঁটার মতো গৌফ, সজারুর কাঁটার মতো চুল, হাঁড়ির মতো মুখ, মাছের চোখের মতো ম্যাডমেডে চোখ, তাঁকে দেখলেই আমার গা কেমন কবৃত, আমি পাঁচ হাত তফাতে স’রে যেতাম। এক-এক জন কোনো অপরাধ না করলেও তার মুখশ্রী যেন সর্কদা অপরাধ করতে থাকে। প্রত্যহ সকালে উঠেই শুনতে পেতাম তিনি ইংরেজি, ফ্রেঞ্চ, হিন্দুস্থানী প্রভৃতি বহু ভাষা জানেন সমস্ত ভাষায় জাহাজের সমস্ত চাকর-বাকরদের অজস্র গাল দিতে আরম্ভ করেছেন, ও দশদিকে দাপাদাপি ক’রে বেড়াচ্ছেন। তাঁকে কখনো হাসতে দেখিনি; কারো সঙ্গে কথা নেই বার্তা নেই, আপনার ক্যাবিনে গৌ হয়ে ব’সে আছেন। কোনো কোনো দিন “ডেক্-এ” বেড়াতে আসতেন, বেড়াতে বেড়াতে যার দিকে একবার কৃপা-কটাক্ষে নেত্রপাত করতেন, তাকে যেন পিপড়াটির মতো মনে করতেন।

প্রত্যহ খাবার সময়ে ঠিক আমার পাশেই B—বসতেন। তিনি একটি ইয়ুরাসীয়। কিন্তু তিনি ইংরেজের মতো শিষ দিতে, পকেটে হাত দিয়ে পা ফাঁক ক’রে দাঁড়াতে সম্পূর্ণরূপে শিখেছেন। তিনি আমাকে অমুগ্রহের চোখে দেখতেন। এক দিন এসে মহাগম্ভীর স্বরে বললেন—“Young man, তুমি Oxford-এ যাচ্ছ ? Oxford

University বড়ো ভালো বিদ্যালয়।” আমি এক দিন ট্রেন সাহেবের “Proverbs and their lessons” বই পানি পড়ছিলেম, তিনি এসে বইটি নিয়ে শিব দিতে দিতে হুচার পাত উলটিয়ে পালটিয়ে বললেন “হী, ভালো বই বটে।”

এডেন থেকে স্নয়েজে যেতে দিন পাঁচেক লেগেছিল। যারা ব্রিটিশ-পথ দিয়ে ইংলণ্ডে যায় তাদের জাহাজ থেকে নেবে স্নয়েজে রেলওয়ের গাড়িতে উঠে আলেকজান্দ্রিয়াতে যেতে হয়; আলেকজান্দ্রিয়ার বন্দরে তাদের জন্তে একটা ষ্টীমার অপেক্ষা করে—সেই ষ্টীমারে চড়ে ভূমধ্যসাগর পার হয়ে ইটালিতে পৌঁছতে হয়। আমরা Overland ডাঙা-পেরোনো যাত্রী, স্তরাং আমাদের স্নয়েজে নাবতে হোলো। আমরা তিন জন বাঙালি ও একজন ইংরেজ একখানি আরব নৌকো ভাড়া করলেম। মাস্তুরের “divine” মুখশ্রী কতদূর পশ্চিমের দিকে নাবতে পারে, তা সেই নৌকার মান্দিটার মুখ দেখলে জানতে পারতে। তাব চোখ দুটো যেন বাঘের মতো, কালো কুচকুচে রং, কপাল নিচু, ঠোঁট পুরু, সবসুদ্ধ মুখের ভাব অতি ভয়ানক। অস্তান্ত নৌকার সঙ্গে দরে বনলো না, সে একটু কম দামে নিয়ে যেতে রাজি হোলো। ব—মহাশয় তো সে নৌকোয় বড়ো সহজে যেতে রাজি নন; তিনি বললেন আরবদের বিশ্বাস করতে নেই—ওরা অনায়াসে গলায় ছুরি দিতে পারে। তিনি স্নয়েজের দুই একটা ভয়ানক ভয়ানক অরাজকতার গল্প করলেন। কিন্তু বা হোক, আমরা সেই নৌকোয় তো উঠলেম। মাঝিরা ভাঙা ভাঙা ইংরেজি কয়, ও অল্প-বল্প ইংরেজি বুঝতে পারে। আমরা তো কতক দূর নির্বিবাদে গেলেম। আমাদের ইংরেজ-যাত্রীটির স্নয়েজের পোষ্ট-আফিসে নাবনার দরকার ছিল। পোষ্ট-আফিস অনেক দূর, এবং যেতে অনেক বিলম্ব হবে, তাই মাঝি একটু আপত্তি করলে; কিন্তু শীঘ্রই সে আপত্তি ভঙ্গন হোলো। তার পরে আবার কিছু

দূরে গিয়ে সে জিজ্ঞাসা করলে “পোষ্ট-আফিসে যেতে হবে কি ? সে দুই এক ঘণ্টার মধ্যে যাওয়া অসম্ভব।”—আমাদের রুক্ষ স্বভাব সাহেবটি মহা ক্ষাপা হয়ে চৌচিয়ে উঠলেন, “Your grand mother”। এই তো আমাদের মাঝি রুখে উঠলেন, “What ? mother ? mother ? what mother, don’t say mother”। আমরা মনে করলুম সাহেবটাকে ধরে বুঝি জলে ফেলে দিলে, আবার জিজ্ঞাসা করলে “What did say ? (অর্থাৎ কী বললি ?)” সাহেব তাঁর রোখ ছাড়লেন না। আবার বললেন “Your grand mother”। এই তো আর রক্ষা নেই, মাঝিটা মহা তেড়ে উঠল। সাহেব গতিক ভালো নয় দেখে নরম হয়ে বললেন “You don’t seem to understand what I say !” অর্থাৎ তিনি তখন grandmother বলাটা যে গালি নয় তাই প্রমাণ করতে ব্যস্ত। তখন সে মাঝিটা ইংরেজি ভাষা ছেড়ে ধমক দিয়ে চৌচিয়ে উঠল “বস্—চুপ !” সাহেব খতমত পেয়ে চুপ করে গেলেন, আর তাঁর বাক্য ক্ষুণ্ণ হোলো না। আবার খানিক দূর গিয়ে সাহেব জিজ্ঞাসা করলেন “কতদূর বাকি আছে ?” মাঝি অগ্নি-শব্দা হয়ে চৌচিয়ে উঠল “Two shillings give, ask what distance” ! আমরা এই রকম বুঝে গেলেম যে, দুশিলিং ভাড়া দিলে স্নয়েজ রাজ্যে এই রকম প্রশ্ন জিজ্ঞাসা আইনে নেই ! মাঝিটা যখন আমাদের এই রকম ধমক দিচ্ছে, তখন অল্প অল্প দাঁড়িদের ভারি আমোদ বোধ হচ্ছে, তারা তো পরস্পর মুখ চাওয়া-চাওয়ি ক’রে মুচকি মুচকি হাসি আরম্ভ করলে। মাঝি মহাশয়ের বিষম বদমেজাজ দেখে তাদের হাসি সামলানো দায় হয়ে উঠেছিল। এক দিকে মাঝি ধমকাচ্ছে, এক দিকে দাঁড়িগুলো হাসি জুড়ে দিয়েছে, মাঝিটার উপর প্রতিহিংসা তোলবার আর কোনো উপায় না দেখে আমরাও তিনজনে মিলে হাসি

জুড়ে দিলেম—এরকম সুবুদ্ধি অনেক স্থলে দায়ে পড়ে খাটাতে হয়। মানে মানে স্নয়েঞ্জ সহরে গিয়ে তো পৌঁছলেম। স্নয়েঞ্জ সহর সম্বন্ধে আমার কিছু বলবার অধিকার নাই, কারণ আমি স্নয়েঞ্জের আধ মাইল জায়গার বেশি আর দেখিনি। সহরের চারদিকে একবার প্রদক্ষিণ করবার বাসনা ছিল, কিন্তু আমার সহযাত্রীদের মধো ধারা পূর্বে স্নয়েঞ্জ দেখেছিলেন, তাঁরা বললেন, “এ পরিশ্রমে শ্রান্তি ও বিরক্তি ছাড়া অত্ৰ কোনো ফললাভের সম্ভাবনা নেই।” তাতেও আমি নিরুৎসাহ হইনি কিন্তু শুনলেম গাধার চ’ড়ে বেড়ানো ছাড়া সহরে বেড়াবার আর কোনো উপায় নেই। শুনে সহরে বেড়াবার দিকে টান আমার অনেকটা কমে গেল, তারপরে শোনা গেল, এদেশের গাধাদের সঙ্গে চালকদের সকল সময়ে মতের ঐক্য হয় না, তারা একটি স্বতন্ত্র স্বাধীন ইচ্ছে আছে; এই জন্তে সময়ে সময়ে দুই ইচ্ছের বিরোধ উপস্থিত হয়, কিন্তু প্রায় দেখা যায়, গাধার ইচ্ছে পরিণামে জয়ী হয়। স্নয়েঞ্জে একপ্রকার জঘন্ত চোখের ব্যামোর অভ্যস্ত প্রাত্তর্ভাব—রাস্তায় অমন শত শত লোকের চোখ ঐরকম রোগগ্রস্ত দেখতে পাবে। প্রধানকার মাছিরা ঐ রোগ চারদিকে বিতরণ করে বেড়ায়। রোগগ্রস্ত চোখ থেকে ঐ রোগের বীজ আহরণ ক’রে তারা অরুণ চোখে গিয়ে বসে, চারদিকে রোগ ছড়িয়ে পড়ে। স্নয়েঞ্জে আমরা রেল গাড়িতে উঠলেম। এ রেলগাড়ির অনেক প্রকার রোগ আছে, প্রথমতঃ শোবার কোনো বন্দোবস্ত নেই, কেননা, বসবার জায়গাগুলি অংশে অংশে বিভক্ত, দ্বিতীয়তঃ এমন গজগামিনী রেলগাড়ি সর্বত্র দেখতে পাওয়া যায় না। সমস্ত রাত্রিই গাড়ি চলেছে, দিনের বেলা যখন জেগে উঠলেম তখন দেখলেম ধুলোর আমাদের কেবল গোর হয়নি, আর সব হয়েছে। চুলে হাত দিতে গিয়ে দেখি, চুলে এমন এক স্তর মাটি জমেছে যে, মাথায় অনায়াসে ধান চাষ করা যায়। এই রকম ধূলোমাখা

সন্ন্যাসীর বেশে আমরা আলেকজান্দ্রিয়াতে গিয়ে পৌঁছলেম। রেলের লাই-
নের দুধারে সবুজ শস্তক্ষেত্র। জায়গায় জায়গায় খেজুরের বগাছে খোলো
খোলো খেজুর ফলে রয়েছে। মাঠের মাঝে মাঝে কুণ্ড। মাঝে মাঝে
দুই একটা কোঠা বাড়ি—বাড়িগুলো চোকোণা, খাম নেই, বারান্দা নেই
—সমস্তটাই দেয়ালের মতো, সেই দেয়ালের মধ্যে মধ্যে দুই একটা
জানালা। এইসকল কারণে বাড়িগুলোর যেন শ্রী নেই। যাহোক আমি
আগে আফ্রিকার মাথা থেকে পা পর্যন্ত যে রকম অমুর্কীর মরুভূমি
মনে করে রেখেছিলুম, চারদিক দেখে তা কিছুই মনে হোলো না। বরং
চারিদিককার সেই হরিৎ ক্ষেত্রের উপর খেজুরকুঞ্জের মধ্যে প্রভাতটি
আমার অতি চমৎকার লেগেছিল।

আলেকজান্দ্রিয়া বন্দরে আমাদের জাহাজ “মঙ্গোলিয়া” ষ্টীমার অপেক্ষা
করছিল। এইবার আমরা ভূমধ্যসাগরের বক্ষে আরোহণ করলেম।
আমার একটু শীত-শীত করতে লাগল। জাহাজে গিয়ে খুব ভাল
করে স্নান করলেম, আমার তো হাড়ে হাড়ে ধুলো প্রবেশ করেছিল।
স্নান করার পর আলেকজান্দ্রিয়া সহর দেখতে গেলেম। জাহাজ
থেকে ডাঙা পর্যন্ত যাবার জন্তে একটা নৌকো ভাড়া হোলো।
এখানকার এক-একটা মাঝি সার উইলিয়ম জোসের দ্বিতীয় সংস্করণ
বলেই হয়। তারা গ্রীক, ইটালিয়ন, ফ্রেঞ্চ, ইংরেজি প্রভৃতি অনেক
ভাষায় চলনসই রকম কথা কইতে পারে। শুনেলেম ফ্রেঞ্চ ভাষাই
এখানকার সাধারণ ভাষা, রাস্তাঘাটের নাম, সাইনবোর্ডে দোকানগুলির
আঙ্গুপরিচয়, অধিকাংশই ফরাসী ভাষায় লেখা। আলেকজান্দ্রিয়া সহরটি
সমৃদ্ধিশালী মনে হোলো! এখানে যে কত জাতের লোক ও কত জাতের
দোকান বাজার আছে তার ঠিকানা নেই। রাস্তাগুলি পাথর দিয়ে
বাঁধানো, তাতে বেশ পরিষ্কার থাকে, কিন্তু গাড়ির শব্দ বড়ো বেশিরকম

হয়। খুব বড়ো বড়ো বাড়ি—বড়ো বড়ো দোকান, সহরটি খুব জমকালো বটে। আলেকজান্দ্রিয়ার বন্দর খুব প্রকাণ্ড। বিস্তর জাহাজ এখানে আশ্রয় পায়। যুরোপীয়, মুসলমান সকলপ্রকার জাতিরই জাহাজ এ বন্দরে আছে, কেবল হিন্দুদের জাহাজ নেই।

চার পাঁচ দিনে আমরা ইটালীতে গিয়ে পৌঁছলেম। তখন রাত্রি একটা ছোটো হবে। গবম বিজানা ত্যাগ ক'রে, জিনিষপত্র নিয়ে আমরা জাহাজের ছাতে গিয়ে উঠলেম। জ্যেৎস্নারাত্রি, খুব শীত; আমার গায়ে বড়ো একটা গরম কাপড় ছিল না, তাই ভারি শীত করছিল। আমাদের সম্মুখে নিস্তরু সহর, বাড়িগুলির জানালা দবজা সমস্ত বন্ধ—সমস্ত নিদ্রামগ্ন। আমাদের যাত্রীদের মধ্যে ভারি গোল পড়ে গেল, কখনো শুনি, ট্রেন পাওয়া যাবে, কখনো শুনি পাওয়া যাবে না। জিনিষপত্রগুলো নিয়ে কী করা যাবে ভেবে পাওয়া যায় না, জাহাজে থাকব কি বেরোব কিছুই স্থির নেই। একজন Italian Officer এসে আমাদের গুণতে আরম্ভ করলে—কিন্তু কেন গুণতে আরম্ভ করলে তা ভেবে পাওয়া গেল না। জাহাজের মধ্যে এই রকম একটা অক্ষুট জনশ্রুতি প্রচাৰিত হোলো যে, এই গণনার সঙ্গে আর আমাদের ট্রেনে চড়ার একটা বিশেষ যোগ আছে। কিন্তু সে রাত্রে মূলেই ট্রেন পাওয়া গেল না। শোনা গেল, তার পরদিন বেলা তিনটেব আগে ট্রেন পাওয়া যাবে না। যাত্রীবা মহা বিরক্ত হয়ে উঠল। অবশেষে সে রাত্রে ত্রিন্দিসিব হোটেলে আশ্রয় নিতে হোলো।

এই তো প্রথম যুরোপের মাটিতে আমার পা পড়ল। কোনো নূতন দেশে আসবার আগে আমি তাকে এমন নূতনতর মনে ক'রে রাখি যে, এসে আর তা নূতন বলে মনেই হয় না। যুরোপ আমাপ তেমন নূতন মনে হয়নি শুনে সকলেই অবাক!

আমরা রাত্রি তিনটের সময় ত্রিন্দিসির হোটেলে গিয়ে শুয়ে পড়লেম। সকালে একটা আধ-মরা ঘোড়া ও আধ-ভাঙা গাড়ি চ'ড়ে সহর দেখতে বের হলেম। সারথির সঙ্গে গাড়িঘোড়ার এমন অসামঞ্জস্য, যে ক'ী বল্ব ! সারথির বয়স চোন্দো হবে—কিন্তু ঘোড়াটির বয়স পঞ্চাশ হবে—আর গাড়িটি পৌরাণিক যুগের মনে হোলো। ছোটোখাটো সহর যেমন হয়ে থাকে ত্রিন্দিসিও তাই। কতকগুলি কোঠাবাড়ি, দোকানবাজার, রাস্তাঘাট আছে। ভিক্ষকেরা ভিক্ষা ক'রে ফিবুছে, দুচারজন লোক মদের দোকানে বসে গল্পগুজব করুছে—দুচারজন রাস্তার কোণে দাঁড়িয়ে হাসিতামাসা করছে ; লোকজনেরা অতি নিশিচন্তু মুখে গজেন্দ্রগমনে গমন করুছে ; যেন কারো কোনো কাশ নেই, কারো কোনো ভাবনা নেই—যেন সহরসুদ্ধ ছুটি। রাস্তায় গাড়ি ঘোড়ার সমারোহ নেই, লোকজনের সমাগম নেই। আমরা খানিকদূর যেতেই একজন ছোকরা আমাদের গাড়ি ধামিয়ে হাতে একটা তরমুজ নিয়ে গাড়োয়ানের পাশে গিয়ে বসল। ব—মহাশয় বল্লেন, “বিনা আয়গ্নে এঁর কিছু রোজগার করবার বাসনা আছে” ; লোকটা এসে হাত বাড়িয়ে বাড়িয়ে মাঝে মাঝে আমাদের দেখিয়ে দিতে লাগল, “ট্রিটে চর্চ, ট্রিটে বাগান, ট্রিটে মাঠ” ইত্যাদি। তার টাকাতে আমাদের কিছুমাত্র জ্ঞানবুদ্ধি হয়নি, আর, তার টাকা না হোলোও আমাদের কিছুমাত্র জ্ঞানের ব্যাঘাত হোত না। তাকে কেউ আমাদের গাড়িতে উঠতে বলেনি, কেউ তাঁকে কোনো বিষয় জিজ্ঞাসাও কবেনি, কিন্তু তবু এই অযাচিত অনুগ্রহের জন্তে তার যাক্সা পূর্ণ করুতে হোলো। তারা আমাদের একটা ফলের বাগানে নিয়ে গেল। সেখানে যে কতপ্রকার ফলের গাছ, তার সংখ্যা নেই। চারিদিকে ষোলো ষোলো আঙুর ফ'লে রয়েছে। ছরকম আঙুর আছে—কালো আর সাদা। তার মধ্যে কালোগুলিই আমার বেশি মিষ্টি লাগল। বড়ো

বড়ো গাছে আপেল, পিচ প্রভৃতি অনেকপ্রকার ফল ধরে আছে। একজন বুড়ি (বোধ হয় উন্ডান-পালিকা) কতকগুলি ফলফুল নিয়ে উপস্থিত করলে। আমরা সেদিকে নজর করলেম না; কিন্তু ফল বিক্রয় করবার উপায় সে বিলক্ষণ জানে। আমরা ইতস্ততঃ বেড়াচ্ছি, এমন সময়ে দেখি একটি সুন্দরী মেয়ে কতকগুলি ফল আর ফুলের তোড়া নিয়ে আমাদের সম্মুখে হাজির হোলো, তখন আর অগ্রাহ্য করবার সাধ্য রইল না।

ইটালির মেয়েদের বড়ো সুন্দর দেখতে। অনেকটা আমাদের দেশের মেয়ের ভাব আছে। সুন্দর রং, কালো কালো চুল, কালো ভুরু, কালো চোখ, আর মুখের গড়ন চমৎকার।

তিনটের টেণে ত্রিন্দিশি ছাড়লেম। রেলোয়ে পথের দুধারে আঙুরের ক্ষেত, চমৎকার দেখতে। পর্বত, নদী, হ্রদ, কুটার, শশু ক্ষেত্র, ছোটো-ছোটো গ্রাম প্রভৃতি যত কিছু কবির স্বপ্নের ধন, সমস্ত চারদিকে শোভা পাচ্ছে। গাছপালার মধ্যে থেকে যখন কোনো একটি দূরস্থ নগর, তার প্রাসাদচূড়া, তার চর্চের শিখর, তার ছবির মতো বাড়িগুলি আস্তে আস্তে চোখে পড়ে তখন বড়ো ভালো লাগে। সন্ধ্যা বেলায় একটি পাহাড়ের নিচে অতি সুন্দর একটি হ্রদ দেখেছিলেম, তা আমি ভুলতে পারব না, তার চারিদিকে গাছপালা, জলে সন্ধ্যার ছায়া সে অতি সুন্দর, তা আমি বর্ণনা করতে চাইনে।

রেলোয়ে ক'রে যেতে যেতে আমরা Mont Cenis-এর বিখ্যাত স্তরঙ্গ দেখলেম। এই পর্বতের এ পাশ থেকে ফরাসীরা ও-পাশ থেকে ইটালিয়নরা, এক সঙ্গে খুদতে আরম্ভ করে, কয়েক বৎসর খুদতে খুদতে দুই যন্ত্রীদল ঠিক মাঝামাঝি এসে পরস্পরের সমুখা-সমুখী হয়। এই গুহা অতিক্রম করতে রেলগাড়ির ঠিক আধ ঘণ্টা লাগল। সে

অন্ধকারে আমরা যেন হাঁপিয়ে উঠছিলাম। এখনকার রেলগাড়ির মধ্যে দিনরাত আলো জ্বলাই আছে, কেননা, এক-এক স্থানে প্রায় পাঁচমিনিট অন্তর এক একটা পর্বতগুহা ভেদ করতে হয়—সুতরাং দিনের আলো খুব অল্পক্ষণ পাওয়া যায়। ইটালী থেকে ফ্রান্স পর্যন্ত সমস্ত রাস্তা—নির্বর, নদী, পর্বত, গ্রাম, হ্রদ, দেখতে দেখতে আমরা পথের কষ্ট ভুলে গিয়েছিলাম।

সকাল বেলায় প্যারিসে গিয়ে পৌঁছলাম। কী জমকালো সহর! অন্তর্ভেদী প্রাসাদের অরণ্যে অভিভূত হয়ে যেতে হয়। মনে হয় প্যারিসে বুঝি গরীব লোক নেই। মনে হোলো, এই সাড়ে তিন হাত মানুষের জঘ্র এমন প্রকাণ্ড জমকালো বাড়িগুলোর কী আবশুক! হোটেল গেলম, এমন প্রকাণ্ড কাণ্ড, যে, চিলে কাপড় প'রে ঘেমন সোয়াস্তি হয় না, সে হোটেলের বোধ করি তেমনি অসোয়াস্তি হয়। স্বরণস্তম্ভ, উৎস, বাগান, প্রাসাদ, পাথরে বাঁধানো রাস্তা, গাড়ি, ঘোড়া, জন-কোলাহল প্রভৃতিতে অবাধ হয়ে যেতে হয়। প্যারিসে পৌঁছিয়েই আমরা একটা “টর্কিষ-বাথে” গেলম। প্রথমতঃ একটা খুব গরম ঘরে গিয়ে বসলেম, সে ঘরে অনেকক্ষণ থাকতে থাকতে কারো কারো ঘাম বেরতে লাগল, কিন্তু আমার তো বেরল না, আমাকে তার চেয়ে আর একটা গরম ঘরে নিয়ে গেল, সে ঘরটা আঙনের মতো, চোখ মেলে থাকলে চোখ জ্বালা করতে থাকে, মিনিট কতক থেকে সেখানে আর থাকতে পারলেম না, সেখানে থেকে বেরিয়ে খুব ঘাম হোতে লাগল। তার পরে একজায়গায় নিয়ে গিয়ে আমাকে শুইয়ে দিলে। ভীমকায় এক ব্যক্তি এসে আমার সর্কান্ধ ডলতে লাগল। তার সর্কান্ধ খোলা, এমন মাংসপেশল চমৎকার শরীর কখনো দেখিনি। “বুটোরস্কো বুযস্ককঃ শালপ্রাঃশুর্মহাভূজঃ।” মনে মনে ভাবলেম ক্ষীণকায় এই মশকটিকে

দলন করার ক্ষেত্রে এমন প্রকাণ্ড কামানের কোনো আবশ্যক ছিল না। সে আমাকে দেখে বললে, আমার শরীর বেশ লম্বা আছে,—এখন পাশের দিকে বাড়লে আমি একজন সুপুরুষের মধ্যে গণ্য হব। আশ্চর্য্যটা ধরে সে আমার সর্কীক্ষ অবিশ্রান্ত দলন করলে, ভূমিষ্ঠকাল থেকে যত ধুলো মেখেছি, শরীর থেকে সব যেন উঠে গেল। বধেষ্টরূপে দলিত ক’রে আমাকে আর একটা ঘরে নিয়ে গেল, সেখানে গরম জল দিয়ে, সাবান দিয়ে, স্পঞ্জ দিয়ে শরীরটা বিলক্ষণ ক’রে পরিষ্কার করলে। পরিষ্করণ পর্ব শেষ হোলে আর একটা ঘরে নিয়ে গেল। সেখানে একটা বড়ো পিচকিরি ক’রে গায়ে গরম জল ঢালতে লাগল, হঠাৎ গরম জল দেওয়া বন্ধ ক’রে বরফের মতো ঠাণ্ডা জল বর্ষণ করতে লাগল; এই রকম কখনো গরম কখনো ঠাণ্ডা জলে স্নান ক’রে একটা জলযন্ত্রের মধ্যে গেলেম, তার উপর থেকে, নিচে থেকে চার পাশ থেকে, বাণের মতো জল গায়ে বিধতে থাকে—সেই বরফের মতো ঠাণ্ডা বরফ-বাণ-বর্ষণের মধ্যে খানিকক্ষণ থেকে আমার বুকের রক্ত পর্য্যন্ত যেন জমাট হয়ে গেল—রণে ভঙ্গ দিতে হোলো, হাঁপাতে হাঁপাতে বেরিয়ে এলাম। তার পরে এক জায়গায় পুকুরের মতো আছে, আমি সাঁতার দিতে রাজি আছি কিনা জিজ্ঞাসা করলে,—আমি সাঁতার দিলেম না, আমার সঙ্গী সাঁতার দিলেন; তাঁর সাঁতার দেওয়া দেখে তারা বলাবলি করতে লাগল—“দেখো, দেখো, এরা কি অদ্ভুত রকম ক’রে সাঁতার দেয়, ঠিক কুকুদের মতো।” এতক্ষণে স্নান শেষ হোলো। আমি দেখলেম টর্কিষ-বাথে স্নান করা আর শরীরটাকে ধোবার বাড়ি দেওয়া এক কথা। তারপরে সমস্ত দিনের জন্ত এক পাউণ্ড দিয়ে এক গাডি ভাড়া করা গেল। প্যারিস একজিবিষন দেখতে গেলেম। তুমি এইবার হয়তো খুব আগ্রহের সঙ্গে কান খাড়া করেছ, ভাবছ আমি প্যারিস্ একজিবিষনের বিষয় কী না জানি বর্ণনা করুব। কিন্তু দুঃখের বিষয়

ক্ষী বল্ব, কলকাতার য়ুনিভার্সিটিতে বিজ্ঞা শেখার মতো প্যারিস একজ্জিবিষনের সমস্ত দেখেছি কিন্তু কিছুই ভালো ক'রে দেখিনি। একদিনের বেশি আমাদের প্যারিসে থাকা হোলো না—সে বৃহৎ কাণ্ড একদিনে দেখা কারো সাধ্য নয়। সমস্তদিন আমরা দেখলেম—কিন্তু সেরকম দেখায়, দেখবার একটা তৃষ্ণা জন্মাল কিন্তু দেখা হোলো না। সে একটা নগর বিশেষ। একমাস থাকলে তবে তা বর্ণনা করবার ছুরাশা করতেম। প্যারিস একজ্জিবিষনের একটা স্তূপাকার ভাব মনে আছে, কিন্তু শৃঙ্খলাবদ্ধ ভাব কিছুই মনে নেই। সাধারণতঃ মনে আছে যে চিত্রশালায় গিয়ে অসংখ্য অসংখ্য চমৎকার ছবি দেখেছি—স্বাপত্য-শালায় গিয়ে অসংখ্য অসংখ্য প্রস্তরমূর্তি দেখেছি—নানা দেশবিদেশের নানা জিনিষ দেখেছি ; কিন্তু বিশেষ কিছু মনে নেই। তারপর প্যারিস থেকে লণ্ডনে এলেম—এমন বিষয় অঙ্ককারপুরী আর কখনো দেখিনি—ধোয়া, মেঘ, বৃষ্টি, কোয়াসা, কাদা আর লোকজনের ব্যস্ত-সমস্ত ভাব। আমি দুই এক ঘণ্টামাত্র লণ্ডনে ছিলেম—যখন লণ্ডন পরিত্যাগ করলেম তখন নিশ্বাস পরিত্যাগ ক'রে বাঁচলেম—আমার বন্ধুরা আমাকে বললেন, লণ্ডনের সঙ্গে প্রথম দৃষ্টিতেই ভালোবাসা হয় না ; কিছুদিন থেকে তাকে ভালো ক'রে চিনলে তবে লণ্ডনের মাধুর্যা বোঝা যায়।

দ্বিতীয় পত্র

ইংলণ্ডে আসবার আগে আমি নিকোঁধের মতো আশা করেছিলেম যে, এই ক্ষুদ্র দ্বীপের দুইহস্ত পরিমিত ভূমির সর্বত্রই গ্যাডট্টোনের স্বাধিতা, ম্যাক্সমুলরের বেদ-ব্যাখ্যা, টিগ্যালের বিজ্ঞানতত্ত্ব,

কার্ণাইলের গভীর চিন্তা, বেনের দর্শনশাস্ত্রে মুখরিত। সৌভাগ্যক্রমে তাতে আমি নিরাশ হয়েছি। মেয়েরা বেশভূষায় লিপ্ত, পুরুষেরা কাজকর্ম করছে, সংসার যেমন চলে থাকে তেমনি চলছে, কেবল রাজনৈতিক বিষয় নিয়ে বিশেষভাবে কোলাহল শোনা যায়। মেয়েরা জিজ্ঞাসা করে থাকে তুমি নাচে গিয়েছিলে কিনা, কল্ট কেমন লাগল, থিয়েটারে একজন নতুন একটর এসেছে, কাল অমুক জায়গায় ব্যাণ্ড হবে ইত্যাদি। পুরুষেরা বলবে, আফগান-যুদ্ধের বিষয় তুমি কী বিবেচনা করো, Marquis of Lorneকে লণ্ডনীয়েরা খুব সমাদর করেছিল, আজ দিন বেশ ভালো, কালকের দিন বড়ো মিজরেবল ছিল। এদেশের মেয়েরা পিয়নো বাজায়, গান গায়, আঙনের ধারে আঙন পোয়ায়, সোফায় ঠেসান দিয়ে নভেল পড়ে, ভিজিটরদের সঙ্গে আলাপচারি করে ও আবশ্যিক বা অনাবশ্যিক মতে যুবকদের সঙ্গে ফ্লর্ট করে। এদেশের চির-আয়বুড়ো মেয়েরা কালেক্টর লোক। Temperance meeting, Workingmen's Society প্রভৃতি যত প্রকার অগুষ্ঠানের কোলাহল আছে, সমুদয়ের মধ্যে তাঁদের কণ্ঠ আছে। পুরুষদের মতো তাঁদের আপিসে যেতে হয় না; মেয়েদের মতো ছেলেপিলে মানুষ করতে হয় না, এদিকে হয়তো এত বয়স হয়েছে যে “বলে” গিয়ে নাচা বা ফ্লর্ট ক’রে সময় কাটানো সম্ভব হয় না, তাই তাঁরা অনেক কাজ করতে পারেন, তাতে উপকারও হয়তো আছে।

এখানে দ্বারে দ্বারে মদের দোকান। আমি রাস্তায় বেরলে জুতোর দোকান, দরজীর দোকান, মাংসের দোকান, খেলনার দোকান পদে পদে দেখতে পাই, কিন্তু বইয়ের দোকান প্রায় দেখতে পাইনে। আমাদের একটি কবিতার বই কেনবার আবশ্যক হয়েছিল, কিন্তু

কাছাকাছির মধ্যে বইয়ের দোকান না দেখে একজন খেলনা-ওয়ালাকে সেই বই আনিতে হুকুম করতে হয়েছিল—আমি আগে জানতাম, এদেশে একটা কসাইয়ের দোকান যেমন প্রচুররূপে দরকারী বইয়ের দোকানও তেমনি।

ইংলণ্ডে এলে সকলের চেয়ে চোখে পড়ে লোকের ব্যস্ততা। রাস্তা দিয়ে যারা চলে তাদের মুখ দেখতে মজা আছে—বগলে ছাতি নিয়ে হুস্ হুস্ ক'রে চলেছে, পাশের লোকদের উপর ভ্রক্ষেপ নেই, মুখে যেন মহা উদ্বেগ, সময় তাঁদের ফাঁকি দিয়ে না পালায় এই তাদের প্রাণপণ চেষ্টা। সমস্ত লণ্ডনগয় রেলোয়ে। প্রতি পাঁচ মিনিট অন্তর এক একটা ট্রেন যাচ্ছে। লণ্ডন থেকে ব্রাইটনে আসবার সময় দেখি, প্রতি মুহূর্তে উপর দিয়ে একটা, নিচে দিয়ে একটা, পাশ দিয়ে একটা, এমন চারিদিক থেকে হুস্ হুস্ ক'রে ট্রেন ছুটেছে। সে ট্রেনগুলোর চেহারা লণ্ডনের লোকদেরই মতো; এদিক থেকে ওদিক থেকে মহা ব্যস্তভাবে হাঁস্ ফাঁস্ করতে করতে চলেছে। দেশ তো এই এক রকম, ছুপা চললেই ভয় হয় পাছে সমুদ্রে গিয়ে পড়ি, এখানে এত ট্রেন যে কেন ভেবে পাইনে! আমরা একবার লণ্ডনে যাবার সময় দৈবাৎ ট্রেন মিস্ করেছিলেম, কিন্তু তার জন্তে বাড়ি ফিরে আসতে হয়নি, তার আধ ঘণ্টা পরেই আর এক ট্রেন এসে হাজির।

এদেশের লোক প্রকৃতির আছরে ছেলে নয়, কারুর নাকে তেল দিয়ে তাকিয়া ঠেসান দিয়ে বসে থাকবার জো নেই। একে তো আমাদের দেশের মতো এদেশের জমিতে আঁচড় কাটলেই শস্ত হয় না, তাতে শীতের সঙ্গে মারামারি করতে হয়। তা ছাড়া শীতের উপদ্রবে এদের কত কাপড় দরকার হয় তার ঠিক নেই—তার পরে কম খেলে এদেশে বাঁচবার জো নেই; শরীরে তাপ জন্মাবার জন্তে অনেক খাওয়া চাই।

এদেশের লোকের কাপড়, কয়লা, খাওয়া অপৰ্যাপ্ত পরিমাণে না থাকলে চলে না, তার উপরে আবার মদ আছে। আমাদের বাংলার খাওয়া নামমাত্র, কাপড় পরাও তাই। এদেশে যার ক্ষমতা আছে সেই মাথা তুলতে পারে, দুর্কল লোকদের এখানে রক্ষা নেই—একে প্রকৃতির সঙ্গে যুদ্ধ তাতে কার্যক্ষেত্রে সহস্র প্রতিদ্বন্দ্বিতা রাখা কঠিন।

ক্রমে ক্রমে এখানকার দুই একজন লোকের সঙ্গে আমার আলাপ হোতে চলল। একটা মজা দেখছি, এখানকার লোকেরা আমাকে নিতান্ত অবুঝের মতো মনে করে। একদিন Dr—এর ভাইয়ের সঙ্গে রাস্তায় বেরিয়েছিলেম—একটা দোকানের সম্মুখে কতকগুলো ফোটোগ্রাফ ছিল; সে আমাকে সেইখানে নিয়ে গিয়ে ফোটোগ্রাফের ব্যাখ্যান আরম্ভ ক'রে দিলে—আমাকে বুঝিয়ে দিলে যে, এক রকম যন্ত্র দিয়ে ঐ ছবিগুলো তৈরি হয়, মানুষের হাতে ক'রে আঁকে না। আমার চারদিকে লোক দাঁড়িয়ে গেল। একটা ঘড়ির দোকানের সামনে নিয়ে, ঘড়িটা যে খুব আশ্চর্য যন্ত্র : তাই আমার মনে সংস্কার জন্মাবার জন্তে চেষ্টা করতে লাগলেন। একটা ঈভ্‌নিং পাটীতে মিস্—আমাকে জিজ্ঞাসা করেছিলেন, আমি এর পূর্বে পিয়নোর শব্দ শুনেছি কী না? এ দেশের অনেক লোক হয়তো পরলোকের একটা ম্যাপ এঁকে দিতে পারে কিন্তু ভারতবর্ষের সম্বন্ধে যদি একবিন্দুও খবর জানে। ইংলণ্ড থেকে কোনো দেশের যে কিছু তফাৎ আছে তা তারা কল্পনাও করতে পারে না। ভারতবর্ষের কথা দূরে থাক—সাধারণ লোকেরা কত বিষয় জানে না তার ঠিক নেই।

তৃতীয় পত্র

আমরা সেদিন “ফ্যান্সি-বলে” অর্থাৎ ছদ্মবেশী নাচে গিয়েছিলেম—
 কত মেয়ে পুরুষ নানারকম সেজেগুজে সেখানে নাচতে গিয়েছিল।
 প্রকাণ্ড ঘর, গ্যাসের আলোয় আলোকাকীর্ণ, চারিদিকে ব্যাণ্ড বাজছে
 —৬।৭০০ স্তম্ভরী, স্তম্ভরী। ঘরে ন স্থানং তিল ধারয়েৎ—চাঁদের হাট
 তো তাকেই বলে। এক-একটা ঘরে দলে দলে স্ত্রীপুরুষে হাত
 ধরাধরি করে ঘরে ঘরে নাচ আরম্ভ করেছে, যেন জোড়া জোড়া
 পাগলের মতো। এক একটা ঘরে এমন ৭০।৮০ জন যুগলমুর্তি,
 এমন ঘেঁসাঘেঁসি যে, কে কার ঘাড়ে পড়ে তার ঠিক নেই। একটা
 ঘরে শ্রাম্পনের কুকক্ষেত্র পড়ে গিয়েছে, মদ্য মাংসের ছড়াছড়ি,
 সেখানে লোকারণ্য; এক একটা মেয়ের নাচের বিরাম নেই, দু তিন
 ঘণ্টা ধরে ক্রমাগত তার পা চলছে। একজন মেম তুবার-কুমারী সেজে
 গিয়েছিলেন, তাঁর সমস্তই শুভ্র, সর্কান্ধে পুঁতির সজ্জা, আলোতে ঝকঝক
 করছে। একজন মুসলমানিনী সেজেছিলেন; একটা লাল ফুলো
 ইজের, উপরে একটা রেশমের পেশোয়াজ, মাথায় টুপির মতো;—এ
 কাপড়ে তাঁকে বেশ মানিয়ে গিয়েছিল। একজন সেজেছিলেন আমাদের
 দিশি মেয়ে, একটা সাড়ি আর একটা কাঁচুলি তাঁর প্রধান সজ্জা, তার
 উপরে একটা চাদর তাতে ইংরেজি কাপড়ের চেয়ে তাঁকে ঢের ভালো
 দেখাচ্ছিল। একজন সেজেছিলেন বিলিতি দাসী। আমি বাংলার জমিদার
 সেজেছিলেম, জরী দেওয়া মখমলের কাপড়, জরী দেওয়া মখমলের পাগড়ি
 প্রভৃতি পরেছিলেম। আমাদের মধ্যে ব্যক্তিবিশেষ অযোধ্যার তালুকদার
 সেজে গিয়েছিলেন, সাদা রেশমের ইজের জরীতে খচিত, সাদা রেশমের
 চাপকান, সাদা রেশমের জোকা, জরীতে ঝকঝকায়মান পাগড়ি,

জরীর কোমরবন্দ—তীর সজ্জা। অযোধ্যার তালুকদারেরা যে এই রকম কাপড় পরে তা হয়তো নয়, কিন্তু ধরা পড়বার কোনো সম্ভাবনা ছিল না। আমাদের মধ্যে একব্যক্তি আফগান সেনাপতি সেক্ষেত্রিলেন।

গত মঙ্গলবারে আমরা এক ভদ্রলোকের বাড়িতে নাচের নিমন্ত্রণে গিয়েছিলেম। সন্ধ্যাবেলায় কোথাও নিমন্ত্রণে যেতে হোলে শীতের জন্তু সচরাচর মোটা কাপড় পরতে হয়, কিন্তু ঈভ্‌নিং পাটি প্রভৃতিতে পাতলা কালো বনাতের কাপড় পরাই রীতি। সান্ধ্য পরিচ্ছদের কামিজটি একেবারে নিষ্কলঙ্ক ধব-ধরে সাদা হওয়া চাই, তার উপরে প্রায়-সমস্ত-বুকখোলা এক বনাতের ওয়েষ্ট কোট, কালো ওয়েষ্ট কোটের মধ্যে সাদা কামিজের স্মুথ দিকটা বেরিয়ে থাকে, গলায় সাদা ফিতে (necktie) বাঁধা, সকলের উপর একটি টেল-কোট (লাঙুল-কোট) ; টেলকোটের স্মুথ দিকটা কোমর পর্য্যন্ত কাটা, আমাদের চাপকান প্রভৃতি পোষাকগুলি যেমন হাঁটু পর্য্যন্ত পড়ে, এ তা নয়। এর স্মুথ দিকটার সীমা কোমর পর্য্যন্ত, কিন্তু পিছন দিকটা কাটা নয়, স্তরং কতকটা ল্যাজের মতো বুলতে থাকে। ইংরাজদের হালুকেরণে এই ল্যাজ-কোট পরতে হোলো। নাচ পাটিতে যেতে হোলে হাতে এক জোড়া সাদা দস্তানা পরা চাই, কারণ যে মহিলাদের হাতে হাত দিয়ে নাচতে হবে, খালি হাত লেগে তাঁদের হাত ময়লা হয়ে যেতে পারে কিম্বা তাঁদের হাতে যদি দস্তানা থাকে সেটা ময়লা হবার ভয় আছে। অল্প কোনো জায়গায় লেডিদের সঙ্গে সেক্‌হাণ্ড করতে গেলে হাতের দস্তানা খুলে ফেলতে হয়, কিন্তু নাচের ঘরে তার উর্পেটা।

যাহোক, আমরা তো সাড়ে নটার সময় তাঁদের বাড়িতে গিয়ে উপস্থিত হলেম। তখনও নাচ আরম্ভ হয় নি। ঘরের দুয়ারের কাছে গৃহকত্রী দাঁড়িয়ে আছেন, তিনি বিশেষ পরিচিতদের সঙ্গে শেক্‌হাণ্ড করছেন,

অপরিচিতদের প্রতি শিরঃকম্পন ও সকলকে অভ্যর্থনা করছেন। এ গোরাদের দেশে নিমন্ত্রণসভায় গৃহকর্তার বড়ো উঁচুদ নেই, তিনি সভায় উপস্থিত থাকুন বা শয়নগৃহে নিজ্রা দিন, তাতে কারো বড়ো কিছু এসে যায় না। আমরা ঘরে প্রবেশ করলেম, গ্যাসের আলোয় ঘর উজ্জ্বল, শত শত রমণীর রূপের আলোকে গ্যাসের আলো ম্লিয়মাণ; রূপের উৎসব পড়ে গিয়েছে, ঘরের ভিতরে প্রবেশ করবামাত্রই চোখে ধাঁধা লেগে যায়। ঘরের একপাশে পিয়নো, বেহালা, বাঁশি বাজছে, ঘরের চারিধারে কৌচ, চৌকি সাজানো, ইত্যন্ততঃ দেয়ালের আয়নার উপর গ্যাসের আলো ও রূপের প্রতিবিম্ব পড়ে ঝকঝক করছে। নাচবার ঘরের মেজে কাঠের, তার উপর কার্পেট প্রভৃতি কিছু পাতা নেই, সে কাঠের মেজে এমন পালিশ করা যে পা পিছলে যায়। ঘর যত পিছল হয় ততই নাচবার উপযুক্ত হয়, কেননা পিছল ঘরে নাচের গতি সহজ হয়, কোনো বাধা পায় না, আপনা-আপনি পিছলে আসে। ঘরের চারিদিকে আশেপাশে যে সকল বারান্দার মতো আছে, তাই একটু ঢেকেটুকে, গাছপালা দিয়ে, দু'একটি কৌচ চৌকি রেখে তাকে প্রণয়ীদের কুঞ্জ নামে অভিহিত করা হয়েছে। সেইখানে, নাচে শ্রান্ত হয়ে বা কোলাহলে বিরক্ত হয়ে যুবক যুবতী নিরিবিলা মধুরালাপে মগ্ন থাকতে পারেন। ঘরে ঢোকবার সময় সকলের হাতে সোনার অঙ্করে ছাপা এক একখানি কাগজ দেওয়া হয়, সেই কাগজে কী কী নাচ হবে তাই লেখা থাকে। ইংরেজি নাচ দুই শ্রেণীতে ভাগ করা যায়, এক রকম হচ্ছে স্ত্রী পুরুষে মিলে ঘুরে ঘুরে নাচা, তাতে কেবল দু'জন লোক একসঙ্গে নাচে; আর এক রকম নাচে চারটি জুড়ি নর্তক নর্তকী চতুষ্কোণ হয়ে স্মৃখা-স্মৃখী দাঁড়ায় ও হাত ধরাধরি করে নানা ভঙ্গীতে চলাফেরা করে বেড়ায়, কোনো কোনো সময়

চার জুড়ি না হয়ে আট জুড়িও হয়। ঘুরে ঘুরে নাচাকে রৌণ্ড ডান্স বলে ও চলা-ফেরা করে নাচার নাম স্কোয়ার ডান্স। নাচ আরম্ভ হবার পূর্বে গৃহকত্রী, মহিলা ও পুরুষদের মধ্যে আলাপ করিয়ে দেন, অর্থাৎ পুরুষ-অভ্যাগতকে সঙ্গে ক'রে কোনো এক অভ্যাগত-মহিলার কাছে নিয়ে গিয়ে বলেন “মিস্ অমুক, ইনি মিষ্টর অমুক।” অমনি মিস্ ও মিষ্টর শিরঃকম্পন করেন। কোনো মিসের সঙ্গে পরিচয় হবার পর নাচবার ইচ্ছা করলে পকেট থেকে সেই সোনার জলে ছাপানো প্রোগ্রামটি বের ক'রে তাঁকে জিজ্ঞাসা করতে হয় “আপনি কি অমুক নৃত্যে বাকদত্তা হয়ে আছেন?” তিনি যদি ‘না’ বলেন তাহলে তাঁকে বলতে হবে “তবে আমি কি আপনার সঙ্গে নাচবার সুখভোগ করতে পারি?” তিনি থ্যাঙ্ক্ যু বললে বোঝা যাবে কপালে তাঁর সঙ্গে নাচবার সুখ আছে। অমনি সেই কাগজটিতে সেই নাচের পাশে তাঁর নাম এবং তাঁর কাগজে আবেদনকারীর নাম লিখে দিতে হয়।

নাচ আরম্ভ হোলো। ঘুর-ঘুর-ঘুর। একটা ঘরে মনে করো, চল্লিশ পঞ্চাশ জুড়ি নাচছে, বেসাঘেঁসি, ঠেলাঠেলি, কখনো বা জুড়িতে জুড়িতে ধাক্কাধাক্কি। তবু ঘুর-ঘুর-ঘুর। তালে তালে বাজনা বাজছে, তালে তালে পা পড়ছে, ঘর গরম হয়ে উঠেছে। একটা নাচ শেষ হোলো, বাজনা থেমে গেল; নর্তক মহাশয় তাঁর শ্রান্ত সহচরীকে আহারের ঘরে নিয়ে গেলেন, সেখানে টেবিলের উপর ফল মূল মিষ্টান্নদিয়ার আয়োজন; হয়তো আহার পান করলেন, না হয় দুজনে নিভৃত কুঞ্জে বসে রহস্তালাপ করতে লাগলেন। আমি নতুন লোকের সঙ্গে বড়ো মিলে মিশে নিতে পারিনে, যে নাচে আমি একেবারে সুপণ্ডিত, সে নাচও নতুন লোকের সঙ্গে নাচতে পারিনে। সত্যি কথা বলতে কি, নাচের নেমস্তন্ন-গুলো

আমার বড়ো ভালো লাগে না। যাদের সঙ্গে বিশেষ আলাপ আছে, তাদের সঙ্গে নাচতে মন্দ লাগে না। যেমন তাস খেলবার সময়ে খারাপ জুড়ি পেলে তার 'পরে তার দলের লোক চটে যায়, তেমনি নাচের সময় খারাপ জুড়ির পরে মেয়েরা তারি চটে যায়। আমার নাচের সহচরী বোধ হয় নাচবার সময় মনে মনে আমার মরণ কামনা করেছিলেন। নাচ ফুরিয়ে গেল, আমি হাঁপ ছেড়ে ষাঁচলেম, তিনিও নিস্তার পেলেন।

প্রথমে নাচের ঘরে ঢুকেই আমি একেবারে চমকে উঠেছিলেম; দেখি যে শত খেতাজিনীদের মধ্যে আমাদের একটি ভারতবর্ষীয়া শ্রামাজিনী রয়েছেন। দেখেই তো আমার বুকটা একেবারে নেচে উঠেছিল। তার সঙ্গে কোনো মতে আলাপ করবার জন্তে ব্যস্ত হয়ে উঠলেম। কতদিন শ্রামলা মুখ দেখিনি! আর, তার মুখে আমাদের বাঙালি মেয়েদের ভালোমাল্লুখী নরম ভাব মাখানো। আমি অনেক ইংরেজ মেয়েদের মুখে ভালোমাল্লুখী নরম ভাব দেখেছি কিন্তু এর সঙ্গে তার কী একটা তফাৎ আছে বলতে পারিনে। তার চুল বাঁধা আমাদের দেশের মতো। শাদা মুখ আর উগ্র অসঙ্কোচ সৌন্দর্য্য দেখে দেখে আমার মনটা ভিতরে ভিতরে বিরক্ত হয়ে গিয়েছিল, এতদিনে তাই বুঝতে পারলেম। হাজার হোক, ইংরেজ মেয়েরা সম্পূর্ণ আলাদা জাত, আমি এতদূর ইংরেজী কায়দা শিখিনি যে তাদের সঙ্গে বেশ খোলাখুলি ভাবে কথাবার্ত্তা কইতে পারি। পরিচিত বাঁধি গতের সীমা লঙ্ঘন করতে সাহস হয় না।

আজ ব্রাইটনের অনেক তপস্কার ফলে সূর্য্য উঠেছেন। এদেশে রবি যেদিন মেঘের অন্তঃপুর থেকে বের হন, সেদিন একটি লোকও কেউ ঘরে থাকে না। সেদিন সমুদ্রের ধারে বেড়াবার রাস্তায় লোক কিলবিল

করতে থাকে। এদেশে যদিও “বাড়ির ভিতর” নেই, তবু এদেশে মেয়েরা যেমন অস্বাভাবিকরূপে এমন আমাদের দেশে নয়।

সাড়ে আটটার কমে আমাদের বিছানা থেকে ওঠা হয় না, ছটার সময় বিছানা থেকে উঠলে এখানকার লোকেরা আশ্চর্য্য হয়। তার পরে উঠেই আমি রোজ্জ ঠাণ্ডা জলে স্নান করি। এ দেশে যাকে স্নান বলে, আমি সে রকম স্নানের বিড়ম্বনা করি নে। আমি মাথায় জল ঢেলে স্নান করি, গরম জলে নয়। এখানকার এই বরফের মতো ঠাণ্ডা জল। নটার সময় আমাদের খাবার আসে। এখানকার ন’টা আর সেখানকার ছ’টা সমান। আমাদের আর একটি খাওয়া দেড়টার সময়, সেইটিই প্রধান খাওয়া—মধ্যাহ্ন ভোজন। মধ্যে একবার চা রুটি প্রভৃতি আসে তার পরে রাত আটটার সময় আর একটি স্বপ্রশস্ত ভোজনের আয়োজন হয়ে থাকে, এই রকম আমাদের দিনের প্রধান বিভাগগুলি খাওয়া নিয়ে।

অন্ধকার হয়ে আসছে, চারটে বাজে ব’লে, চারটে বাজলে পরে আলো না জ্বলে পড়া ছুঁকর। এখানে প্রকৃতপক্ষে ন’টার সময় দিন আরম্ভ হয়, কেননা গড়ে রোজ্জ আটটার কমে ওঠা হয় না। তার পরে আবার বৈকাল চারটের সময়েই এখানকার দিনের আলো নিভে যায়। দিনগুলো যেন দশটা চারটে আপিস্ করতে আসে। ট্যাক-বাড়ির ডালা খুলতে খুলতেই এদেশের দিন চলে যায়। এখানকার রাত্তির তেমনি ঘোড়ায় চড়ে আসে, আর পায়ে হেঁটে ফেরে।

মেঘ, বৃষ্টি, বাদল, অন্ধকার, শীত—এ আর এক দণ্ডের তরে ছাড়া নেই। আমাদের দেশে যখন বৃষ্টি হয়, তখন মুখলধারে বৃষ্টির শব্দ, মেঘ, বজ্র, বিদ্যুৎ, ঝড়—তাতে একটা কেমন উল্লাসের ভাব আছে; এখানে এ তা নয়, এ টিপ-টিপ্ করে সেই একঘেয়ে বৃষ্টি ক্রমাগতই অতি

নিশ্চয় পদসঞ্চারে চলছে তো চলছেই। রাস্তায় কাঁদা, পত্রহীন গাছগুলো স্তম্ভভাবে দাঁড়িয়ে দাঁড়িয়ে ভিজছে, কাঁচের জান্নার উপর টিপ্‌টিপ্‌ ক'রে জল ছিটিয়ে পড়ছে। আমাদের দেশে স্তরে স্তরে মেঘ করে, এখানে আকাশ সমতল, মনে হয় না যে মেঘ করেছে, মনে হয় কোনো কারণে আকাশের রংটা ঝুলিয়ে গিয়েছে, সমস্তটা জড়িয়ে স্বাবরজঙ্গমের একটা অবসর মুখশ্রী। লোকের মুখে সময়ে সময়ে গুন্তে পাই বটে যে, কাল বজ্র ডেকেছিল, কিন্তু বজ্রের নিজের এমন গলার জোর নেই যে, তাঁর মুখ থেকেই সে খবরটা পাই। সূর্য্য তো এখানে গুজবের মধ্যে হয়ে পড়েছে। যদি অনেক ভাগ্যবলে সকালে উঠে সূর্য্যের মুখ দেখতে পাই, তবে তখন আমার মনে হয়,—

“এমন দিন না র'বে—তা জানো।”

দিনে দিনে শীত খুব ঘনিয়ে আসছে ; লোকে বলছে, কাল পরশুর মধ্যে হয়তো আমরা বরফ পড়া দেখতে পাব। তাপমান যন্ত্র ত্রিশ ডিগ্রী পর্য্যন্ত নেবে গিয়েছে—সেই তো হচ্ছে ফ্রীজিঙ পয়েন্ট। অল্প স্বল্প ফ্রীজ্ দেখা দিয়েছে। রাস্তার মাটি খুব শক্ত। কেননা তার মধ্যে যা জল ছিল সমস্ত জমাট হয়ে গিয়েছে। রাস্তার মাঝে মাঝে কাঁচের টুকরোর মতো শিশির খুব শক্ত হয়ে জমেছে। দুই এক জায়গায় ঘাসের মধ্যে কে যেন চুন ছড়িয়ে দিয়েছে,—বরফের এই প্রথম স্ত্রেপাত। খুবই শীত পড়েছে, এক এক সময়ে হাত পা এমন ঠাণ্ডা হয়ে যায় যে জালা করতে থাকে। সকালে লেপ থেকে বেরোতে ভাবনা হয়।

আমাদের দিশি কাপড় দেখে রাস্তার এক একজন সত্যি সত্যি হেসে ওঠে, এক একজন এত আশ্চর্য্য হয়ে যায় যে তাদের আর হাসবার ক্ষমতা থাকে না। কত লোক হয়তো আমাদের জন্তে গাড়ি চাপা পড়তে পড়তে বৈচে গিয়েছে, প্যারিসে আমাদের গাড়ির পিছনে পিছনে এক দল

ইঙ্কুলের ছোকরা চীৎকার করতে করতে ছুটেছিল, আমরা তাদের সেলাম করলেম। এক একজন আমাদের মুখের উপর হেসে ওঠে, এক এক জন চৈঁচাতে থাকে—“Jack, look at the blackies !”

চতুর্থ পত্র

আমরা সেদিন হোস্ অফ্ কম্পে গিয়েছিলেম। পার্লামেন্টের অভ্যন্তরীণ চূড়া, প্রকাণ্ড বাড়ি, হাঁ-করা ঘরগুলো দেখলে তাক লেগে যায়। একটা বড়ো ঘরে হোস্ বসে, ঘরের চারিদিকে গোল গ্যালারী, তার একদিকে দর্শকেরা আর একদিকে খবরের কাগজের রিপোর্টাররা। গ্যালারী অনেকটা থিয়েটারের ড্রেস্ সার্কলের মতো। গ্যালারীর নিচে ঠলে মেম্বররা বসে। তাদের জুড়ে দুপাশে হিন্দু দশখানি বেঞ্চি। এক পাশে পাঁচখানি বেঞ্চিতে গবর্নমেন্টের দল, আর এক পাশের পাঁচখানিতে বিপক্ষ দল। সমুখের প্লাটফর্মের উপর একটা কেদারা আছে—সেইখানে প্রেসিডেন্টের মতো একজন (যাকে স্পীকার বলে) মাথায় পরচুলা পরে অত্যন্ত গম্ভীর ভাবে বসে থাকেন। যদি কেউ কখনো কোনো অজ্ঞায় ব্যবহার বা কোনো আইনবিরুদ্ধ কাজ করে তাহোলে স্পীকার উঠে তাকে বাধা দেয়। যেখানে খবরের কাগজের রিপোর্টাররা সব বসে, তার পিছনে ষড়খড়ি-দেওয়া একটা গ্যালারিতে মেয়েদের জায়গা, বাইরে থেকে তাদের দেখা যায় না। আমরা যখন গেলেম, তখন ওডনেল বলে এক জন আইরিশ সভ্য ভারতবর্ষ সংক্রান্ত বক্তৃতা দিচ্ছিলেন, প্রেস এন্টের বিরুদ্ধে ও অজ্ঞান নানা বিষয় নিয়ে তিনি আন্দোলন করছিলেন। তাঁর প্রস্তাব অগ্রাহ্য হয়ে গেল। হোসের ভাবগতিক দেখে আমি আশ্চর্য্যে

হয়ে গিয়েছিলেম। যখন একজন কেউ বক্তৃতা করছে, তখন হয়তো অনেক মেম্বর মিলে “ইয়া” “ইয়া” “ইয়া” “ইয়া” ক’রে চীৎকার করছে, হাসছে। আমাদের দেশে সভাস্থলে ইঙ্কলের ছোকরারাও হয়তো এমন করে না। অনেক সময়ে বক্তৃতা হচ্ছে আর মেম্বররা কপালের উপর টুপি টেনে দিয়ে অকাতরে নিদ্রা যাচ্ছেন। একবার দেখলেম যে ভারতবর্ষের বিষয় নিয়ে একটা বক্তৃতার সময় ঘরে নয় দশ জনের বেশি মেম্বর ছিল না, অগ্নাত্ত সবাই ঘরের বাইরে হাওয়া খেতে, বা সপরে খেতে গিয়েছেন; আর যেই ভোট নেবার সময় হোলো অমনি সবাই চারদিক থেকে এসে উপস্থিত। বক্তৃতা শুনে বা কোনোপ্রকার যুক্তি শুনে যে কারো মত স্থির হয়, তা তো বোধ হোলো না।

গত বৃহস্পতিবাবে হোস্ অফ কমন্সে ভারতবর্ষ নিয়ে খুব বাদাম্ববাদ চলছিল। সেদিন ব্রাইট সিভিল সার্ভিস সম্বন্ধে, গ্যাডস্টোন তুলা-জ্ঞাতের শুদ্ধ ও আফগান যুদ্ধ সম্বন্ধে, ভারতবর্ষীয়দের দরখাস্ত দাখিল করেন। চারটের সময় পার্লামেন্ট খোলে। আমবা কয়েকজন বাঙালি চারটে না বাজতেই হোসে গিয়ে উপস্থিত হলেম। তখন হোস খোলে নি, দর্শনাধীরা হোসের বাইরে একটা প্রকাণ্ড ঘরে দাঁড়িয়ে আছে। ঘরের চারদিকে বর্ক, ফক্স, চ্যাটহাম, ওয়লপোল, প্রভৃতি রাজনীতিবিহারদ মহাপুরুষদের প্রস্তর মূর্তি। প্রতি দরজার কাছে পাহারওয়ালা পাকাচুলের পরচুলা-পরা। গাউন ঝোলানো পার্লামেন্টের কর্মচারীরা হাতে দুই একটা খাতাপত্র নিয়ে আনাগোনা করছিলেন। চারটের সময় হোস খুলল। আমাদের কাছে স্পীকর্স গ্যালেরির টিকিট ছিল। হোস্ অফ কমন্সে পাঁচ শ্রেণীর গ্যালারী আছে,—ষ্ট্রেঞ্জর্স গ্যালেরি, স্পীকর্স গ্যালেরি, ডিপ্লম্যাটিক্ গ্যালেরি, রিপোর্টস্ গ্যালেরি, লেডিজ্ গ্যালেরি। হোসের যে কোনো মেম্বরের কাছ থেকে বৈদেশিক গ্যালারির টিকিট

পাওয়া যায়, আর বক্তার অনুগ্রহ হোলে তবে বক্তার গ্যালারীর টিকিট পাওয়া যেতে পারে। ডিপ্লম্যাটিক্ গ্যালেরিটা কী পদার্থ তা ভালো ক'রে বলতে পারিনে, আমি যে কবার হোসে গিয়েছি দু-একজন ছাড়া সেখানে লোক দেখতে পাইনি। ট্রেঞ্জর্স গ্যালেরি থেকে বড়ো ভালো দেখা শুনো যায়না ; তার সামনে স্পীকর্স গ্যালেরি ; তার সামনে ডিপ্লম্যাটিক্ গ্যালেরি। আমরা গিয়ে তো বসলেম। পরচুলাধারী স্পীকর্স মহাশয় গরুড় পক্ষীটির মতো তাঁর সিংহাসনে উঠলেন। হোসের সভোরা সব আসন গ্রহণ করলেন। কাজ আরম্ভ হোলো। হোসের প্রথম কাজ প্রমোত্তর করা। হোসের পূর্ব অধিবেশনে এক এক জন মেম্বর ব'লে রাখেন যে “আগামী বারে আমি অমুক অমুক বিষয়ে প্রশ্ন জিজ্ঞাসা কবব, তার উত্তর দিতে হবে।” সেদিন ওডনেল নামে একজন আইরিশ মেম্বর জিজ্ঞাসা করলেন যে, “একো এবং আনো দুই একটি খবরের কাগজে জুলুদের প্রতি ইংরাজ সৈন্যদের অত্যাচারের যে বিবরণ বেরিয়েছে, সে বিষয়ে গবর্নমেন্ট কি কোনো সংবাদ পেয়েছেন ? আর সে সকল অত্যাচার কি খৃষ্টানদের অনুচিত নয় ?” অমনি গবর্নমেন্টের দিক থেকে সাব মাইকেল হিকস্‌বিচ উঠে ওডনেলকে কড়া কড়া দুই এক কথা শুনিয়ে দিলেন, অমনি একে একে যত আইরিশ মেম্বর ছিলেন, সকলে উঠে তার কড়া কড়া উত্তর দিতে লাগলেন,—এই রকম অনেকক্ষণ ঝগড়া কাঁটি ক'রে দুই পক্ষ শান্ত হয়ে বসলেন। উত্তর প্রত্যুত্তরের ব্যাপার সমাপ্ত হোলে পর যখন বক্তৃতা করবার সময় এল, তখন হোস থেকে অধিকাংশ মেম্বর উঠে চলে গেলেন। দুই একটা বক্তৃতার পর ব্রাইট উঠে সিভিল সার্ভিসের রাশি রাশি দরখাস্ত হোসে দাখিল করলেন। বুদ্ধ ব্রাইটকে দেখলে অত্যন্ত ভক্তি হয়, তাঁর মুখে ঔদায্য ও দয়া যেন মাখানো। দুর্ভাগ্যক্রমে ব্রাইট সেদিন কিছু

বক্তৃতা করলেন না। হোসে অতি অল্প মেঘবই অবশিষ্ট ছিলেন, যারা ছিলেন তাঁদের মধ্যে অনেকেই নিদ্রার আয়োজন করছিলেন, এমন সময়ে গ্যাডষ্টোন উঠলেন। গ্যাডষ্টোন ঠাঠামাত্র সমস্ত ঘর একেবারে নিস্তরূ হয়ে গেল, গ্যাডষ্টোনের স্বর শুনতে পেয়ে আস্তে আস্তে বাইরে থেকে দলে দলে মেঘের আসতে লাগলেন, দুই দিকের বেঞ্চি পুরে গেল। তখন পূর্ণ উৎসের মতো গ্যাডষ্টোনের বক্তৃতা উৎসারিত হোতে লাগল। কিছুমাত্র চীৎকার, তর্জন গর্জন ছিল না, অথচ তাঁর প্রতি-কথা, ঘরের যেখানে যে কোনো লোক বসেছিল, সকলেই একেবারে স্পষ্ট শুনতে পাচ্ছিল। গ্যাডষ্টোনের কী এক রকম দৃঢ় স্বরে বলবার ধরণ আছে, তাঁর প্রতি-কথা মনের ভিতর গিয়ে যেন জোর ক'রে বিশ্বাস জন্মিয়ে দেয়। একটা কথায় জোর দেবার সময় তিনি মুষ্টি বন্ধ ক'রে একেবারে নুয়ে নুয়ে পড়েন যেন প্রত্যেক কথা তিনি একেবারে নিংড়ে নিংড়ে বের করছেন। আর সেই রকম প্রতি জোর-দেওয়া কথা দরজা ভেঙে চুরে যেন মনের ভিতর প্রবেশ করে। গ্যাডষ্টোন অনর্গল বলেন বটে, কিন্তু তাঁর প্রতি-কথা ওজন কবা, তাব কোনো অংশ অসম্পূর্ণ নয়; তিনি বক্তৃতার প্রথম থেকে শেষ পর্যন্ত সমস্তের জোর দিয়ে বলেন না, কেননা সে-রকম বলপূর্বক বললে স্বভাবতই শ্রোতাদের মন তার বিরুদ্ধে কোমর বেঁধে দাঁড়ায়, তিনি যে কথায় জোর দেওয়া আবশ্যিক মনে করেন, সেই কথাতেই জোর দেন; তিনি খুব তেজের সঙ্গে বলেন বটে, কিন্তু চীৎকার ক'রে বলেন না, মনে হয় যা বলছেন, তাতে তাঁর নিজের খুব আন্তরিক বিশ্বাস।

গ্যাডষ্টোনের বক্তৃতাও যেমন থামল, অমনি হোসে শূন্যপ্রায় হয়ে গেল, দুদিকের বেঞ্চিতে ৬৭ জনের বেশি আর লোক ছিল না।

ম্যাডটোনের পর অলেট যখন বক্তৃতা আরম্ভ করলেন তখন দুই দিককার বেঞ্চিতে লোক ছিল না বললেও হয়; কিন্তু তিনি ক্ষান্ত হবার পাত্র নন, শূন্য হোস্কে সম্বোধন ক'রে অত্যন্ত দীর্ঘ এক বক্তৃতা করলেন। সেই অবকাশে আমি অত্যন্ত দীর্ঘ নিদ্রা দিই। দুই একজন মেম্বর, যারা উপস্থিত ছিলেন, তাঁরা কেউ বা পরস্পর গল্প করছিলেন, কেউ বা চোখের উপর টুপি টেনে দিয়ে ডিস্‌রেলীর পদচ্যুতির পর রাজ্যের প্রধান মন্ত্রী হবার স্বপ্ন দেখছিলেন।

হোসে আইরিশ মেম্বরদের ভারি মুন্সিল; তাঁরা যখন বক্তৃতা করতে ওঠেন, তখন চারিদিক থেকে ঘোরতর কোলাহল আরম্ভ হয়, মেম্বরেরা হাঁসের মতো “ইয়া” “ইয়া” ক'রে চোঁচাতে থাকে। বিদ্রূপাত্মক “hear” “hear” শব্দে বক্তৃতার স্বর ডুবে যায়। এই রকম বাধা পেয়ে বক্তা আর আত্মসম্বরণ করতে পারেন না, খুব জলে ওঠেন, আর তিনি যতই রাগ করতে থাকেন ততই হাত্তাম্পদ হন। আইরিশ মেম্বরেরা এই রকম জ্বালাতন হয়ে আজকাল শোধ তুলতে আরম্ভ করেছেন। হোসে যে কোনো কথা ওঠে, প্রায় সকল বিষয়েই তাঁরা বাধা দেন, আর প্রতি প্রস্তাবে এক জনের পর আর একজন ক'রে উঠে দীর্ঘকালব্যাপী বক্তৃতায় হোসকে বিরত ক'রে তোলেন।

পঞ্চম পত্র

বিলেতে নতুন এসেই বাঙালিদের চোখে কোন্ জিনিষ ঠেকে, বিলিতি সমাজে নতুন মিশে প্রথমে বাঙালিদের কাঁ রকম লাগে, সে সকল বিষয়ে আমার নিজের অভিজ্ঞতা থেকে আপাততঃ কিছু বলব

না। কেননা, এ সকল বিষয় আমার বিচার করবার অধিকার নেই, ঠাঁরা পূর্বে বিলেতে অনেক কাল ছিলেন, ও বিলেত ঠাঁরা খুব ভালো ক'রে চেনেন, ঠাঁরা আমাকে সঙ্গে ক'রে এনেছেন, আর ঠাঁদের সঙ্গেই আমি বাস করছি। বিলাতে আসবার আগেই বিলেতের বিষয় ঠাঁদের কাছে অনেক শুনতে পেতেম, সুতরাং এখানে এসে খুব অল্প জিনিষ নিতাস্ত নূতন মনে হয়েছে। এখানকার লোকের সঙ্গে মিশতে গিয়ে প্রাতি পদে হাঁচটু খেয়ে খেয়ে আচার ব্যবহার আমাকে শিখতে হয়নি। তাই ভাবছি যে, আমার নিজের অভিজ্ঞতার বিষয় আপাততঃ তোমাদের কিছু বলব না। এখানকার দুই একজন বাঙালির মুখে ঠাঁদের যে রকম বিবরণ শুনেছি তাই তোমাদের লিখছি।

জাহাজে ঠাঁরা উঠলেন। যাত্রীদের সেবার জন্তে জাহাজে অনেক ইংরেজ চাকর থাকে, তাদের নিয়েই প্রথম গোল বাধে। এঁরা অনেকে তাদের “সার সার” ব'লে সম্বোধন করতেন, তাদের কোনো কাজ করতে হুকুম দিতে ঠাঁদের বাধ-বাধ করত। জাহাজে ঠাঁরা অত্যন্ত সসঙ্কোচভাবে থাকতেন। ঠাঁরা বলেন, সকল বিষয়েই ঠাঁদের যে ও রকম সঙ্কোচ বোধ হোত, সেটা কেবল ভয়ে নয়, তার সঙ্গে কতকটা লজ্জাও আছে। যে কাজ করতে যান, মনে হয় পাছে বেদস্তুর হয়ে পড়ে। জাহাজে ইংরেজদের সঙ্গে মেশা বড়ো হুঁয়ে ওঠে না। তারা টাটকা ভারতবর্ষ থেকে আসছে, “হজুর ধর্ম্মাবতার”গণ দেশীলোক দেখলে নাক তুলে, ঘাড় বেঁকিয়ে চলে যায়। মাঝে মাঝে ভদ্র ইংরেজ দেখতে পাবে, ঠাঁরা তোমাকে নিতাস্ত সঙ্গীহীন দেখে তোমার সঙ্গে মিশতে চেষ্টা করবেন, ঠাঁরা যথার্থ ভদ্র, অর্থাৎ ভদ্র ও উচ্চ পরিবারের লোক। এখানকার গলিতে গলিতে যে “জন, জোস, টমাস”-গণ কিলবিল করছে, তারা ভারতবর্ষের যে অঞ্চলে পদার্পণ করে, সে অঞ্চলে ঘরে ঘরে তাদের

নাম রাষ্ট্র হয়ে যায়, যে রাষ্ট্রীয় তারা চাবুক হস্তে ঘোড়ায় চড়ে যাক (হয়তো সে চাবুক কেবলমাত্র ঘোড়ার জঁছেই নয়) সে রাস্তানুঙ্ক লোক শশব্যস্ত হয়ে তাদের পথ ছেড়ে দেয়, তাদের এক একটা ইচ্ছিতে ভারতবর্ষের এক একটা রাজার সিংহাসন কেঁপে ওঠে, এ রকম অবস্থায় তাদের যে বিকৃতি ঘটে আমি তো তাতে বিশেষ অস্বাভাবিক কিছু দেখতে পাইনে। কোনো জন্মে যে-মামুষ ঘোড়া চালায় নি, তাকে ঘোড়া চালাতে দেও, ঘোড়াকে চাবুক মেরে মেরেই জর্জরিত করবে ; সে জানে না যে, একটু লাগাম টেনে দিলেই তাকে চালানো যায়। কিন্তু মাঝে মাঝে এক একটি ভদ্র সাহেবকে দেখা যায়, তাঁরা আংগো-ইণ্ডিয়ানদের ঘোরতর সংক্রামক রোগের মধ্যে থেকেও বিষুদ্ধ থাকেন, অপ্রতিহত প্রচুর্ষ ও ক্ষমতা পেয়েও উদ্ধত গর্বিত হয়ে ওঠেন না। সমাজ-শৃঙ্খলছিন্ন হয়ে, সহস্র সেবকদের দ্বারা বেষ্টিত হয়ে ভারতবর্ষে থাকা, উন্নত ও ভদ্র মনের এক প্রকার অগ্নিপরীক্ষা।

যাহোক, এতক্ষণে জাহাজ সাউথহাম্পটনে এসে পৌঁচেছে। বঙ্গীয় যাত্রীরা বিলেতে এসে পৌঁছিলেন। লণ্ডন উদ্দেশে চললেন। ট্রেন থেকে নাববার সময় একজন ইংরাজ গার্ড এসে উপস্থিত। বিনয়ের সঙ্গে জিজ্ঞাসা করলে, তাঁদের কী প্রয়োজন আছে, কী ক'রে দিতে হবে। তাঁদের মোট নাবিয়ে দিলে ; গাড়ি ডেকে দিলে ; তাঁরা মনে মনে বললেন “বাঃ ! ইংরেজরা কী ভদ্র !” ইংরেজরা যে এত ভদ্র হোতে পারে, তা তাঁদের জ্ঞান ছিল না। তার হস্তে একটি শিলিং গুঁজে দিতে হোলো বটে। তা হোক, একজন নবাগত বঙ্গ-যুবক একজন যে-কোনো খেতাবের কাছ থেকে একটিমাত্র সেলাম পেতে, অকাতরে এক শিলিং ব্যয় করতে পারেন। আমি ষাঁদের কাছ থেকে সব কথা শুনতে

পাই, তাঁরা অনেক বৎসর বিলাতে আছেন, বিলেতের নানা প্রকার ছোটো-খাটো জিনিষ দেখে তাঁদের প্রথম কী রকম মনে হয়েছিল, তা তাঁদের স্পষ্ট মনে নেই। যে সব বিষয় তাঁদের বিশেষ মনে লেগেছিল, তাই এখন তাঁদের মনে আছে।

তাঁরা বিলেতে আসবার পূর্বে তাঁদের বিলিতি বন্ধুরা এখানে তাঁদের জ্ঞে ঘর ঠিক ক'রে রেখেছিল। ঘরে ঢুকে দেখেন, ঘরে কার্পেট পাতা, দেয়ালে ছবি টাঙানো, একটা বডো আয়না এক জায়গায় ঝোলানো, কৌচ, কতকগুলি চৌকি, দুই একটা কাঁচের ফুলদানি, এক পাশে একটি ছোটো পিয়নো। কী সৰ্ব্বনাশ! তাঁদের বন্ধুদের ডেকে বললেন, “আমরা কি এখানে বডো মাহুশী করতে এসেছি? আমাদের বাপু বেশি টাকাকড়ি নেই, এরকম ঘরে থাকি আমাদের পোষাবে না!” বন্ধুরা অত্যন্ত আমোদ পেলেন, কারণ তখন তাঁরা একেবারে ভুলে গেছেন যে বহুপূর্বে তাঁদের একদিন এই রকম দশা ঘটেছিল। নবাগতদের নিতান্ত অন্তর্জীবী বাঙ্গালি মনে ক'রে অত্যন্ত বিস্মিতার স্বরে বললেন, “এখানকার সকল ঘরই এই রকম!” নবাগত ভাবলেন, আমাদের দেশে সেই একটা সৈংসৈতে ঘরে একটা তক্তা ও তার উপরে একটা মাদুর পাতা, ইত্যন্ত: হাঁকোর বৈঠক, কোমরে একটুখানি কাপড় জড়িয়ে জুতো জোড়া খুলে হুচার জন মিলে শতরঞ্চ খেলা চলছে, বাড়ির উঠানে একটা গরু বাঁধা, দেয়ালে গোবর দেওয়া, বারান্দা থেকে ভিজ্ঞে কাপড় শুকচ্ছে, ইত্যাদি। তাঁরা বলেন,—প্রথম প্রথম দিনকতক চৌকিতে বসতে, কোচে শুতে, টেবিলে খেতে, কার্পেটে বিচরণ করতে অত্যন্ত সঙ্কোচ বোধ হোত। সোফায় অত্যন্ত আড় হয়ে বসতেন, ভয় হোত, পাছে সোফা ময়লা হয়ে যায়, বা তার কোনো প্রকার হানি হয়। মনে হোত, সোফা-গুলো কেবল ঘর সাজাবার জ্ঞেই রেখে দেওয়া, এগুলো

ব্যবহার করতে দিয়ে মাটি করা কখনোই ঘরের কর্তার অভিপ্রেত হোতে পারে না। ঘরে এসে প্রথম মনের তাব তো এই, তার পরে আর একটি প্রধান কথা বলা বাকি।

বিলেতে ছোটোখাটো বাড়িতে “বাড়িওয়ালী” ব’লে একটা জীবের অস্তিত্ব আছে হয়তো, কিন্তু ষাঁরা বাড়িতে থাকেন, “বাড়ীওয়ালী”র সঙ্গেই তাঁদের সমস্ত সম্পর্ক। ভাড়া চুকিয়ে দেওয়া, কোনো প্রকার বোঝা পড়া, আহাঙ্গাদির বন্দোবস্ত করা, সে সমস্তই বাড়িওয়ালীর কাছে। আমার বন্ধুরা যখন প্রথম পদার্পণ করলেন, দেখলেন, এক ইংরেজনী এসে অতি বিনীত স্বরে তাঁদের “স্বপ্রভাত” অভিবাদন করলে, তাঁরা নিতান্ত শশব্যস্ত হয়ে ভদ্রতার যথাযোগ্য প্রতিদান দিয়ে আড়ষ্ট হয়ে দাঁড়িয়ে রইলেন। কিন্তু যখন তাঁরা দেখলেন, তাঁদের অগ্রাগ্র ইঙ্গ-বঙ্গ বন্ধুগণ তার সঙ্গে অতি অসঙ্কচিত স্বরে কথাবার্তা আরম্ভ ক’রে দিলেন, তখন আর-তাঁদের বিশ্বয়ের আদি অস্ত রইল না। মনে করো এক সজীব বিবিসাহেব জুতো-পরা, টুপি-পরা, গাউন-পরা! তখন ইঙ্গ-বঙ্গ বন্ধুদের উপর সেই নবাগত বঙ্গ-সুবকদের ভক্তির উদয় হোলো, কে’নো কালে যে এই অসমসাহিকদের মতো তাঁদের বুকের পাটা জন্মাবে, তা তাঁদের সম্ভব বোধ হোলো না। যাহোক, এই নবাগতদের যথাস্থানে প্রতিষ্ঠিত ক’রে দিয়ে ইঙ্গ-বঙ্গ বন্ধুগণ স্ব স্ব আলয়ে গিয়ে সপ্তাহকাল ধরে তাঁদের অজ্ঞতা নিয়ে অপরিপাণ্ড হাঙ্গকৌতুক করলেন। পূর্বোক্ত গৃহকর্ত্রী প্রত্যহ নবাগতদের অতি বিনীতভাবে, কী চাই কী না চাই, জিজ্ঞাসা করতে আসত। তাঁরা বলেন, এই উপলক্ষ্যে তাঁদের অত্যন্ত আফ্লাদ হোত। তাঁদের মধ্যে একজন বলেন, প্রথম দিন যে দিন তিনি এই ইংরেজ মেয়েকে একটুখানি ধমকাতে পেরেছিলেন, সেদিন সমস্ত দিন তাঁর মন অত্যন্ত প্রফুল্ল ছিল। অথচ সেদিন সূর্য্য

পশ্চিম দিকে ওঠেনি, পর্বত চলাফেরা ক'রে বেড়ায়নি, বহিঃ শীতলতা প্রাপ্ত হয়নি।

কার্পেট-মোড়া ঘরে তাঁরা সুখে বাস করছেন। তাঁরা বলেন, “আমাদের দেশের নিজের ঘর ব'লে একটা স্বতন্ত্র পদার্থ ছিল না; যে ঘরে বসতেম, সে ঘরে বাড়ির দশজনে যাতায়াত করছেই। আমি এক পাশে লিখছি, দাদা একপাশে একখানা বই হাতে ক'রে ঢুলছেন, আর-এক দিকে মাদুর পেতে গুরুশয় ভুলুকে উঠেইস্বরে সুর ক'রে ক'রে নামতা পড়াচ্ছেন। এখানে আমার নিজের ঘর; সুবিধামতো ক'রে বইগুলি একদিকে সাজালেম, লেখবার সরঞ্জাম একদিকে গুছিয়ে রাখলেম, কোনো ভয় নেই যে, একদিন পাঁচটা ছেলে মিলে সমস্ত ওলট-পালট করে দেবে, আর একদিন দুটোর সময় কলেজ থেকে এসে দেখবে, তিনটে বই পাওয়া যাচ্ছে না, অবশেষে অনেক গোল-গোল ক'রে দেখা যাবে বইগুলি নিয়ে আমার ছোটো ভাগীটি তাঁর ক্ষুদ্র ক্ষুদ্র সহচরীদের ডেকে ছবি দেখতে ঘোরতর ব্যস্ত। এখানে নিজের ঘরে বসে থাকো, দরজাটি ভেজানো, সট ক'বে না ব'লে কয়ে কেউ ঘরের মধ্যে এসে পড়ে না, ঘরে ঢোকবার আগে দরজায় শব্দ করে, ছেলিপিলেগুলো চারিদিকে চেঁচামেচি কান্নাকাটি জুড়ে দেয়নি, নিরিবিলি নিরালো, কোনো হাঙ্গামা নেই।” দেশের সম্বন্ধে মেজাজ খিটখিটে হয়ে ওঠে। প্রায় দেখা যায় আমাদের দেশের পুরুষেরা এখানকার পুরুষ-সমাজে বড়ো মিশেন না। কারণ এখানকার পুরুষ-সমাজে মিশতে গেলে এক-রকম বলিষ্ঠ ক্ষুণ্ণতার ভাব থাকা চাই, বাধ-বাধ মিঠে সুরে ছুচারটে সসঙ্কোচ “হাঁ না” দিয়ে গেলে চলে না। বাঙালি অভ্যাগত ডিনার টেবিলে তাঁর পার্শ্বস্থ মহিলাটির কানে কানে মিষ্টি মিষ্টি টুকরো টুকরো দুই একটি কথা মুহূর্ষে ধীরস্বরে কইতে পারেন, আর সে মহিলার সহবাসে তিনি যে

স্বর্ণ-সুখ উপভোগ করছেন, তা তাঁর মাথার চুল থেকে বুট জুতোর আগা পর্যন্ত প্রকাশ হোতে থাকে, স্ততরাং মেয়ে-সমাজে বাঙালিরা পসার করে নিতে পারেন। আমাদের দেশের ঘোমটাচ্ছন্ন-মুখচ্ছন্ন-শোভী অনালোকিত অস্ত্রপুর থেকে এখানকার রূপের মুক্ত জ্যোৎস্নায় এসে আমাদের মন-চকোর প্রাণ খুলে গান গেয়ে ওঠে।

একদিন আমাদের নবাগত বঙ্গ-যুবক তাঁর প্রথম ডিনারের নিমন্ত্রণে গিয়েছেন। নিমন্ত্রণ সভায় বিদেশীর অভ্যস্ত সমাদর। তিনি গৃহস্বামীর যুবতী কন্যা মিস্ অমুকের বাহু গ্রহণ ক'রে আহারের টেবিলে গিয়ে বসলেন। আমাদের দেশের স্ত্রীলোকদের সঙ্গে মুক্তভাবে মিশতে পাইনে, তারপরে নতুন নতুন এসে এখানকার স্ত্রীলোকদের ভাবও ঠিক বুঝতে পারিনে। কোনো সামাজিকতার অমুরোধে তারা আমাদের মনেরঞ্জন করবার জন্তে যে সকল কথাবার্তা হাঙ্গালাপ করে, আমরা তার ঠিক মর্ষ গ্রহণ করতে পারিনে, আমরা হঠাৎ মনে করি, আমাদের উপরেই এই মহিলাটির বিশেষ অমুকুল দৃষ্টি। আমাদের বঙ্গ যুবকটি মিস্কে ভারতবর্ষ সংক্রান্ত অনেক কথা জানালেন। বললেন, তাঁর বিলেত অভ্যস্ত ভালো লাগে, ভারতবর্ষে ফিরে যেতে ইচ্ছে করে না, ভারতবর্ষে অনেক প্রকার কুসংস্কার আছে। শেষকালে দুই একটি সাজানো কথাও বললেন। যথা, তিনি স্বন্দরবনে বাঘ শিকার করতে গিয়ে একবার মরতে মরতে ঝেঁটে গিয়েছিলেন। মিস্টি অতি সহজে বুঝতে পারলেন যে, এই যুবকের তাঁকে অতি ভালো লেগেছে। তিনি যথেষ্ট সন্তুষ্ট হলেন, ও তাঁর মিষ্টতম বাক্যবাণ যুবকের প্রাণে হানতে লাগলেন। “আহা, কী গোছালো কথা! কোথায় আমাদের দেশের মেয়েদের মুখের সেই নিতান্ত শ্রমলভ্য দুই একটি ‘হাঁ না’,—যা এত মুহূ যে, ঘোমটার দীমার মধ্যেই মিলিয়ে যায়; আর কোথায়

এখানকার বিখ্যাত-নিঃসৃত অঙ্গুর মধুধারা, যা অযাচিত ভাবে মদিরার মতো শিরায় শিরায় প্রবেশ করে!”

হয়তো বুঝতে পারছ, কী কী মসলার সংযোগে বাঙালি ব'লে একটা পদার্থ ক্রমে ইঙ্গ-বঙ্গ নামে একটা খিচুড়িতে পরিণত হয়। সমস্ত প্রক্রিয়াটা বিস্তারিত ক'রে লিখতে পারিনি। এত সব ছোটো ছোটো বিষয়ের সমষ্টি মানুষের মনে অলক্ষিত পরিবর্তন উপস্থিত করে যে, সে সকল খুঁটিনাটি ক'রে বর্ণনা করতে গেলে পুঁথি বেড়ে যায়।

ইঙ্গ-বঙ্গদের ভালো ক'রে চিন্তে গেলে তাঁদের তিন রকম অবস্থায় দেখতে হয়। তাঁরা ইংরেজদের সম্মুখে কী রকম ব্যবহার করেন, বাঙালিদের সম্মুখে কী রকম ব্যবহার করেন ও তাঁদের স্বজাত ইঙ্গ-বঙ্গদের সম্মুখে কী রকম ব্যবহার করেন। একটা ইঙ্গবঙ্গকে একজন ইংরেজের সম্মুখে দেখো, চক্ষু জুড়িয়ে যাবে। ভদ্রতার ভাৱে প্রতিকথায় ঘাড় মুয়ে মুয়ে পড়ছে, তর্ক কবুবার সময় অতিশয় সাবধানে নরম ক'রে প্রতিবাদ করেন ও প্রতিবাদ করতে হোলো ব'লে অপর্থাপ্ত দুঃখ প্রকাশ করেন, অসংখ্য ক্ষমা প্রার্থনা করেন। কথা কন আর না কন, একজন ইংরেজের কাছে একজন ইঙ্গ-বঙ্গ চুপ ক'রে বসে থাকলেও তাঁর প্রতি অঙ্গভঙ্গী, প্রতি মুখের ভাবে বিনয়ের পরাকাষ্ঠা প্রকাশ হোতে থাকে। কিন্তু তাঁকেই আবার তাঁর স্বজাতিমণ্ডলে দেখো, দেখবে তাঁর মেজাজ। বিলেতে যিনি তিন বৎসর আছেন, এক বৎসরের বিলেতবাসীর কাছে তাঁর অত্যন্ত পায় ভাঙ্গি। এই “তিন বৎসর” ও “এক বৎসরের” মধ্যে যদি কখনো তর্ক ওঠে, তাহোলে তুমি “তিন বৎসরের” প্রতাপটা একবার দেখতে পাও। তিনি প্রতিকথা এমন ভাবে, এমন স্বরে বলেন যে, যেন সেই কথাগুলি নিয়ে সরস্বতীর সঙ্গে তাঁর বিশেষ বোঝাপড়া হয়ে একটা স্থিরসিদ্ধান্ত হয়ে গেছে। যিনি

প্রতিবাদ করছেন, তাঁকে তিনি স্পষ্টাক্ষরে বলেন “ব্রাস্ত” কখনো বা মুখের উপর বলেন “মুর্থ।”

সেদিন একজন গল্প করছিলেন, যে তাঁকে আর এক জন বাঙালি জিজ্ঞাসা করেছিলেন যে, ‘মশায়ের কী কাজ করা হয়?’ এই গল্প শুনবামাত্র আমাদের একজন ইঙ্গ-বঙ্গ বন্ধু নিদারুণ ঘৃণার সঙ্গে ব’লে উঠলেন, “দেখন দেখি, কী বার্করস্!” ভাবটা এই যে, যেমন মিথ্যা কথা না বলা, চুরি না করা নীতি-শাস্ত্রের কতকগুলি মূল নিয়ম, তেমনি অল্প মানুষকে তার জীবিকার কথা জিজ্ঞাসা না করাও একটা মূল নিয়মের মধ্যে।

সেদিন এক জায়গায় আমাদের দেশের শাস্ত্রের কথা হচ্ছিল, বাপ-মার মৃত্যুর পর আমরা হবিষ্য করি, বেশভূষা করিনে, ইত্যাদি। শুনে একজন ইঙ্গ-বঙ্গ বন্ধু অধীরভাবে আমাকে ব’লে উঠলেন যে, “আপনি অবিশ্বি, মশায়, এ সকল অমুষ্ঠান ভালো বলেন না।” আমি বললাম “কেন নয়? আমি দেখছি ইংরেজরা যদি আত্মীয়ের মৃত্যু উপলক্ষ্যে হবিষ্যায় খেত, আর আমাদের দেশের লোকেরা না খেত, তাহোলে হবিষ্যায় খায় না ব’লে আমাদের দেশের লোকের উপর তোমার দ্বিগুণতর ঘৃণা হোত, ও মনে করতে, হবিষ্যায় খায় না ব’লেই আমাদের দেশের এত দুর্দশা। তুমি হয়তো জানো, ইংরেজরা এক টেবিলে তেরজন খাওয়া অলক্ষণ মনে করে, তাদের বিশ্বাস, তাহোলে এক বৎসরের মধ্যে তাদের একজনের মৃত্যু হবেই। একজন ইঙ্গবঙ্গ যখন নিমন্ত্রণ করেন, তখন কোনোমতে তেরজন নিমন্ত্রণ করেন না, জিজ্ঞাসা করলে বলেন, “আমি নিজে বিশ্বাস করিনে, কিন্তু ষাঁদের নিমন্ত্রণ করি তাঁরা পাছে ভয় পান তাই বাধ্য হয়ে এ নিয়ম পালন করতে হয়।” সেদিন একজন ইঙ্গবঙ্গ তাঁর একটি আত্মীয় বালককে রবিবার দিনে রাস্তায় খেলা কবতে যেতে

বারণ করছিলেন। আমি জিজ্ঞাসা করতে বল্লেন, “রাস্তার লোকেরা কী মনে করবে?”

কতকগুলি বাঙালি বলেন, “এখানকার মতো ঘর ভাড়া দেবার প্রথা তাঁরা আমাদের দেশে প্রচলিত করবেন!” তাঁদের সেই একটিমাত্র সাধ। আর একজন বাঙালি, বাংলা সমাজ সংস্কার করতে চান, বিলেতের সমাজে মেয়ে পুরুষে একত্রে নাচাটাই তাঁর চোখে অভ্যস্ত ভালো লেগেছে। কতকগুলি সাধারণ বিষয়ে আমাদের দেশের ও এদেশের মেয়েদের অমিল দেখে তার পরে তিনি কতকগুলি বিশেষ বিশেষ বিষয় নিয়ে ছেলেমানুষের মতো খুঁৎখুঁৎ করতে থাকেন। একজন ইঙ্গ-বন্ধ নাগিষ করছিলেন যে, আমাদের দেশের মেয়েরা পিয়নো বাজাতে পারে না, ও এখানকার মতো ভিজিটরদের সঙ্গে দেখা করতে ও ভিজিট প্রত্যর্পণ করতে যায় না। এই রকম ক্রমাগত প্রতি ছোটো-খাটো বিষয় নিয়ে এদেশের সঙ্গে আমাদের দেশের তুলনা ক’বে ক’রে তাঁদের চটাভাব চটনমান যত্নে ব্লড্ হীট্ ছড়িয়ে ওঠে। একজন ইঙ্গ-বন্ধ তাঁর সমবেদক বন্ধুদের দ্বারা বেষ্টিত হয়ে বলছিলেন যে, যখন তিনি মনে করেন যে, দেশে ফিরে গেলে তাঁকে চারিদিকে ঘিরে মেয়েগুলো প্যান্ প্যান্ ক’রে কাঁদতে আরম্ভ করবে, তখন আর তাঁর দেশে ফিরে যেতে ইচ্ছে করে না! অর্থাৎ তিনি চান, যে তাঁকে দেখবামাত্রই “ডিয়র ডলি” ব’লে ছুটে এসে তাঁর স্ত্রী তাঁকে আলিঙ্গন ও চুষন ক’রে তাঁর কাঁধে মাথা দিয়ে দাঁড়িয়ে থাকবে। ডিনারের টেবিলে কাঁটা ছুরি উন্টে ধরতে হবে, কি পাৰ্ণেট ধরতে হবে তাই জানবার জন্তে তাঁদের “গবেষণা” দেখলে তাঁদের উপর ভক্তির উদয় হয়। কোটের কোন্ ছাঁটটা ফ্যাশান-সঙ্গত, আজকাল নোবিলিটি আঁট প্যান্টলুন পরেন কি ঢল্কা পরেন, ওয়ালটুন্ নাচেন,

কি পোলকা মজুকা, মাছের পর মাংস পান কি মাংসের পর মাছ, সে বিষয়ে তাঁরা অপ্রাস্ত খবর রাখেন। ঐ রকম ছোটো-খাটো বিষয়ে একজন বাঙালি যত দস্তুর বেদস্তুর নিয়ে নাড়াচাড়া করেন, এমন এ দিশী করে না। তুমি যদি মাছ খাবার সময় ছুরি ব্যবহার করো তবে একজন ইংরেজ তাতে বড়ো আশ্চর্য্য হবেন না, কেননা তিনি জানেন তুমি বিদেশী কিন্তু একজন ইঙ্গ-বঙ্গ সেখানে উপস্থিত. থাকলে তাঁর স্মেলিং সপ্টের আবশ্যক করবে। তুমি যদি শেরী খাবার গ্যাসে স্লাম্পন খাও তবে একজন ইঙ্গ-বঙ্গ তোমার দিকে হাঁ ক'রে চেয়ে থাকবেন, যেন তোমার এই অজ্ঞতার জন্তে সমস্ত পৃথিবীর স্বথ শাস্তি নষ্ট হবার উপক্রম হয়েছে। সন্ধ্যা বেলায় ভুমি যদি মগিঙ কোট পরো, তাহোলে তিনি ম্যাজিষ্ট্রেট হোলে জেলে নির্জন বাসের আজ্ঞা দিতেন। একজন বিলাত-ফেরতা কাউকে মটন দিয়ে রাই দিয়ে খেতে দেখলে বলতেন “তবে কেন মাথা দিয়ে চলো না ?”

আর একটি আশ্চর্য্য ব্যাপার লক্ষ্য করে দেখেছি যে, বাঙালিরা ইংরেজদের কাছে স্বদেশের লোকদের ও আচার ব্যবহারের যত নিন্দে করেন, এমন একজন ভারতদ্বেষী এ্যাংগ্লো-ইণ্ডিয়ানও করেন না। তিনি নিজে ইচ্ছে ক'রে কথা পাড়েন ও ভারতবর্ষের নানা প্রকার কুসংস্কার প্রভৃতি নিয়ে প্রাণ খুলে হাস্য পরিহাস করেন। তিনি গল্প করেন যে, আমাদের দেশে বঙ্গভাচার্যের দল ব'লে এক রকম বৈষ্ণবের দল আছে, তাদের সমস্ত অহুষ্ঠান সবিস্তারে বর্ণনা করতে থাকেন। সভার লোকদের হাসাবার অভিপ্রায়ে নেটিব নাচ্ গার্লরা কী রকম ক'রে নাচে, অঙ্গভঙ্গী ক'রে তার নকল করেন ও তাই দেখে সকলে হাসলে আনন্দ উপভোগ করেন। তাঁর নিতাস্ত ইচ্ছে, তাঁকে কেউ ভারতবর্ষীয় দলের

মধ্যে গণ্য না করে। সাহেব-সাজা বাঙালিদের প্রতি পদে ভয়, পাছে তাঁরা বাঙালি বলে ধরা পড়েন। একজন বাঙালি একবার রাস্তা দিয়ে যাচ্ছিলেন, আর একজন ভারতবর্ষীয় এসে তাঁকে হিন্দুস্থানীতে দুই এক কথা জিজ্ঞাসা করে, তিনি মহা খাপা হরে তার উত্তর না দিয়ে চলে যান। তাঁর ইচ্ছে, তাঁকে দেখে কেউ মনে না করতে পারে যে, তিনি হিন্দুস্থানী বোঝেন। একজন ইঙ্গ-বঙ্গ একটি “জাতীয়-সঙ্গীত” রামপ্রসাদী সুরে রচনা করেছেন; এই গানটার একটু অংশ পূর্বে পত্র লিখেছি, বাকি আর একটুকু মনে পড়েছে, এই জন্ত আবার তার উল্লেখ করছি। এ গীত ষাঁর রচনা, তিনি রামপ্রসাদের মতো শ্রামার উপাসক নন, তিনি গৌরীভক্ত। এই জন্তে গৌরীকে সম্বোধন ক’রে বলছেন—

“মা, এবার মলে সাহেব হব ;

রাঙা চুলে ছাট বসিয়ে, পোড়া নেটিব নাম ঘোচাব।

শাদা হাতে হাত দিয়ে মা, বাগানে বেড়াতে যাব,

(আবার) কালো বদন দেখলে পরে “ডার্কি” বলে মুখ ফেরাব।”

আমি পূর্বেই বিলেতের বাড়িওয়ালি শ্রেণীর কথা উল্লেখ করেছি, তারা বাড়ির লোকদের আবশ্যিকমতো সেবা করে। অনেক ভাড়াটে থাকলে তারা বা অল্প আত্মীয়েরা তাদের সাহায্য করবার জন্ত থাকে। অনেকে স্কন্দরী ল্যাণ্ডলেডি দেখে ঘর ভাড়া করেন। বাড়িতে পদার্পণ করেই ল্যাণ্ডলেডির যুবতী কছার সঙ্গে ঘনিষ্ঠতা ক’রে নেন, দু তিন দিনের মধ্যে তাঁর একটি আদরের নামকরণ করা হয়, সপ্তাহ অতীত হোলে তার নামে হয়তো একটা কবিতা রচনা ক’রে তাকে উপহার দেন। সেদিন ল্যাণ্ডলেডিব মেয়ে তাঁকে এক পেয়লা চা এনে জিজ্ঞাসা করেছিল যে, চায়ে কি চিনি দিতে হবে? তিনি হেসে বললেন, “না নেলি, তুমি যখন ছুঁয়ে দিয়েছ, তখন আর চিনি দেবার দরকার দেখছি

নে।” আমি জানি, একজন ইঙ্গ-বঙ্গ তাঁর বাড়ির দাসীদের মেঝদিদি সেজদিদি ব’লে ডাকতেন।

আমি এক সন্মকে জানি, তিনি তাঁর “মেঝদিদি, সেজদিদি”বর্গকে এত মাগ্ন করে চলতেন যে তাঁর ঘরে বা তাঁর পাশের ঘরে যদি এদের মধ্যে কেউ উপস্থিত থাকত, এবং সে অবস্থায় যদি তাঁর কোনো ইঙ্গ-বঙ্গ বন্ধু গান বা হাস্য পরিহাস করতেন তাহোলে তিনি মহা অপ্ৰতিভ হয়ে ব’লে উঠতেন “আরে চূপ করো, চূপ করো, মিস্ এমিলি কী মনে করবেন?” আমার মনে আছে, দেশে থাকতে একবার এক ব্যক্তি বিলেত থেকে ফিরে গেলে পর, আমরা তাকে খাওয়াই। খাবার সময় তিনি নিঃশ্বাস ত্যাগ করে বললেন, “এই আমি প্রথম খাচ্ছি, যে দিন আমার খাবার টেবিলে কোনো লেডি নেই।” একজন ইঙ্গ-বঙ্গ একবার তাঁর কতকগুলি বন্ধুদের নিমন্ত্রণ করেছিলেন। খাবার টেবিলে কতকগুলি ল্যাণ্ডলেডি ও দাসী বসে ছিল, তাদের এক জনের ময়লা কাপড় দেখে নিমন্ত্রণকর্তা তাকে কাপড় বদলে আসতে অনুরোধ করেছিলেন। স্তনে সে বললে, “যাকে ভালোবাসা যায়, তাকে ময়লা কাপড়েও ভালোবাসা যায়।”

এইবার ইঙ্গ-বঙ্গদের একটি গুণের কথা তোমাকে বলছি। এখানে ধারা আসেন, অনেকেই কবুল করেন না, যে, তাঁরা বিবাহিত যেহেতু স্বভাবতই যুবতী কুমারী-সমাজে বিবাহিতদের দাম অল্প। অবিবাহিত ব’লে পরিচয় দিলে এখানকার অবিবাহিতদের সঙ্গে মিশে অনেক যথেষ্টাচার করা যায়, কিন্তু বিবাহিত ব’লে জানলে তোমার অবিবাহিত সঙ্গীরা ও-রকম অনিয়ম কর্তে দেয় না; স্ততরাং অবিবাহিত ব’লে পরিচয় দিলে অনেক লাভ আছে।

অনেক ইঙ্গ-বঙ্গ দেখতে পাবে তাঁরা আমার এই বর্ণনার বহির্গত।

किन्तु साधारणतः इङ्ग-बङ्गदेशेर लक्षणञ्चलि आमि यत दूर ज्ञानि, ता लिखेछि ।

भारतवर्षे गिये इङ्ग-बङ्गदेशेर की रकम अबह्वा हय से विषये आमार अतिज्ञताओ नेई, बज्जबाओ नेई । किन्तु किछु काल भारतवर्षे धेके तार परे इंग्लण्डे एले की रकम तब हय तओ आमि अनेकेर देखेछि । ताँदर इंग्लण्ड आर तेमन भालो लागे ना ; अनेक समये ताँरा तेवे पान ना, इंग्लण्ड बदलेछे, कि ताँरा बदलेछेन । आगे इंग्लण्डेर अति सामान्य ज्जिनिष भालो लागत ; एखन इंग्लण्डेर शीत इंग्लण्डेर वर्षा ताँदर भालो लागेछे ना, एखन ताँरा भारतवर्षे फिरे येते होले दुःखित हन ना । ताँरा बलेन, आगे ताँरा इंग्लण्डेर छ्रुवेरि फल अत्यन्त भालो वासतेन । एमन कि, ताँरा यत रकम फल खेयेछेन, तार मध्ये छ्रुवेरिई ताँदर सकलेर चेये खाहू मने होत । किन्तु एई कय बंसरेर मध्ये छ्रुवेरि र खाद बदले गेल ना कि । एखन देखूछेन तार चेये अनेक दिशि फल ताँदर भालो लागे । आगे डेत्नशियरेर क्रीम ताँदर एत भालो लागत ये, तार आर कथा नेई, किन्तु एखन देखूछेन आमादेशेर देशेर क्कीर तार चेये चेर भालो । ताँरा भारतवर्षे गिये स्त्री पुत्र परिवार निये संसारी हये पडेन, रोज्जगार करते आरम्भ करेन, भारतवर्षेर माटि ते ताँदर शिकड़ एकरकम वंसे याय । मनटा केमन शिथिल हये आसे, तखन पायेर उपर पा दिये टाना पाखार वातास खेये कोनो प्रकारे दिन काटिये दिते पारले निश्चिन्त धाकेन । बिलेते आमोद बिलास भोग करते गेलेओ अनेक उग्रमेर आवञ्चक करे । एखाने एधर धेके ओधरे येते होले गाड़ि चलन नेई, हात पा नाडते चाडते दशटा चाकरेर उपर निर्भर करले चले ना । गाड़ि भाड़ा अत्यन्त बेशि, आर चाकरेर माईने मासे

সাড়ে তিন টাকা নয়। ষিয়েটার দেখতে যাও; সন্ধ্যা বেলা বৃষ্টি পড়ছে, পথে কাদা, একটা ছাতা ঘাড়ে ক'রে মাইল কতক ছুটোছুটি ক'রে তবে ঠিক সময়ে পৌঁছতে পারবে। যখন রক্তের তেজ থাকে, তখন এ সকল পেরে ওঠা যায়।

ষষ্ঠ পত্র

আমাদের ব্রাইটনের বাড়িটি সমুদ্রের কাছে একটি নিরালা জায়গায়। এক সার ২০। ২৫টি বাড়ি, বাড়িগুলির নাম মেডিনা ভিলাজ। হঠাৎ মনে হয়েছিল বাগান বাড়ি। এখানে এসে দেখি, “ভিলা”র মধ্যে আমাদের বাড়ির সামনে দু চার হাত জমিতে দু চারটে গাছ পোতা আছে। বাড়ির দরজায় একটা লোহার কড়া লাগানো, সেইটেতে ঠক ঠক করলাম, “আমাদের ল্যাণ্ডলেণ্ড এসে দরজা খুলে দিলে। আমাদের দেশের তুলনায় এখানকার ঘরগুলো লম্বা চৌড়া ও উঁচুতে চের ছোটো; চারিদিকে জানালা বন্ধ, একটু বাতাস আসবার জো নেই, কেবল জানালাগুলো সমস্ত কাঁচের ব'লে আলো আসে। শীতের পক্ষে এরকম ছোটো খাটো ঘরগুলো ভালো, একটু আশুণ জ্বাললেই সমস্ত বেশ গরম হয়ে ওঠে, কিন্তু তা হোক, যে দিন মেঘে চারিদিক অন্ধকার, টিপ্ টিপ্ ক'রে বৃষ্টি পড়ছে, তিন চারদিন ধরে মেঘ

বৃষ্টি অঙ্ককারের এক মুহূর্ত্ত বিরাম নেই, সে দিন এই ছোট অঙ্ককার ঘরটার এক কোণে ব'সে আমার মনটা অত্যন্ত বিগড়ে যায়, কোনো মতে সময় কাটে না। খালি আমি ব'লে নয়, আমার ইংরেজ আলাপীরা বলেন, সে রকম দিনে তাঁদের অত্যন্ত Swear করার প্রবৃত্তি জন্মায়, (Swear করা রোগটা সম্পূর্ণ যুরোপীয়, স্ততরাং ওর বাংলা কোনো নাম নেই), মনের ভাবটা অধাঙ্গিক হয়ে ওঠে। যা হোক এখানকার ঘর দুয়ারগুলি বেশ পরিষ্কার ; বাড়ির ভিতরে প্রবেশ করলে কোথাও ধূলা দেখবার জো নেই, মেজের সর্কাদ্ধ কাপেট প্রভৃতি দিয়ে মোড়া, সিঁড়িগুলি পরিষ্কার তক্ তক্ করছে। চোখে দেখতে খারাপ হোলে এরা সহিতে পারে না। প্রতি সামান্য বিষয়ে এদের ভালো দেখতে হওয়াটা প্রধান আবশ্যক। শোকবস্ত্রও স্ত্রী দেখতে হওয়া চাই। আমরা যাকে পরিষ্কার বলি সেটা কিন্তু আর একটা জিনিষ। এখানকার লোকেরা খাবার পরে আঁচায় না, কেননা আঁচানো জল মুখ থেকে পড়ছে, সে অতি কুশ্রী দেখায়। শ্রী হানি হয় ব'লে পরিষ্কার হওয়া হয় না। এখানে যে রকম কাশী সন্দির প্রাদুর্ভাব, তাতে ঘরে একটা পিক্‌দানি নিতান্ত আবশ্যক, কিন্তু তার ব্যবহার কুশ্রী ব'লে ঘরে রাখা হয় না, রুমালে সমস্ত কাজ চলে। আমাদের দেশের যে রকম পরিষ্কার ভাব, তাতে আমরা বরঞ্চ ঘরে একটা পিক্‌দানি রাখতে পারি, কিন্তু জামার পকেটে এরকম একটা বীভৎস পদার্থ বহন করতে ঘৃণা হয়। কিন্তু এখানে চোখেই আধিপত্য। রুমাল কেউ দেখতে পাবে না, তা হোলেই হোলো। চুলটি বেশ পরিষ্কার ক'রে আঁচড়ানো থাকবে, মুখটি ও হাত দুটি সাফ থাকবে, স্নান করবার বিশেষ দরকার নেই। এখানে জামার উপরে অস্ত্রায় অনেক কাপড় পরে ব'লে জামার সমস্তটা দেখা যায় না, খালি বুকের ও হাতের কাছে একটু বেরিয়ে থাকে। একরকম জামা:

আছে, তার ষতটুকু বেরিয়ে থাকে ৩তটুকু জোড়া দেওয়া, সেটুকু খুলে ধোবার বাড়ি দেওয়া যায়; তাতে সুবিধে হচ্ছে যে ময়লা হয়ে গেলে জামা বদলাবার কোনো আবশ্যক করে না, সেই জোড়া টুকরোগুলো বদলালেই হোলো। এখানকার দাসীদের কোমরে এক আঁচল বাঁধা থাকে, সেইটি দিয়ে তারা না পৌছে এমন পদার্থ নেই; খাবার কাঁচের প্লেট যে দেখছি বক্ বক্ করছে, সেটিও সেই সর্ব্ব-পাবক-আঁচল দিয়ে মোছা হয়েছে, কিন্তু তাতে কী হানি, কিছু খারাপ দেখাচ্ছে না। এখানকার লোকেরা অপরিষ্কার নয়, আমাদের দেশে যাকে “নোংরা” বলে তাই। এখানে পরিষ্কার ভাবের যে অভাব আমরা দেখতে পাই, সে অনেকটা শীতের জন্তে। আমরা যে কোনো জিনিষ হোক না কেন, জল দিয়ে পরিষ্কার না হলে পরিষ্কার মনে করিনে। এখানে অত জল নিয়ে নাড়াচাড়া পোষায় না। তাছাড়া শীতের জন্তে এখানকার জিনিষপত্র শীত “নোংরা” হয়ে ওঠে না। এখানে শীতেও গায়ের আবরণ থাকতে শরীর তত অপরিষ্কার হয় না। এখানে জিনিষপত্র প’চে ওঠে না, এই রকম পরিষ্কারের পক্ষে নানা বিষয়ে সুবিধে। আমাদের যেমন পরিষ্কার ভাব আছে, তেমনি পরিষ্কার হওয়ার বিষয়ে অনেক চিন্তেমিও আছে। আমাদের দেশের পুষ্করিণীতে কী না ফেলে? অপরিষ্কার জলকুণ্ডে স্নান; তেল মেখে ছুটো ডুব দিলেই আমরা গুচিঁতা কল্পনা করি। আমরা নিজের শরীর ও খাওয়া-দাওয়া সংক্রান্ত জিনিষের বিষয়ে বিশেষ পরিষ্কার থাকি, কিন্তু ঘর ছন্ন্যার যথোচিত পরিষ্কার করিনে। এমন কি অস্বাস্থ্যকর করে তুলি।

আমাদের দুই একটি ক’রে আলাপী হোতে লাগল। ডাক্তার ম— একজন আধবুড়ো চিকিৎসা ব্যবসায়ী। তিনি একজন প্রকৃত ইংরেজ, ইংলণ্ডের বহির্ভূত কোনো জিনিষ তাঁর পছন্দসই নয়। তাঁর কাছে

কুদ ইংলণ্ডই সমস্ত পৃথিবী, তাঁর কল্পনা কখনো ডোভার প্রণালী পার হয় নি। তাঁর কল্পনার এমন অভাব যে, তিনি মনে করতে পারেন না যারা বাইবেলের দশ অনুশাসন মানে না, তাদের মধ্যে কথা বলতে কী ক’রে সন্ধেচ হোতে পারে? অখুষ্ঠ লোকদের নীতির বিরুদ্ধে এই তাঁর প্রধান যুক্তি। যে ইংরাজ নয়, যে খৃষ্টান নয়, এমন একটা অপূর্ব সৃষ্টি দেখলে তার মনুষ্যত্ব কী ক’রে থাকতে পারে ভেবে পান না। তাঁর মতো হচ্ছে Gladly he would learn and gladly teach, কিন্তু আমি দেখলুম তাঁর লর্ণ করবার চের আছে, কিন্তু টীচ্ করবার মতো সঞ্চল বেশি নেই। তাঁর স্বদেশীয় সাহিত্যের বিষয়ে তিনি আশ্চর্য্য কম জানেন; কতকগুলি মাসিক পত্রিকা পড়ে তিনি প্রতি মাসে দুই চারিটি ক’রে ভাসা ভাসা জ্ঞান লাভ করেন। তিনি কল্পনা করতে পারেন না একজন ভারতীয় কী ক’রে এডুকেটেড্ হোতে পারে। এখানকার মেয়েরা শীতকালে হাত গরম রাখবার জন্তে একবকম গোলাকার লোমশ পদার্থেব মধ্যে হাত গুঁজে রাখে তাকে মফ্ বলে। প্রথম বিলেতে এসে সেই অপূর্ব পদার্থ যখন দেখি, তখন ডাক্তার ম-কে সে দ্রব্যটা কী জিজ্ঞাসা করি। আমার অজ্ঞতার তিনি আকাশ থেকে পড়লেন। এখানকার অনেক লোকের বোগ দেখেছি, তাঁরা আশা করেন, আমরা তাঁদের সমাজের প্রত্যেক ছোটো-খাটো বিষয় জানব। একদিন একটা নাচে গিয়েছিলুম, একজন মেয়ে আমাকে জিজ্ঞাসা করলেন, বধুটিকে (Bride) তোমার কী রকম লাগছে? আমি জিজ্ঞাসা করলুম, “বধুটি কে?” অতগুলি মেয়ের মধ্যে একজন নববধু কোথায় আছেন তা আমি জানতুম না। শুনে তিনি আশ্চর্য্য হয়ে গেলেন, তিনি বললেন “তার মাথায় কমলালেবুর ফুল দেখে চিনতে পাবেনি?”

দুই মিস্ ক-র সঙ্গে আলাপ হোলো। তাঁরা এখানকার পাত্রির মেয়ে। পাড়ায় পরিবারদের দেখাশুনো, রবিবারিক স্কুলের বন্দোবস্ত করা, শ্রমিকদের জন্তে টেম্পোরেল সভা স্থাপন ও তাঁদের আমোদ দেবার জন্তে সেখানে গিয়ে গান বাজনা করা,—এই সকল কাজে তাঁরা দিন রাত্রি ব্যস্ত আছেন। বিদেশী ব'লে আমাদের তাঁরা অত্যন্ত যত্ন করতেন। নগরে কোথাও আমোদ উৎসব হোলে আমাদের খবর দিতেন, আমাদের সঙ্গে ক'রে নিয়ে যেতেন, অবসর পেলে সকালে কিম্বা সন্ধ্যাবেলায় এসে আমাদের সঙ্গে গল্প করতেন, ছেলেদের নিয়ে গিয়ে মাঝে মাঝে গমন শেখাতেন, এক একদিন তাঁদের সঙ্গে রাস্তায় বেড়াতে যেতুম। এই রকম আমাদের যথেষ্ট যত্ন ও আদর করতেন। বড়ো মিস্ ক—অত্যন্ত ভালো মানুষ ও গম্ভীর। একটা কথার উত্তর দিতে কেমন খতমত খেতেন। “হাঁ—না—তা হবে—জানিনে” এই রকম তাঁর উত্তর। এক এক সময় কী বলবেন ভেবে পেতেন না, এক এক সময় একটা কথা বলতে বলতে মাঝখানে থেমে পড়তেন, আর কথা জোগাত না, কোনো বিষয়ে মত জিজ্ঞাসা করলে বিব্রত হয়ে পড়তেন। যদি জিজ্ঞাসা করা যেত, “আজ কি রুটি হবে মনে হচ্ছে?” তিনি বলতেন, “কী ক'রে বলব।” তিনি বুঝতেন না যে অপ্রাস্ত বেদবাক্য শুনতে চাচ্চিনে। তিনি আন্দাজ করতে নিতান্ত নারাজ। ছোটো মিস্ ক-র মতো প্রশান্ত প্রফুল্ল ভাব আর কারো দেখিনি। দেখে মনে হয় কোনো কালে তাঁর মনের কোনোখানে আঁচড় পড়েনি। খুব ভালো মানুষ, সর্বদাই হাসিখুসি গল্প। কাপড়চোপড়ের আড়ম্বর নেই—কোনো প্রকার ভান নেই; অত্যন্ত শাদাসিঁদে।

ডাক্তার ম-র বাড়িতে একদিন আমাদের সাক্ষা-নিমন্ত্রণ হোলো। খাওয়াই এখানকার নৈমস্তনের মূখ্য উদ্দেশ্য নয়। লোকের সঙ্গে আলাপ

পরিচয়, গান বাজনা আমোদ প্রমোদের জন্তই দশজনকে ডাকা। আমরা সকলের সময় গিয়ে হাজির হলাম। একটি ছোটো ঘরে অনেকগুলি মহিলা ও পুরুষের সমাগম হয়েছে। ঘরে প্রবেশ ক'রে কর্তা গিন্নিকে আমাদের সম্মান জানালুম। সমাগত লোকদের সঙ্গে যথাযোগ্য অভিবাদন সম্ভাষণ ও আলাপ হোলো। ঘরে জায়গার এত টানাটানি ও লোক এত বোঁশ যে চোকির অত্যন্ত অভাব হয়েছিল; অধিকাংশ পুরুষে মিলে আমরা দাঁড়িয়ে দাঁড়িয়ে গল্প জুড়ে দিয়েছিলুম। নতুন কোনো অভাগত মহিলা এলে গিন্নি কিম্বা কর্তা তাঁর সঙ্গে আমাদের আলাপ করিয়ে দিচ্চেন, আলাপ হনামাত্র তাঁর পাশে গিয়ে একবার বসছি কিম্বা দাঁড়াচ্ছি ও দুই একটা ক'রে কথাবার্তা আরম্ভ করছি। প্রায় আবহাওয়া নিয়ে কথার আরম্ভ; মহিলাটি বললেন “ড্রেডফুল ওয়েদর।” তাঁর সঙ্গে আমার নিঃসংশয়ে মতের ঐক্য হোলো। তার পরে তিনি অল্পমান করলেন যে আমাদের পক্ষে অর্থাৎ ভারতীয়দের পক্ষে এমন ওয়েদর বিশেষ ট্রায়িঙ, ও আশা করলেন আকাশ শীঘ্র পরিষ্কার হয়ে যাবে, ইত্যাদি। তার পরে এই হুত্রে নানা কথা। সভার মধ্যে দুইজন স্তম্ভবী উপস্থিত ছিলেন। বলা বাহুল্য যে, তাঁরা জানতেন তাঁরা স্তম্ভবী। এখানে সৌন্দর্যের পূজা হয়; এখানে রূপ কোনোমতে আত্মবিশ্মৃত থাকতে পারে না, রূপাভিমান স্তম্ভ থাকতে পারে না; চারদিক থেকে প্রশংসার কোলাহল তাকে জাগিয়ে তোলে। নাচঘবে রূপসীর দর অত্যন্ত চড়া; নাচে তাঁর সাহচর্য্য-সুখ পাবার জন্তে দরখাস্তের পর দরখাস্ত আসছে; তাঁর তিলমাত্র কাজ ক'রে দেবার জন্তে বহুলোক প্রস্তুত। রূপবান পুরুষদেরও যথোচিত আদর আছে। তারা এখানকার ড্রয়িঙরুমের ডার্লিঙ। আমি দেখছি, একথা শুনে তোমার এখানে আসতে লোভ হবে।

তোমার মতো সুপুরুষ এখানকার মতো রূপমুগ্ধ দেশে এলে চতুর্দিকে উঠবে .

“..... ঘন

নিশ্বাস প্রলয় বায়ু, অশ্রুবারি ধারা

আসার, ভীমুত-মদ্র হাহাকার রব—”

যা হোক নিমন্ত্রণ সভায় Miss H-দ্বয় রূপসীশ্রেষ্ঠ ছিলেন। কিন্তু তাঁরা দুজনেই কেমন চূপচাপ গম্ভীর। বড়ো যে মেশামেশি হাসিখুসি তা ছিল না। ছোটো মিস্ একটা কোচে গিয়ে হেলান দিয়ে বসলেন, আর বড়ো মিস্ দেয়ালের কাছে এক চৌকি অধিকার করলেন। আমরা দুই একজনে তাঁদের আমোদে রাখবার জন্তে নিবৃত্ত হলাম। দুর্ভাগ্যক্রমে আমি কথোপকথনশাস্ত্রে বিচক্ষণ নই, এখানে যাকে উজ্জ্বল বলে তা নই। গৃহকর্তা একজন সন্ন্যাসীত্যাগজ্ঞতাভিমানিনী প্রৌঢ়া মহিলাকে বাজাতে অনুরোধের জন্তে এতক্ষণ অপেক্ষা করছিলেন। গৃহের মহিলাদের মধ্যে তাঁর বয়স সব চেয়ে বেশি ; তিনি সব চেয়ে বেশি সাজগোজ ক’রে এসেছিলেন, তাঁর দুহাতের দশ আঙুলে যতগুলো ধবে তত আংটি ছিল। আমি যদি নিমন্ত্রণকর্তা হতুম তাহলে তাঁর আঙটির বাহুল্য দেখেই বুঝতে পারতুম যে তিনি পিয়নো বাজাবেন ব’লে বাড়ি থেকে স্থিরসংকল্প হয়ে এসেছেন। তাঁর বাজনা সাক্ষ হোলে পর গৃহকর্তা আমাকে গান গাবার জন্তে অত্যন্ত পীড়াপীড়ি আরম্ভ করলেন। আমি বড়ো মুস্থলে পড়লাম। আমি জানতুম, আমাদের দেশের গানের উপর যে তাঁদের বড়ো অনুরাগ আছে তা নয়। ভালোমানুষ হবার বিপদ এই যে নিজেকে হাশ্বকরতা থেকে বাঁচানো যায় না। তাই মিষ্টার টি—গান গাওয়ার ভূমিকা স্বরূপ দুই একটি আরম্ভ-সূচক কাশি-ধ্বনি করলেন।

সভা শাস্ত হোলো। কোনো প্রকারে কর্তব্য পালন করলুম। সভাস্থ মহিলাদের এত হাসি পেয়েছিল, যে, ভদ্রতার বাঁধ টলমল করছিল; কেউ কেউ হাসিকে কাশিব রূপান্তরে পরিণত করলেন, কেউ কেউ হাত থেকে কী যেন পড়ে গেছে ভান ক'রে ঘাড় নিচু ক'রে হাসি লুকোতে চেষ্টা করলেন, একজন কোনো উপায় না দেখে তাঁর পার্শ্বস্থ সহচরীর পিঠের পিছনে মুখ লুকলেন; যারা কতকটা শাস্ত থাকতে পেরেছিলেন, তাঁদের মধ্যে চোখে চোখে টেলিগ্রাফ চলছিল। সেই সঙ্গীত-শাস্ত বিশারদ প্রৌচাটির মুখে এমন একটু মুহু তাচ্ছিল্যের হাসি লেগে ছিল যে, সে দেখে শরীরের রক্ত জল হয়ে আসে। গান যখন সান্ত হোলো তখন আমার মুখ কান লাল হয়ে উঠেছে, চারদিক থেকে একটা প্রশংসার গুঞ্জনধ্বনি উঠল, কিন্তু অত হাসির পর আমি সেটাকে কানে তুললুম না। ছোটো মিস্ হ—আমাকে গানটা ইংরেজিতে অনুবাদ করতে অনুরোধ করলেন, আমি অনুবাদ করলুম। গানটা হচ্ছে “প্রেমের কথা আর বোলো না।” তিনি অনুবাদটা শুনে আমাকে জিজ্ঞাসা করলেন, তোমাদের দেশে প্রেমের স্বাধীনতা আছে নাকি। কতকগুলি রোমেব ভগ্নাবশেষের ফোটোগ্রাফ ছিল, সেইগুলি নিয়ে গৃহকর্ত্রী কয়েকজন অভ্যাগতকে জড়ো ক'রে দেখাতে লাগলেন। ডাক্তার ম—একটা টেলিফোন কিনে এনেছেন, সেইটি নিয়ে তিনি কতকগুলি লোকের কৌতূহল তৃপ্ত করছেন। পাশের ঘরে টেবিলে খাবার সাজানো। এক একবার গৃহকর্ত্ত্রী এসে এক একজন পুরুষের কানে কানে ব'লে যাচ্ছেন, মিস্ অথবা মিসেস অমুককে নিশিভোজনে নিয়ে যাও; তিনি গিয়ে সেই মহিলার কাছে তাঁকে খাবার ঘরে নিয়ে যাবার অনুমতি প্রার্থনা করছেন ও তাঁর বাছগ্রহণ ক'রে তাঁকে পাশের ঘরে আহ্বারস্থলে নিয়ে যাচ্ছেন। এরকম সভায় সকলে মিলে একেবারে

খেতে যায় না, তার কারণ তাহোলে আমোদ প্রমোদের স্রোত অনেকটা বন্ধ হয়ে যায়। এই রকম এক সঙ্গে পুরুষ মহিলা সকলে মিলে গান বাজনা গল্প আমোদপ্রমোদ আহারাদিতে একটা সন্ধ্যা কাটানো গেল।

এখানে মিলনের উপলক্ষ্য কত প্রকার আছে, তার সংখ্যা নেই। ডিনার, বল, conversazione, চা-সভা, lawn parties, excursions, picnic, ইত্যাদি। Thackeray বলেন, “English Society has this eminent advantage over all others—that is if there be any society left in the wretched distracted old European continent—that it is above all others a dinner-giving society.” অবসর পেলে এক সন্ধ্যা বন্ধু বান্ধবদের জুড় ক’রে আহারাদি করা ও আমোদ প্রমোদ ক’রে কাটানো এখানকার পরিবারের অবশ্য কর্তব্যের মধ্যে। ডিনর সভার বর্ণনা করতে বসা বাহুল্য। ডাক্তার মর বাড়িতে যে পার্টির কথা পূর্বে উল্লেখ করেছি, তার সঙ্গে ডিনর-পার্টির প্রভেদ কেবল দক্ষিণ হস্তের ব্যাপারে (এ স্নেহদের দেশে ভক্ষণটা আবার দক্ষিণ বাম উভয় হস্তের ব্যাপার)। আমি একবার এখানকার একটি বোট-যাত্রা ও পিকনিক পার্টিতে ছিলাম। এখানকার একটি রবিবারিক সভার সভ্যরা এই বোটযাত্রার উদযোগী। এই সভার সভ্য এবং সভ্যারা রবিবার পালনের বিরোধী। তাই তাঁরা রবিবারে একত্র হয়ে নির্দোষ আমোদ প্রমোদ করেন। এই রবিবারিক সভার সভ্য আমাদের এক বাঙালি মিত্র ম—মহাশয় আমাদের অন্তর্গত ক’রে টিকিট দেন। লণ্ডন থেকে রেলোয়ে ক’রে টেম্‌সের ধারে এক গাঁয়ে গিয়ে পৌঁছলুম। গিয়ে দেখলুম টেম্‌সে একটা প্রকাণ্ড নৌকো বাধা, আর প্রায় পঞ্চাশ ষাট জন রবিবার-বিদ্রোহী মেয়ে পুরুষে একত্র

হয়েছেন। দিনটা অন্ধকার, আকাশ মেঘাচ্ছন্ন, আর ঘাঁদের ঘাঁদের আসবার কথা ছিল, তাঁরা সকলে আসেন নি। আমার নিজের এ পাটিতে যোগ দেবার ইচ্ছে ছিল না ; কিন্তু ম—মহাশয় নাছোড়-বান্দা। আমরা অনেক ভারতবর্ষীয় একত্র হয়েছিলুম, বোধ হয় ম—মহাশয় সকলকেই স্নানরীর লোভ দেখিয়েছিলেন, কেননা সকলেই প্রায় বাহারে সাজগোজ ক'রে গিয়েছিলেন। অনেকেই গলায় লাল ফাঁসি বেঁধেছিলেন। ম—মহাশয় স্বয়ং তাঁর নেক-টাঁইয়ে একটি তলবারের আকারের পিন গুঁজে এসেছিলেন। আমাদের মধ্যে একজন তাঁকে ঠাট্টা ক'রে জিজ্ঞাসা করলেন, “দেশের সমস্ত টাইয়ে যে তলবারেব আঘাত করা হয়েছে, ওটা কি তার বাহু লক্ষণ ?” তিনি হেসে বললেন “তা নয় গো, বুকের কাছে একটা কটাঙ্কের ছুরি বিঁধেছে, ওটা তারি চিহ্ন।” দেশে থাকতে বিঁধেছিল, কি এখানে, তা কিছু বললেন না। ম—মহাশয়ের হাসি তামাসার বিরাম নেই ; সেদিন তিনি ষ্টীমারের সমস্ত লোকের সঙ্গে সমস্ত দিন ঠাট্টা ও গল্প ক'রে কাটিয়েছিলেন। একবার তিনি মহিলাদের হাত দেখে গুণতে আরম্ভ করলেন। তখন তিনি বোটস্থল্ল মেয়েদের এত প্রচুর পরিমাণে হাসিয়েছিলেন, যে, সত্যি কথা বলতে কি, তাঁর উপর আমার মনে মনে একটুখানি ঈর্ষার উদ্বেক হয়েছিল। যথাসময়ে বোট ছেড়ে দিল। নদী এত ছোটো যে, আমাদের দেশের খালের কাছাকাছি পৌঁছয়। ষ্টীমারের মধ্যে আমাদের আলাপ পরিচয় গল্প স্বল্প চলতে লাগল। একজন ইংরেজের সঙ্গে আমাদের একজন দিশি লোকের ধর্ম সঙ্ঘর্ষীয় তর্ক উঠল। আমাদের সঙ্গে একজনের আলাপ হোলো, তিনি তাঁদের ইংরেজি সাহিত্যের কথা তুললেন ; তাঁর শেলির কবিতা অত্যন্ত ভালো লাগে ; সে বিষয়ে আমার সঙ্গে তাঁর মতের মিল হোলো দেখে তিনি ভারী খুসী হলেন ;

তিনি আমাকে বিশেষ ক'রে তাঁর বাড়ি যেতে অনুরোধ করলেন। ইনি ইংরেজি সাহিত্য ও তাঁর নিজের দেশের রাজনীতি ভালো রকম ক'রে চর্চা করেছেন, কিন্তু যেই ভারতবর্ষের কথা উঠল, অমনি তাঁর অজ্ঞতা বেরিয়ে পড়ল। তিনি আমাকে জিজ্ঞাসা করলেন, “কোন রাজার অধীনে।” আমি অবাক হয়ে বললুম—“ব্রিটিশ গবর্নমেন্টের।” তিনি বললেন, “তা আমি জানি, কিন্তু আমি বলছি, কোন ভারতবর্ষীয় রাজার অব্যবহিত অধীনে।” কলকাতার বিষয়ে এ'র জ্ঞান এই রকম। তিনি অপ্রস্তুত হয়ে বললেন, “আমার অজ্ঞতা মাপ করবেন; ভারতবর্ষের বিষয়ে আমাদের ঢের জ্ঞান উচিত ছিল, কিন্তু লজ্জার সঙ্গে স্বীকার করছি আমি এ বিষয়ে খুব কম জানি।” এই রকম বোটের ছাতের উপর আমাদের কথাবার্তা চলতে লাগল; আমাদের মাথার উপরে একটা কানাতের আচ্ছাদন। মাঝে মাঝে টিপ্ টিপ্ ক'রে বৃষ্টি হচ্ছে, কানাতের আচ্ছাদনে সেটা কতকটা নিবারণ করছে। যেদিকে বৃষ্টির ছাঁট পৌঁছচ্ছে না, সেইদিকে মেয়েদের রেখে আর এক পাশে এসে ছাতা খুলে দাঁড়ালুম। দেখি আমাদের দিশি বন্ধু ক—মহাশয় সেই মেয়েদের ভিড়ের মধ্যে আশ্রয় নিয়েছেন। এই নিয়ে তাঁকে ঠাট্টা করাতে তিনি বার বার ক'রে বললেন যে, বৃষ্টি থেকে রক্ষা পাওয়া ছাড়া তাঁর অল্প অভিসন্ধি ছিল না। কিন্তু কথাটা বিশ্বাসযোগ্য নয়। যাহোক সেদিন আমরা বৃষ্টিতে তিন চার বার ক'রে ভিজেছি। এই রকম ভিজতে ভিজতে গম্যস্থানে গিয়ে পৌঁছলেম। তখন বৃষ্টি থেমে গেছে, কিন্তু আকাশে মেঘ আছে ও জমি ভিজে। মাঠে নেবে আমাদের খাওয়া দাওয়ার কথা ছিল, আকাশের ভাবগতিক দেখে তা আর হোলো না। আচারের পর আমরা নৌকো থেকে নেবে বেড়াতে বেরোলোম। কোনো কোনো প্রণয়ীযুগল একটা ছোটো নৌকো নিয়ে

দাঁড় বেয়ে চললেন, কেউ বা হাতে হাতে ধরে নিরিবিলা কানে কানে কথা কইতে কইতে মাঠে বেড়াতে লাগলেন। আমাদের সঙ্গে একজন ফোটোগ্রাফওয়াল তার ফোটোগ্রাফের সরঞ্জাম সঙ্গে ক'রে এনেছিল, আমরা সমস্ত দল মাঠে দাঁড়ালেম, আমাদের ছবি নেওয়া হোলো। সহসাম—মহাশয়ের খেয়াল গেল যে আমরা যতগুলি রুঞ্চমূর্তি আছি, একত্রে সকলের ছবি নেওয়া হবে। আমাদের মধ্যে কেউ কেউ ছিলেন, তাঁরা এ প্রস্তাবে ইতস্ততঃ করতে লাগলেন, এরকম একটা ইন্ডীডিয়স্ ডিস্টিংশন তাঁদের মনঃপূত নয়; কিন্তু ম—মহাশয় ছাড়বার পাত্র নন। অবশেষে ষ্ট্রিমার লগুন অভিমুখে ছাড়া হোলো। তখন ভগবান মরীচিমালী তাঁহার সহস্র রশ্মি সংযমন পুরঃসর অন্তাচল-চূড়াবলম্বী জলধর-পটল-শয়নে বিশ্রান্ত মস্তক বিল্বাসপূর্কক অরুণ-বর্ণ নিজ্রাতুর লোচন মুদ্রিত করিলেন; বিহগকুল স্ব স্ব নীড়ে প্রত্যাবর্তন করিল, গাতীবন্ধ হাষ্যরব করিতে করিতে গোপালের অন্তবর্তন করিয়া গোষ্ঠাভিমুখে গমন করিতে লাগিল। আমরা লগুনের অভিমুখে যাত্রা করলেম।

সপ্তম পত্র

এখানকার ধনী ফ্যাশনেবল মেয়েদের কথা একটু ব'লে নিই। তাঁদের দোরস্ত করতে হোলে দিন দুই আমাদের দিশি শাণ্ডির ও বিধবা ননদের ছাতে রাখতে হয়। তাঁরা হচ্ছেন বড়ো মাহুয়ের মেয়ে কিম্বা বড়ো মাহুয়ের স্ত্রী। তাঁদের চাকর আছে, কাজ কর্ম করতে হয় না, একজন হৌস্-কীপর আছে, সে বাড়ির সমস্ত ঘরকন্না তদারক করে,

একজন নর্স আছে, সে ছেলেদের মানুষ করে, একজন গভর্নেস্ আছেন তিনি ছেলেপিলেদের পড়াশুনো দেখেন ও অল্পাল্প নানাবিধ বিষয়ে তদারক করেন ; তবে আর পরিশ্রম করার কী রইল বলো। কেবল একটা বাকি আছে, সেটা হচ্ছে সাজসজ্জা ; কিন্তু তার জ্ঞাত তাঁর লেডীজ্ মেড্ আছে, স্ততরাং সেটাও সমস্তটা নিজের হাতে করতে হয় না। সকাল থেকে সন্ধ্য পর্যন্ত দিনটা তাঁর হাতে আস্ত পড়ে থাকে। সকাল বেলায় বিছানায় প'ড়ে, দরজা জানালা বন্ধ ক'রে সূর্যের আলোক আসতে না দিয়ে দিনটাকে কতকটা সংক্ষেপ করেন, বিছানায় শুয়ে শুয়ে ব্রেকফাস্ট্ খান ও এগারোটীর আগে শয়ন-গৃহ থেকে বেরোলে যথেষ্ট ভোরে উঠেছেন মনে করেন। তার পরে সাজসজ্জা ; সে বিষয়ে তোমাকে কোনো প্রকার খবর দিতে পারছি নে। শোনা যায় খুব সম্প্রতি বিলেতে স্নানটা ফ্যাশন হয়েছে কিন্তু এখনো এটা খুব কম দূর ব্যাপ্ত। সিমস্তিনীরা হাতের যতটুকু বেরিয়ে থাকে—মুখটি ও গলাটি—দিনের মধ্যে অনেকবার অতি যত্নে ধুয়ে থাকেন ; বাকি অঙ্গ পরিষ্কার করবার তাঁরা তত আবশ্যক দেখেন না, কেননা মনোহরণের প্রধান সিঁধ মুখটিতে কোনো প্রকার মরচে না পড়লেই হোলো। মাসে দুবার একটা স্পঞ্জবাথ্ নিলেই তাঁরা যথেষ্ট মনে করেন। আমি কোনো ইংরেজ পরিবারের মধ্যে বাস করতে গিয়েছিলাম, আমি স্নান করি শুনে তাঁরা বিপন্ন হয়েছিলেন। কোনো প্রকার স্নানের সরঞ্জাম ছিল না, সেজ্জন্তে অগভীর একটা গোল জলাধার ধার ক'রে স্নানতে হয়েছিল। বাড়িতে লোক দেখা করতে এলে তাদের সঙ্গে আলাপাচারি করা গৃহিণীর কাজ, অনেক লোক একসঙ্গে এলে তাঁর কর্তব্য হচ্ছে—তাঁর বাক্য ও হাসির অমৃত সকলকে সমানভাবে বিতরণ করা, বিশেষ কারো সঙ্গে বেশি কথা কওয়া বা বিশেষ কাউকে বেশি যত্ন করাটা উচিত নয়। এ কাজটা অত্যন্ত দুঃস্বপ্ন, বোধ হয় অনেক

অভ্যেসে দুরন্ত হয়। আমি লক্ষ্য ক'রে দেখেছি তাঁরা একজনের মুখের দিকে চেয়ে একটা কথা কন, তার পরে শেষ করেই সকলের দিকে চেয়ে একবার হাসেন, কখনো বা তাঁরা একজনের মুখের দিকে চেয়ে একটা কথা আরম্ভ করেন, তার পর বলতে বলতে এক একবার ক'রে সকলের মুখের দিকে চেয়ে নেন, কখনো বা, তাস খেলবার সময় যে রকম ক'রে চটপট তাস বিতরণ করে, তেমনি তাঁরা আগস্তকদের একে একে ক'রে একটা একটা কথার টুকরো ছড়িয়ে ছড়িয়ে দেন, এমন তাড়াতাড়ি ও এমন দক্ষতার সঙ্গে যে, তাঁদের হাতে যে অনেক কথার তাস গোছানো রয়েছে তা সহজেই বোঝা যায়। একজনকে বললেন, "Lovely morning, isn't it?" তার পরেই তাড়াতাড়ি আর একজনের মুখের দিকে চেয়ে বললেন, "কাল রাত্তিরে সঙ্গীতশালায় মাদাম্ নীলসন গান করেছিলেন, it was exquisite!" যতগুলি মহিলা ভিজিটর বসেছিলেন সকলে ঐ কথায় এক একটা বিশেষণ যোগ করতে লাগলেন; একজন বললেন "Charming," একজন বললেন "Superb," একজন বললেন "Something unearthly," আর একজন বাকী ছিলেন, তিনি বললেন "Isn't it?" আমার বোধ হয়, এ এক রকম সকালবেলা উঠে কথোপকথনের মুণ্ডর ভাঁজ। যাহোক এই রকম মাঝে মাঝে ভিজিটর আনাগোনা করছে। মুডীজ লাইব্রেরিতে তিনি চাঁদা দিয়ে থাকেন। সেখান থেকে অনবরত ক্ষণজীবী নভেলগুলো তাঁর ওখানে যাতায়াত করে। সেগুলো অনবরত গলাধঃকরণ করেন। তাছাড়া আছে ভালোবাসার অভিনয়। মিষ্টি হাসি ও মিষ্টি কথার আদান প্রদান, অলীক ছুঁতো নিয়ে একটু অলীক অভিমান, হয়তো পুরুষগণ থেকে একটু রসিকতা, অপর পক্ষে উচ্ছত ক্ষুদ্র-মুষ্টি সহযোগে স্নমধুর লাঞ্ছনা, "Oh, you naughty, wicked, provoking man!" তাতে naughty

একজন নর্স আছে, সে ছেলেদের মানুষ করে, একজন গভর্নেস্‌স্‌ আছে। তিনি ছেলেপিলেদের পড়াশুনো দেখেন ও অন্যান্য নানাবিধ বিষয়ে তদারক করেন; তবে আর পরিশ্রম করার কাঁ রইল বলা। কেবল একটা বাকি আছে, সেটা হচ্ছে সাজসজ্জা; কিন্তু তার জ্ঞান তাঁর লেডীজ্‌ মেড্‌ আছে, স্নাতরাং সেটাও সমস্তটা নিজের হাতে করতে হয় না। সকাল থেকে সন্ধ্যা পর্যন্ত দিনটা তাঁর হাতে আস্ত পড়ে থাকে। সকাল বেলায় বিছানায় পড়ে, দরজা জানালা বন্ধ করে সূর্যের আলোক আসতে না দিয়ে দিনটাকে কতকটা সংক্ষেপ করেন, বিছানায় শুয়ে শুয়ে ব্রেকফাস্ট্‌ খান ও এগারোটোর আগে শয়ন-গৃহ থেকে বেরোলে যথেষ্ট। তারে উঠেছেন মনে করেন। তার পরে সাজসজ্জা; সে বিষয়ে তোমাকে কোনো প্রকার খবর দিতে পারছি নে। শোনা যায় খুব সম্প্রতি বিলেতে স্নানটা ফ্যাশন হয়েছে কিন্তু এখনো এটা খুব কম দূর ব্যাপ্ত। সিমস্‌টিনীরা হাতের যতটুকু বেরিয়ে থাকে—মুখটি ও গলাটি—দিনের মধ্যে অনেকবার অতি যত্নে ধুয়ে থাকেন; বাকি অঙ্গ পরিষ্কার করার তাঁরা তত আবশ্যক দেখেন না, কেননা মনোহরণের প্রধান সিঁধ মুখটিতে কোনো প্রকার মরচে না পড়লেই হোলো। মাসে দুবার একটা স্পঞ্জবাথ্‌ নিলেই তাঁরা যথেষ্ট মনে করেন। আমি কোনো ইংরেজ পরিবারের মধ্যে বাস করতে গিয়েছিলাম, আমি স্নান করি শুনে তাঁরা বিপন্ন হয়েছিলেন। কোনো প্রকার স্নানের সরঞ্জাম ছিল না, সেজন্তে অগভীর একটা গোল জলাধার খার করে আনতে হয়েছিল। বাড়িতে লোক দেখা করতে এলে তাদের সঙ্গে আলাপাচারি করা গৃহিণীর কাজ, অনেক লোক একসঙ্গে এলে তাঁর কর্তব্য হচ্ছে—তাঁর বাক্য ও হাসির অমৃত সকলকে সমানভাবে বিতরণ করা, বিশেষ কারো সঙ্গে বেশি কথা কওয়া বা বিশেষ কাউকে বেশি যত্ন করাটা উচিত নয়। এ কাজটা অত্যন্ত দুঃস্বপ্ন, বোধ হয় অনেক

‘অভ্যেসে হুরস্ত হয়। আমি লক্ষ্য ক’রে দেখেছি তাঁরা একজনের মুখের দিকে চেয়ে একটা কথা কন, তার পরে শেষ করেই সকলের দিকে চেয়ে একবার হাসেন, কখনো বা তাঁরা একজনের মুখের দিকে চেয়ে একটা কথা আরম্ভ করেন, তার পর বলতে বলতে এক একবার ক’রে সকলের মুখের দিকে চেয়ে নেন, কখনো বা, তাস খেলবার সময় যে রকম ক’রে চট্‌চট্‌ তাস বিতরণ করে, তেমনি তাঁরা আগন্তুকদের একে একে ক’রে একটি একটি কথার টুকরো ছড়িয়ে ছড়িয়ে দেন, এমন তাড়াতাড়ি ও এমন দক্ষতার সঙ্গে যে, তাঁদের হাতে যে অনেক কথার তাস গোছানো রয়েছে তা সহজেই বোঝা যায়। একজনকে বললেন, “Lovely morning, isn’t it?” তার পরেই তাড়াতাড়ি আর একজনের মুখের দিকে চেয়ে বললেন, “কাল রাত্তিরে সঙ্গীতশালায় মাদাম্‌ নীলসন গান করেছিলেন, it was exquisite!” যতগুলি মহিলা ভিজিটর বসেছিলেন সকলে ঐ কথায় এক একটা বিশেষণ যোগ করতে লাগলেন; একজন বললেন “Charming,” একজন বললেন “Superb,” একজন বললেন “Something unearthly,” আর একজন বাকী ছিলেন, তিনি বললেন “Isn’t it?” আমার বোধ হয়, এ এক রকম সকালবেলা উঠে কথোপকথনের মুগ্ধর ভাঁজ। যাহোক এই রকম মাঝে মাঝে ভিজিটর আনাগোনা করছে। মৃডীজ লাইব্রেরিতে তিনি চাঁদা দিয়ে থাকেন। সেখান থেকে অনবরত ক্ষণজীবী নভেলগুলো তাঁর ওখানে যাতায়াত করে। সেগুলো অনবরত গলাধঃকরণ করেন। তাছাড়া আছে ভালোবাসার অভিনয়। মিষ্টি হাসি ও মিষ্টি কথার আদান প্রদান, অলীক ছুঁতো নিয়ে একটু অলীক অভিমান, হয়তো পুরুষপক্ষ থেকে একটু রসিকতা, অপর পক্ষে উত্তত ক্ষুদ্র-মুষ্টি সহযোগে স্তম্ভুর লাঞ্ছনা, “Oh, you naughty, wicked, provoking man!” তাতে naughty

man এর পরিপূর্ণ তৃপ্তি। এই রকম ভিজিটর অভ্যর্থনা, ভিজিট প্রত্যাৰ্পণ, নতুন নভেল-পড়া, নতুন ফ্যাশন সৃষ্টি ও নতুন ফ্যাশনের অনুবর্তন করা, এবং তার সঙ্গে মধুর রস যোগ ক'রে ফ্রুট এবং হয়তো লভ্ করা তাঁদের দিনক্রম। আমাদের দেশে যেমন ছেলেবেলা থেকে মেয়েদের বিয়ের জন্তে প্রস্তুত করে, বখেষ্ঠ লেখা পড়া শেখায় না, কেননা মেয়েদের আপিসে যেতে হবে না; এখানেও তেমনি মাঘি দরে বিকবার জন্ত মেয়েদের ছেলেবেলা থেকে পালিশ করতে থাকে, বিয়ের জন্তে যতটুকু লেখাপড়া শেখা দরকার ততটুকু বখেষ্ঠ। একটু গান গাওয়া, একটু পিয়নো বাজানো, ভালো ক'রে নাচা, খানিকটা ফরাসি ভাষা বিকৃত উচ্চারণ, একটু বোনা ও শেলাই করা জানলে একটা মেয়েকে বিয়ের দোকানের জানলায় সাজিয়ে রাখবার উপযুক্ত বংচণ্ডে পুতুল গড়ে তোলা যায়। এবিষয়ে একটা দিশি পুতুল ও একটা বিলিতি পুতুলের যতটুকু তফাৎ, আমাদের দেশের ও এদেশের মেয়েদের মধ্যে ততটুকু তফাৎ মাত্র। আমাদের দিশি মেয়েদের পিয়নো ও অছাঞ্জ টুকিটাকি শেখবার দরকার করে না, বিলিতি মেয়েদেরও অল্প স্বল্প লেখাপড়া শিখতে হয়, কিন্তু দুইই দোকানে বিক্রি হবার জন্তে তৈরি। এখানেও পুরুষেরাই হস্তী কস্তী, স্ত্রীরা তাদের অনুগতা; স্ত্রীকে আদেশ করা, স্ত্রীর মনে লাগাম লাগিয়ে নিজের ইচ্ছামতো চালিয়ে বেড়ানো স্বামীর দৃশ্য-নির্দিষ্ট অধিকার মনে করেন। ফ্যাশনী মেয়ে ছাড়া বিলেতে আরো অনেক রকম মেয়ে আছে, নইলে সংসার চলত না। মধ্যবিৎ গৃহস্থ মেয়েদের অনেকটা মেহন্নত করতে হয়, বাবুয়ানা করলে চলে না। সকালে উঠে একবার রান্নাঘর তদারক করতে হয়, সে ঘর পরিষ্কার আছে কি না, জিনিষপত্র যথা-পরিমিত আনা হয়েছে কিনা, যথাস্থানে রাখা হয়েছে কি না, ইত্যাদি

দেখাশুনা করা ; রান্না ও খাবার জিনিষ আনতে হুকুম দেওয়া, পয়সা বাঁচাবার জন্ত নানাপ্রকার গিল্পিপনার চাতুরী খেলা, কালকের মাংসের হাড়গোড় কিছু যদি অবশিষ্ট থাকে তাহোলে বন্দোবস্ত ক'রে তার থেকে আজকের সূপ চালিয়ে নেওয়া, পরশু দিনকার বাসি রাঁধা মাংস যদি খাওয়া দাওয়ার পর খানিকটা বাকি থাকে তাহোলে সেটাকে রূপান্তরিত ক'রে আজকের টেবিলে আনবার সুবিধে ক'রে দেওয়া, এই রকম নানাপ্রকার গৃহীপনা। তারপর ছেলেদের জন্ত মোজা কাপডচোপড়, এমন কি নিজেরও অনেক কাপড নিজে তৈরি করেন। এদের সকলের ভাগ্যে নভেল পড়া ঘটে ওঠে না ; বড়ো জোর খবরের কাগজ পড়েন, তাও সকলে পড়েন না দেখেছি ; অনেকের পড়াশুনার মধ্যে কেবল চিঠি পড়া ও চিঠি লেখা, দোকানদারদের বিল পড়া ও হিসাব লেখা। তাঁরা বলেন, “পলিটিক্‌স্‌ এবং অগ্নাগ্র গ্রাম্ভারি বিষয় নিয়ে পুরুষরা নাড়াচাড়া করুন ; আমাদের কর্তব্য কাজ স্বতন্ত্র।” দুর্বলতা মেয়েদের একটা গর্ভের বিষয় ; স্ততরাং অনেক মেয়ে শ্রাস্ত না হোলেও এলিধে পড়েন। বুদ্ধি বিজ্ঞার বিষয়েও এই রকম ; মেয়েরা জাঁক করে বলেন, “আমরা বাপু, ওসব বুঝি স্নঝিনে।” বিজ্ঞার অভাব, বুদ্ধির খর্কতা একটা প্রকাশ্য জাঁকের বিষয় হয়ে ওঠে। এখানকার মধ্যবিৎ শ্রেণীর মেয়েরা বিজ্ঞাচর্চার দিকে ততটা মনোযোগ দেন না, তাঁদের স্বামীরাও তার জন্ত বড়ো দুঃখিত নন, তাঁদের জীবন হচ্ছে কতক-গুলি ছোটোখাটো কাজের সমষ্টি। সন্ধ্যাবেলায় স্বামী কর্মক্ষেত্রে থেকে এলে একটি আদরের চুষন উপার্জন করেন, (পরিবার বিশেষে যে তার অগ্নথা হয় তা বলাই বাহুল্য) ঘরে তাঁর জন্তে আগুন জালানো, খাবার সাজানো আছে। সন্ধ্যাবেলায় স্ত্রী হয়তো একটা সেলাই নিয়ে বসলেন, স্বামী তাঁকে একটি নভেল টেচিয়ে পড়ে শোনাতে লাগলেন,

স্বমুখে আশ্রয় জ্বলছে, ঘরটি বেশ গরম, বাইরে পড়ছে রষ্টি, জানালা দরজাগুলি বন্ধ। হয়তো স্ত্রী পিয়নো বাজিয়ে স্বামীকে খানিকটা গান শোনালেন। এখানকার মধ্যবিৎ শ্রেণীর গিন্নিরা সাদাসিধে। যদিও তাঁরা ভালো করে লেখাপড়া শেখেননি, তবু তাঁরা অনেক বিষয় জানেন, এবং তাঁদের বুদ্ধি যথেষ্ট পরিষ্কার। এদেশে কথায় বাস্তব জ্ঞানলাভ করা যায়, তাঁরা অন্তঃপুরে বন্ধ নন, বন্ধু বান্ধবদের সঙ্গে আলাপ করেন, আত্মীয় সভায় একটা কোনো উচ্চ বিষয় নিয়ে চর্চা হোলে তাঁরা শোনেন ও নিজের বক্তব্য বলতে পারেন, বুদ্ধিমান ব্যক্তির একটা বিষয়ের কতদিক দেখেন ও কী রকম চক্ষে দেখেন, তা বুঝতে পারেন। স্বতরাং একটা কথা উঠলে, কতকগুলো ছেলেমানুষী আকাশ-থেকে-পড়া প্রশ্ন জিজ্ঞাসা করেন না ও তাঁকে হাঁ করে থাকতে হয় না। বন্ধু বান্ধবদের সঙ্গে খুব সহজভাবে গল্পস্বল্প করতে পারেন, নিমন্ত্রণ সভায় মুখ ভাব করে বা লজ্জায় অবসন্ন হয়ে থাকেন না, পরিচিতদের সঙ্গে অগ্রায় ধেমালি নেই, কিম্বা তাদের কাছ থেকে নিতান্ত অসামাজিক ভাবে দূরেও থাকেন না। লোক-সমাজে মুখটি খুব হাসিখুঁসি, প্রসন্ন; যদিও নিজে খুব রসিক নন, কিন্তু হাসি তামাসা বেশ উপভোগ করতে পারেন, একটা কিছু ভালো লাগলে মন খুলে প্রশংসা করেন, একটা কিছু মজার কথা শুনলে প্রাণ খুলে হাস্য করেন।

আমি দিন কতক আমার শিক্ষকের পরিবারের মধ্যে বাস করেছিলুম। সে বড়ো অদ্ভুত পরিবাব। মিষ্টার ব—মধ্যবিত্ত লোক। তিনি ল্যাটিন ও গ্রীক খুব ভালো রকম জানেন। তাঁর ছেলে পিলে কেউ নেই,—তিনি, তাঁর স্ত্রী, আমি, আর একজন দাসী এই চার জন মাত্র একটা বাড়িতে থাকতুম। কর্তা আধবুড়ো লোক, অত্যন্ত অন্ধকার মূর্তি, দিন রাত খুঁৎ-খুঁৎ থিটখিট করেন, নিচের তলায় রান্নাঘরের পাশে একটা ছোট

জানালাওয়ালা দরজা বন্ধ অন্ধকার ঘরে থাকেন। একে তো সূর্য্যকিরণ সে ঘরে সহজেই প্রবেশ করতে পারে না, তাতে জানালার উপরে একটা পর্দা ফেলা, চারদিকে পুরোনো ছেঁড়া ধুলোমাখা নানাপ্রকার আকারের ভীষণদর্শন গ্রীক ল্যাটিন বইয়ে দেয়াল ঢাকা, ঘরে প্রবেশ করলে এক রকম বন্ধ হাওয়ায় হাঁপিয়ে উঠতে হয়। এই ঘরটা হচ্ছে তাঁর ষ্টাডি এইখানে তিনি পড়েন ও পড়ান। তাঁর মুখ সর্ব্বদাই বিরক্ত, জাঁট বুট জুতো পরতে বিলম্ব হচ্ছে, বুট জুতোর উপর চটে ওঠেন; যেতে যেতে দেয়ালের পেরেকের তাঁর পকেটে আটকে যায়, বেগে ভুরু কঁকড়ে ঠোঁট নাড়তে থাকেন। তিনি যেমন খুঁৎখুঁতে মানুষ, তাঁর পক্ষে তেমনি খুঁৎখুঁতের কারণ প্রাতি পদে জোটে। আসতে যেতে হাঁচট খান, অনেক টানাটানিতে তাঁর দেয়াজ খোলে না, যদি বা খোলে, তবু যে জিনিষ খুঁজছিলেন তা পান না। এক একদিন সকালে তাঁর ষ্টাডিতে এসে দেখি, তিনি অকারণে বসে বসে দ্রুত করে উঁ-জাঁ করছেন, ঘরে একটি লোক নেই। কিন্তু ব—আসলে ভালো মানুষ; তিনি খুঁৎ-খুঁতে বটে, রাগী নন, খিট খিট করেন কিন্তু ঝগড়া করেন না। নিদেন তিনি মানুষের উপর রাগ প্রকাশ করেন না, টাইনি বলে তাঁর একটা কুকুর আছে, তার উপরেই তাঁর আক্রোশ। সে একটু নড়লে চড়লে তাকে ধমকাতে থাকেন, আব দিন রাত তাকে লাথিয়ে লাথিয়ে একাকার করেন। ঠাঁকে আমি প্রায় হাসতে দেখিনি। তাঁর কাপড় চোপড় ছেঁড়া অপরিষ্কার। মানুষটা এই রকম। তিনি এককালে পাদ্রি ছিলেন; আমি নিশ্চয় বলতে পারি, প্রাতি রবিবারে তাঁর বক্তৃতায় তিনি শ্রোতাদের নরকের বিভীষিকা দেখাতেন। তাঁর এত কাজের ভিড়, এত লোককে পড়াতে হোত যে, এক একদিন তিনি ডিনর খেতে অবকাশ পেতেন না। এক একদিন তিনি বিছানা থেকে উঠে অবধি রাত্রি এগারোটা পর্যন্ত কাজে ব্যস্ত

খাকতেন। এমন অবস্থায় পিটখিটে হয়ে ওঠা কিছু আশ্চর্য নয়। গৃহিণী খুব ভালো মানুষ, রাগী উদ্ধত নন, এককালে বোধ হয় ভালো দেখতে ছিলেন, যত বয়স, তার চেয়ে তাঁকে বড়ো দেখায়, চোখে চসমা, সাজগোজের বড়ো আড়ম্বর নেই। নিজের রাঁধেন, বাড়ির কাজকর্ম করেন, ছেলেরপিলে নেই, স্তবরাং কাজকর্ম বড়ো বেশি নয়। আমাকে খুব যত্ন করতেন। খুব অল্প দিনেতেই বোঝা যায় যে, দম্পতির মধ্যে বড়ো ভালোবাসা নেই, কিন্তু তাই বলে যে, দুজনের মধ্যে খুব বিরোধ ঘটে তাও নয়, অনেকটা নিঃশব্দে সংসার চলে যাচ্ছে। মিসেস ব—কখনো স্বামীর ষ্টাডিতে যান না; সমস্ত দিনের মধ্যে খাবার সময় ছাড়া দুজনের মধ্যে দেখা শুনা হয় না, খাবার সময়ে দুজনে চুপ চাপ বসে থাকেন। খেতে খেতে আমার সঙ্গে গল্প করেন, কিন্তু দুজনে পরস্পর গল্প করেন না। ব-র আলুর দরকার হয়েছে, তিনি চাপা গলায় মিসেসকে বললেন, “Some potatoes” (please কথাটা বললেন না কিম্বা শোনা গেল না)। মিসেস ব—বলে উঠলেন “I wish you were a little more polite”। ব—বললেন “I did say ‘please’”; মিসেস ব—বললেন “I did not hear it.”; ব—বললেন “It was no fault of mine”। এইখানেই দুই পক্ষ চুপ করে রইলেন। মাঝে থেকে আমি অত্যন্ত অপ্রস্তুতে পড়ে যেতেম। একদিন আমি ডিনরে যেতে একটু দেরি করেছিলেম, গিয়ে দেখি, মিসেস ব ব-কে ধমকাচ্ছেন, অপরাধের মধ্যে তিনি মাংসের সঙ্গে একটু বেশি আলু নিয়েছিলেন। আমাকে দেখে মিসেস ক্ষান্ত হলেন, মিষ্টর সাহস পেয়ে শোধ তোলবার জন্তে দ্বিগুণ করে আলু নিতে লাগলেন, মিসেস তাঁর দিকে নীরুপায় মর্ম্মভেদী কটাক্ষপাত করলেন। দুই পক্ষই দুই পক্ষকে যথারীতি ডিয়র ডার্লিঙ বলে ভুলেও সম্বোধন করেন না, কিম্বা কারো ক্রিশ্চন নাম ধরে

ডাকেন না, পরস্পর পরস্পরকে মিষ্টর ব—ও মিসেস ব—ব'লে ডাকেন। আমার সঙ্গে মিসেস হয়তো বেশ কথাবার্তা কচ্চেন, এমন সময় মিষ্টর এলেন, অমনি সমস্ত চূপচাপ। দুই পক্ষেই এই রকম। একদিন মিসেস আমাকে পিয়নো শোনাচ্চেন, এমন সময় মিষ্টর এসে উপস্থিত ; বললেন, “When are you going to stop ?”

মিসেস বললেন “I thought you had gone out.” পিয়নো থামল। তারপরে আমি যখন পিয়নো গুনতে চাইতেম মিসেস বলতেন, “that horrid man যখন বাডিতে না থাকবেন তখন শোনাব,” আমি ভারি অপ্রস্তুতে পড়ে যেতুম। দুজনে এই রকম অমিল অথচ সংসার বেশ চলে যাচ্ছে। মিসেস রাঁধছেন বাড়ছেন কাজকর্ম করছেন, মিষ্টর রোজগার করে টাকা এনে দিচ্ছেন ; দুজনে কখনো প্রকৃত ঝগড়া হয় না, কেবল কখনো কখনো দুই একবাব দুই একটা কথা-কাটাকাটি হয়, তা এত মৃদুস্বরে যে, পাশের ঘরের লোকের কানে পর্য্যন্ত পৌঁছয় না। যাহোক আমি সেখানে দিনকতক থেকে বিব্রত হয়ে সে অশান্তির মধ্যে থেকে চলে এসে বেঁচেছি।

অষ্টম পত্র

আমরা এখন লণ্ডন ত্যাগ করে এসেছি। লণ্ডনের জনসমুদ্রে জোয়ারভাঁটা খেলে তা জানো। বসন্তের আরম্ভ থেকে গরমির কিছুদিন পর্য্যন্ত লণ্ডনের জোয়ার ঋতু। এই সময়ে লণ্ডন উৎসবে পূর্ণ থাকে, —ধিয়েটর, নাচ, গান, প্রকাশ্য ও পারিবারিক “বল,” আমোদ-প্রমোদে

ষৈসাৰ্ষেসি ঠৈসাঠেসি। ধনী লোকদের বিলাসিনী মেয়েরা রাতকে দিন ক'রে তোলে। আজ তাদের মাচে নেমস্তন্ন, কাল ডিনরে, পরশু থিয়েটার, তরশু রান্তিরে মমজাম প্যাটির গান, দিনের চেয়ে রান্তিরের ব্যস্ততা বেশি। স্কুমারী মহিলা, ষাদের তিলমাত্র শ্রম লাঘবের জন্ত শত শত ভক্ত সেবকের দল দিনরাত্রি প্রাণপণ করছেন,—চৌকিটা সরিয়ে দেওয়া, প্লেটটা এগিয়ে দেওয়া, দরজাটা খুলে দেওয়া, মাংসটা কেটে দেওয়া, পাখাটা কুড়িয়ে দেওয়া ইত্যাদি, তাঁরা রান্তিরের পর রান্তির নটা থেকে ভোর চারটে পর্যন্ত গ্যাসের ও মালুয়ের নিশ্বাসে গরম ঘরের মধ্যে অবিশ্রাস্ত নৃত্যে রত; সে আবার আমাদেব দেশের অলস নড়ে চড়ে বেড়ানো বাইনাচের মতো নয়, অনবরত যুবপাক। ললিতা রমণীরা কী করে টিকে থাকেন, আমি তাই ভাবি। এই তো গেল আমোদ-প্রমোদ, তাছাড়া এই সময়ে পার্লামেন্টের অধিবেশন। ব্যাণ্ডের একতান স্বর, নাচের পদশব্দ, ডিনর টেবিলের হাওয়ালাপ-ধ্বনির সঙ্গে সঙ্গে সর্বত্র একটা পোলিটিকাল উত্তেজনা। স্থিতিশীল ও গতিশীল দলভুক্তরা প্রতি রাত্রেই পার্লামেন্টেব রাজনৈতিক মন্তব্যের বিবরণ কী আগ্রহের সঙ্গে আলোচনা করতে থাকে। সীজনের সময় লণ্ডনে এই রকম আলোড়ন। তার পরে আবার ভাঁটা পড়তে আরম্ভ হয়, লণ্ডনের ক্লমপক্ষ আসে। তখন আমোদ কোলাহল বন্ধ হয়ে যায়, বাকি থাকে অল্প স্বল্প লোক, যাদেব শক্তি নেই বা দরকার আছে, বা বাইরে যাবার ইচ্ছে নেই। সেই সময়ে লণ্ডন থেকে চলে যাওয়া একটা ফ্যাশন। আমি একটা বইয়ে ("Sketches and Travels in London"—Thackeray) পড়েছিলাম, এই সময়টাতে অনেকে যারা নগরে থাকে তারা বাড়ির সম্মুখে দরজা জানলা সব বন্ধ ক'রে বাড়ির পিছনদিকের ঘরে লুকিয়ে চুরিয়ে বাস কবে।

দেখাতে চায় তারা লগুন ছেড়ে চলে গেছে। সাউথ কেনসিংটন বাগানে যাও ; ফিতে, টুপি, পালক, রেশম, পশম ও গাল-রঙ-করা মুখের সমষ্টি চোক ঝলসে প্রজ্ঞাপতির ঝাঁকের মতো বাগান আলো ক'রে বেড়াচ্ছে না ; বাগান তেমনি সবুজ আছে, সেখানে তেমনি ফুল ফুটেছে, কিন্তু তার সজীব শ্রী নেই। গাড়ি ঘোড়া লোকজনের হিজিবিজি ঘুচে গিয়ে লগুনটা পরিষ্কার হয়ে গেছে।

সম্প্রতি লগুনের সীজন অতীত, আমরাও লগুন ছেড়ে টনব্রিজ ওয়েলস্ ব'লে একটা আধা পাড়ার্গেয়ে জায়গায় এসেছি। অনেক দিনের পর হালকা বাতাস খেয়ে ঝাঁচা গেল। হাজার হাজার চিমনি থেকে অবিশ্রান্ত পাণুরে কয়লার ধোঁয়া ও কয়লার গুঁড়ো উড়ে উড়ে লগুনের হাড়ে হাড়ে প্রবেশ করেছে। রাস্তায় বেরিয়ে এসে হাত ধুলে সে হাত-ধোয়া জলে বোধ করি কালির কাজ করা যায়। নিশ্বাসের সঙ্গে অবিশ্রান্ত কয়লার গুঁড়ো টেনে মগজটা বোধ হয় অত্যন্ত দাছ পদার্থ হয়ে দাঁড়ায়। টনব্রিজ ওয়েলস্ অনেকদিন থেকে তার লৌহ পদার্থ মিশ্রিত উৎসের জন্তে বিখ্যাত। এই উৎসের জল খাবার জন্তে এখানে অনেক যাত্রীর সমাগম হয়। উৎস শুনেই আমরা কল্পনা করলেম—না জানি কী সুন্দর দৃশ্য হবে ;—চারিদিকে পাহাড়, পর্বত, গাছপালা, সারস-মরালকুলকৃষ্ণিত, কমল-কুমুদ-কফ্লার বিকশিত সরোবর, কোকিল-কৃজন, মলয়-বীজন, ভ্রমর-গুঞ্জন ও অবশেষে এই মনোরম স্থানে পঞ্চশরের প্রহার ও এক ঘটি জল খেয়ে বাড়ি ফিরে আস। গিয়ে দেখি, একটা হাটের মধ্যে একটা ছোটো গর্ত পাথর দিয়ে ঝাঁধানো, সেখানে একটু একটু ক'রে জল উঠছে, একটা বৃড়ি কাঁচের গেলাস হাতে দাঁড়িয়ে। এক এক পেনি নিয়ে এক এক গেলাস জল বিতরণ করছে ও অবসর মতো একটা খবরের কাগজে গত রাত্তরের

পার্লামেন্টের সংবাদ পড়ছে। চারদিকে দোকান বাজার; গাছপালার কোনো সম্পর্ক নেই; সম্মুখেই একটা কশাইয়ের দোকান, সেখানে নানা চতুস্পদেরও “হংস মরাল কুলের” ডানা ছাড়ানো মৃত দেহ দড়িতে ঝুলছে; এই সব দেখে আমার মন এমন চটে উঠল যে, কোনো মতে বিশ্বাস হোলো না যে, এ জলে কোনো প্রকার রোগ নিবারণ বা শরীরের উন্নতি হোতে পারে।

টনব্রিজ ওয়েলস সহরটা খুব ছোটো, দু পা বেরোলেই গাছপালা মাঠ দেখতে পাওয়া যায়। বাড়িগুলো লণ্ডনের মতো থাম-বারান্দা-শূণ্য, ঢালু-ছাত-ওয়াল সারি সারি একঘেয়ে ভাবে দাঁড়িয়ে; অত্যন্ত শ্রীহীন দেখতে। দোকানগুলো তেমনি স্তব্ধ, পরিপাটি, কাঁচের জানলা দেওয়া। কাঁচের ভিতর থেকে সাজানো পণ্য দ্রব্য দেখা যাচ্ছে; কশাইয়ের দোকানে কোনো প্রকার কাঁচের আবরণ নেই, চতুস্পদের আস্ত আস্ত পা ঝুলছে,—ভেড়া, গরু, গুওর, বাছুরের নানা অঙ্গ প্রত্যঙ্গ নানা প্রকার ভাবে চোখের সামনে টাঙিয়ে রাখা, হাঁস প্রভৃতি নানা প্রকার মরা পাখী লম্বা লম্বা গলাগুলো নিচের দিকে ঝুলিয়ে আছে, আঁখুব একটা জোয়ান পেট মোটা ব্যক্তি হাতে একটা প্রকাণ্ড ছুরি নিয়ে কোমরে একটা আঁচলা ঝুলিয়ে দরজার কাছে দাঁড়িয়ে।

বিলেতের ভেড়া গরুগুলো তাদের মোটামোটা মাংস চর্কিওয়াল শরীরের ও স্তন্যদেহের জন্ত বিখ্যাত, যদি কোনো মানুষ-খেগো সভ্য জাত থাকত, তাহোলে বোধ হয় বিলেতের কশাইগুলো তাদের হাতে অত্যন্ত মাৰ্ঘি দামে বিকোত। একজন মেমসাহেব বলেন যে, কশাইয়ের দোকান দেখলে তাঁর অত্যন্ত তৃপ্তি হয়; মনে আশ্বাস হয়, দেশে আহারের অপ্রতুল নেই, দেশের পেট ভরাবার মতো খাবার প্রচুর আছে, দুভিক্ষের কোনো সম্ভাবনা

নেই। ইংরেজদের খাবার টেবিলে যে রকম আকারে মাংস এনে দেওয়া হয়, সেটা আমার কাছে দুঃখজনক। কেটে কুটে মসলা দিয়ে মাংস তৈরি ক'রে আনলে এক রকম ভুলে যাওয়া যায় যে, একটা সত্যিকার জন্তু খেতে বসেছি; কিন্তু মুখ পা বিশিষ্ট আস্ত প্রাণীকে অবিকৃত আকারে টেবিলে এনে দিলে একটা মৃত দেহ দেখতে বসেছি ব'লে গা কেমন করতে থাকে।

নাপিতের দোকানের জানলায় নানা প্রকার কাঠের মাথায় নানা প্রকার কোঁকড়ানো পরচুলো বসানো রয়েছে, দাড়ি গোঁফ ঝুলছে, মার্কামারা শিশিতে টাক-নাশক চুল-উঠে-যাওয়া-নিবারক অব্যর্থ ওষুধ রয়েছে; দীর্ঘকেশী মহিলারা এই দোকানে গেলে সেবকেরা (সেবিকা নয়) তাঁদের মাথা ধুয়ে দেবে, চুল বেঁধে দেবে, চুল কুঁকড়ে দেবে। এখানে মদের দোকানগুলোই সব চেয়ে জমকালো, সন্ধ্যার সময় সেগুলো আলোয় আকর্ষণ হয়ে যায়, বাড়িগুলো প্রকাণ্ড নয়, ভিতরটা খুব বড়ো ও সাজানো, খদ্দেরের ঝাঁক দোকানের বাইরে ও ভিতরে সর্বদাই, বিশেষতঃ সন্ধ্যা বেলায় লেগে থাকে। দরজির দোকানও মন্দ নয়। নানা ফেশানের সাজসজ্জা কাঁচের জানলার ভিতর থেকে দেখা যাচ্ছে, বড়ো বড়ো কাঠের মূর্তিকে কাপড় পরিয়ে সাজিয়ে রাখা হয়েছে; মেয়েদের কাপড়চোপড় একদিকে ঝোলানো; এই খানে কত লুক্ক নেত্র দিনরাত্রি তাকিয়ে আছে তার সংখ্যা নেই; এখানকার বিলাসিনীরা, যাদের নতুন ফেশানের দামি কাপড় কেনবার টাকা নেই, তারা দোকানে এসে কাপড়গুলো ভালো ক'রে দেখে যায়, তার পরে বাড়িতে গিয়ে সস্তায় নিজের হাতে তৈরি করে।

আমাদের বাড়ির কাছে একটা খোলা পাহাড়ে জায়গা আছে; সেটা কমন্বার্থ্য সরকারী জায়গা; চারিদিক খোলা, বড়ো গাছ খুব অল্প; ছোটো ছোটো গুল্মের ঝোপ ও ঘাসে পূর্ণ, চারিদিক সবুজ,

বিচিত্র গাছপালা নেই ব'লে কেমন ধূ ধূ করছে, কেমন বিধবার মতো চেহারা। উঁচু নিচু জমি, কাঁটাগাছের ঝোপঝাপ, জায়গাটা আমার খুব ভালো লাগে; মাঝে মাঝে এই রকম কাঁটা খোঁচা এষড়ো খেবড়োর মধ্যে এক এক জায়গায় ছোটো ছোটো ব্লু-বেলস নামক ছোটো ছোটো ফুল ঘেঁসাঘেঁসি ফুটে সবুজের মধ্যে স্তুপাকার নীল রং ছড়িয়ে রেখেছে, কোথাও বা ঘাসের মধ্যে রাশ রাশ সাদা ডেজি ও হল্‌দে বাটার-কপ অজস্র সৌন্দর্য্যে প্রকাশিত। ঝোপঝাপের মাঝে মাঝে এবং গাছের তলায় এক একটা বেঞ্চি পাতা। এইটে সাধারণের বেড়াবার জায়গা। এখানে মাগুয় এত অল্প ও জায়গা এত বেশি, যে ঘেঁসাঘেঁসি নেই। লণ্ডনের বড়ো বড়ো বেড়াবার বাগানের মতো চারদিকেই ছাতা-হস্তক, টুপি-মস্তক, চোক-ধাঁধক ভিড়ের আনাগোনা নেই; দূর দূর বেঞ্চির মধ্যে নিরীলা যুগলমুষ্টি রোদ্দুরে এক ছাতার ছায়ায় আসীন; কিম্বা তারা হাত ধরাধরি করে নিরিবিলি বেড়াচ্ছে। সবসুদ্ধ জড়িয়ে জায়গাটা উপভোগ্য। এখনো গরমিকাল শেষ হয়নি। এখানে গরমিকালে সকাল ও সন্ধ্যা অত্যন্ত সুন্দর। গরমির পূর্ণ যৌবনের সময় রাত দুটো তিনটোর পরে আলো দেখা দিতে আরম্ভ করে, চারটোর সময় রোদ্দুর ঝাঁ ঝাঁ করতে থাকে ও রাত্রি নটা দশটার আগে দিনের আলো নেভে না। আমি একদিন পাঁচটার সময় উঠে কমন-এ বেড়াতে গিয়েছিলুম। পাহাড়ের উপর একটা গাছের তলায় গিয়ে বসলুম, দূরে ছবির মতো ঘুমন্ত সহর, একটুও কুয়াসা নেই। নির্জ্বল রাস্তাগুলি, গির্জের উন্নত চূড়া, রৌদ্ররঞ্জিত বাড়িগুলি নীল আকাশের পটে যেন একটি কাঠে খোদাই করা ছবির মতো ঝাঁকা। আসলে এই সহরটা কিছুই ভালো দেখতে নয়; এখানকার বাড়িগুলোতে জানলা-কাটা-কাটা চারটে দেয়াল, একটা টালু ছাত ও তার উপরে ধোঁয়া বেরোবার কতকগুলি

কুশ্রী নল। ক্রমে ক্রমে যতই বেলা হোতে লাগল শত শত চিমনি থেকে অমনি ধোঁয়া বেরোতে লাগল, ধোঁয়াতে ক্রমে সহরটা অস্পষ্ট হয়ে এল, রাস্তায় ক্রমে মাহুম দেখা দিল, গাড়ি ঘোড়া ছুটতে আরম্ভ হোলো, হাতগাড়ি কিম্বা ঘোড়ার গাড়িতে ক'রে দোকানীরা মাংস রুটি তরকারী বাড়ি বাড়ি বিতরণ ক'রে বেড়াতে লাগল, (এখানে দোকানীরা বাড়িতে বাড়িতে জিনিষপত্র দিয়ে আসে) ক্রমে কমন-এ লোক জমতে লুরু হোলো, আমি বাড়ি ফিরে এলেম।

এখানে আমার একটি সখের বেড়াবার জায়গা আছে। গাড়ির চাকার দাগে এবড়ো খেবড়ো উঁচু নিচু পাহাড়ে রাস্তা, দুধারে ব্লাকবেরি ও ঘন লতা শুষ্কের বেড়া, বড়ো বড়ো গাছে ছায়া ক'রে আছে, রাস্তার আশে পাশে ঘাস ও ঘাসের মধ্যে ডেইজি প্রভৃতি বুনো ফুল। শ্রমজীবীরা ধুলো-কাদা-মাথানো ময়লা কোট প্যান্টলুন ও ময়লা মুগ নিয়ে আনাগোনা করছে, ছোটো ছোটো ছেলে মেয়ে লাল লাল ফুলো ফুলো মুখে বাড়ির দরজার বাইরে কিম্বা রাস্তায় খেলা করছে, এমন মোটাসোটা গোলগাল ছেলে কোনো দেশে দেখিনি। এক একটা বাড়ির কাছে ছোটো ছোটো পুকুরের মতো, সেখানে পোষা হাঁসগুলো ভাসছে। মাঠগুলো ঘসিও পাহাড়ে উঁচু নিচু, কিন্তু চন্দা জমি সমতল ও পরিষ্কার। ঘাসগুলো অত্যন্ত সবুজ ও তাজা, এখানে রোজ তীব্র নয় ব'লে ঘাসের রং আমাদের দেশের মতন জলে যায় না, তাই এখানকার মাঠের দিকে চেয়ে থাকতে অত্যন্ত ভালো লাগে, অজস্র স্নিগ্ধ সবুজ রঙে চোখ ঘেন ডুবে যায়। মাঝে মাঝে বড়ো বড়ো গাছ ও শাদা শাদা বাড়িগুলো দূর থেকে ছোটো ছোটো দেখাচ্ছে। এই রকম শূন্য মাঠ ছাড়িয়ে অনেক দূরে এসে এক একটা প্রকাণ্ড পাইন গাছের অরণ্য পাওয়া যায়, ঝেঁসেঝেঁসি গাছে অনেক দূর জুড়ে অক্ষকার, খুব গম্ভীর, খুব নিস্তরক।

দ্বিতীয় পত্র

গরমি কাল। হৃন্দর স্বর্ষ্য উঠেছে। এখন দুপুর দুটো বাজে। আমাদের দেশের শীতকালের দুপুর বেলাকার বাতাসের মতো বেশ একটি মিষ্টি হাওয়া, রোদ্দুরে চার দিক ঝাঁ ঝাঁ করছে। এমন ভালো লাগছে, আর এমন একটু কেমন উদাস ভাব মনে আসছে যে কী বলব।

আমরা এখন ডেভনশায়রের অন্তর্গত টর্কী ব'লে এক নগরে আছি। সমুদ্রের ধারে। চার দিকে পাহাড়। অতি পরিষ্কার দিন। মেঘ নেই, কুয়াশা নেই, অন্ধকার নেই; চারিদিকে গাছপালা, চারিদিকে পাখী ডাকছে, ফুল ফুটছে। যখন টনত্রিজ ওয়েলসে ছিলুম, তখন ভাবতুম, এখানে যদি মদন থাকে, তবে অনেক বন বাদাড, ঝোপ ঝাপ, কাঁটা গাছ হাতড়ে ছুচারটে বুনো ফুল নিয়েই কোনোমতে তাকে ফুলশর বানাতে হয়। কিন্তু টর্কিতে মদন যদি গ্যাটলিং কামানের মতো এমন একটা বাণ উদ্ভাবন করে থাকে, যার থেকে প্রতি মিনিটে হাজারটা ক'রে তীর ছোঁড়া যায়, আর সেই বাণ দিনরাত যদি কাজে ব্যস্ত থাকে, তবে মদনের ফুলশরের তহবিল এখানে দেউলে হবার কোনো সম্ভাবনা নেই, এত ফুল। যেখানে সেখানে, পথে ঘাটে, ফুল মাড়িয়ে চলতে হয়। আমরা রোজ পাহাড়ে বেড়াতে যাই। গরু চরছে, ভেড়া চরছে; এক এক জায়গায় রাস্তা এত ঢালু যে, উঠতে নাবতে কষ্ট হয়। এক এক জায়গায় খুব সঙ্কীর্ণ পথ, দুধারে গাছ উঠেছে আঁধার করে ওঠবার সুবিধের জন্তে ভাঙা ভাঙা সিঁড়ির মতন আছে, পথের মধ্যেই লতা গুল্ম উঠেছে। চার দিকে মধুর রোদ্দুর। এখানকার বাতাস বেশ গরম। ভারতবর্ষ মনে পড়ে।

এইটুকু গরমেই লগুনের প্রাণীদের চেয়ে এখানকার জীবজন্তুদের কত নিষ্কর্ষিত ভাব প্রত্যক্ষ করা যায়। ঘোড়াগুলো আস্তে আস্তে যাচ্ছে, মানুষগুলোর তেমন ভারি ব্যস্ত ভাব নেই, গড়িমসি ক'রে চলেছে।

এখানকার সমুদ্রের ধার আমার বড়ো ভালো লাগে। যখন জোয়ার আসে, তখন সমুদ্রতীরের খুব প্রকাণ্ড পাথরগুলো জলে ডুবে যায়, তাদের মাথা বেরিয়ে থাকে। ছোটো ছোটো দ্বীপের মতো দেখায়। জলের ধারেই ছোটো-বড়ো কত পাহাড়। চেউ লেগে লেগে পাহাড়ের নিচে গুহা তৈরি হয়ে গেছে; যখন ভাঁটা পড়ে যায়, তখন আমরা এক এক দিন এই গুহার মধ্যে গিয়ে ব'সে থাকি। গুহার মধ্যে জায়গায় জায়গায় অতি পরিষ্কার একটু একটু জল জমে রয়েছে, ইতস্ততঃ সমুদ্র-শৈবাল জমে আছে, সমুদ্রের একটা স্বাস্থ্যজনক গন্ধ পাওয়া যাচ্ছে, চারদিকে পাথর ছড়ানো। আমরা সবাই মিলে এক এক দিন সেই পাথরগুলো ঠেলাঠেলি ক'রে নড়াবার চেষ্টা করি, নানা শামুক বিহুক কুড়িয়ে নিয়ে আসি। এক একটা পাহাড় সমুদ্রের জলের উপর খুব বুঁকে পড়েছে; আমরা প্রাণপণ ক'রে এক এক দিন সেই অতি দুর্গম পাহাড়গুলোর উপর উঠে ব'সে নিচে সমুদ্রের চেউয়ের ওঠাপড়া দেখি। হ হ শব্দ উঠছে, ছোটো ছোটো নৌকো পাল তুলে চলে যাচ্ছে, চারদিকে রোদ্দুর, মাথার উপর ছাতা খোলা, পাথরের উপর মাথা দিয়ে আমরা শুয়ে শুয়ে গল্প করছি। আলস্তে কাল কাটাবার এমন জায়গা আর কোথায় পাব? এক এক দিন পাহাড়ে যাই, আর পাথর-দিয়ে ঘেরা ঝোপঝাপে-ঢাকা একটি প্রচ্ছন্ন জায়গা দেখলে সেই খাদটিতে গিয়ে বই নিয়ে পড়তে বসি।

দশম পত্রে

ক্রিষ্ট মাস ফুরল, আবার দেখতে দেখতে আর একটা উৎসব এসে পড়ল। আজ নূতন বর্ষের প্রথম দিন। কিন্তু তার জন্তে কিছুই গোলমাল দেখতে পাচ্চিনে। নূতন বৎসর যে এখানে এমন নিঃশব্দ পদসঞ্চারে আসবে তা জানতেম না। শুনেছি ফ্রান্সে লোকে নতুন বৎসরকে খুব সমাদরের সঙ্গে আবাহন করে। কাল পুরাতন বৎসরের শেষ রাত্রে আমাদের প্রতিবেশীরা বাড়ির জানলা খুলে রেখেছিল। পাছে পুরোনো বৎসর ঘরের মধ্যে আটকা পড়ে থাকে, পাছে নতুন বৎসর এসে জানলার কাছে রুথা ঘুরে ঘুরে বেড়ায়।

টর্কি থেকে বহুদিন হোলো আমরা আবার লণ্ডনে এসেছি। এখন আমি ক-র পরিবারের মধ্যে বাস করি। তিনি, তাঁর স্ত্রী, তাঁদের চার মেয়ে, দুই ছেলে, তিন দাসী, অমি ও টেবি ব'লে এক কুকুর নিয়ে এই বাড়ির জনসংখ্যা। মিষ্টর ক—একজন ডাক্তার। তাঁর মাথার চুল ও দাঁড়ি প্রায় সমস্ত পাকা। বেশ বলিষ্ঠ ও স্ত্রী দেখতে। অমায়িক স্বভাব, অমায়িক মুখশ্রী। মিসেস্ ক—আমাকে আন্তরিক যত্ন করেন। শীতের সময় আমি বিশেষ গরম কাপড় না পরলে তাঁর কাছে ভৎসনা খাই। খাবার সময় যদি তাঁর মনে হয়, আমি কম ক'রে খেয়েছি, তাহলে যতক্ষণ না তাঁর মনের মতো খাই, ততক্ষণ পীড়াপীড়ি করেন। বিলেতে লোকে কাশিকে ভয় করে; যদি দৈবাৎ আমি দিনের মধ্যে দুবার কেশেছি তা হোলোই, তিনি জোর ক'রে আমার স্নান বন্ধ করান, আমাকে দশ রকম ওষুধ গেলান, শুভে যাবার আগে আমার পায়ে খানিকটা গরম জল ঢালবার বন্দোবস্ত করেন,

তবে ছাড়েন। বাড়ির মধ্যে সকলের আগে বড়ো মিস্ ক—ওঠেন। তিনি নিচে এসে ব্রেকফাস্ট তৈরি হয়েছে কিনা তদারক করেন; অগ্নি-কুণ্ডে দু'চার হাতা কয়লা দিয়ে ঘরটি বেশ উজ্জ্বল ক'রে রাখেন। খানিক বাদে সিঁড়িতে একটা দুন্দাড় পায়ের শব্দ শুনে পাওয়া যায়। বড়ো শীতে হি হি করতে করতে খাবার ঘরে এসে উপস্থিত। তাড়াতাড়ি আঙুলে হাত, পা, পিঠ, বুক তাতিয়ে খবরের কাগজ হাতে খাবার টেবিলে এসে বসেন। তাঁর বড়ো মেয়েকে চুষন করেন, আমার সঙ্গে সুপ্রভাত অভিবাদন হয়। লোকটা প্রফুল্ল। আমার সঙ্গে খানিকটা হাসি তামাসা হয়, খবরের কাগজ থেকে এটা ওটা পড়ে শোনান। তাঁর এক পেয়লা কফি শেষ হয়ে গেছে, এমন সময়ে তাঁর আর দুটি মেয়ে এসে তাঁকে চুষন করলেন। তাঁদের সঙ্গে তাঁর বন্দোবস্ত ছিল যে, তাঁরা যেদিন মিষ্টর ক-র আগে উঠবেন, সে দিন মিষ্টর ক—তাঁদের পাঁচ সিকে পুরস্কার দেবেন, আর যে দিন মিষ্টর ক—তাঁদের আগে উঠবেন, সেদিন তাঁদের চার আনা দণ্ড দিতে হবে। যদিও এত অল্প দিতে হোত, তবু তাঁদের কাছে প্রায় দু'তিন পাউণ্ড পাওনা হয়েছে। রোজ সকালে পাওনাদার পাওনার দাবি করেন। কিন্তু দেনদাররা হেসেই উড়িয়ে দেন। ক—বলেন “এ ভারি অগ্নায়!” আমাকে মাঝে মাঝে মধাস্থ মেনে বলেন “আচ্ছা মিষ্টর টি—তুমিই বলো, এ রকম ডেট অফ্ অনব্ ফাঁকি দেওয়া কি ভঙ্গতা?” যাহোক পরিশোধের অভাবে পাওনা বেড়েই চলেছে। তার পরে মিস্ ক—এলেন। আমাদের ব্রেকফাস্ট প্রায় সাড়ে নটার মধ্যে শেষ হয়। বাড়ির বড়ো ছেলে আগেই খাওয়া সেরে কাজে গিয়েছেন, আর মিষ্টর ক-র ছোটো ছেলেটি ও ছোটো মেয়েটি অনেকক্ষণ হোলো খাওয়া শেষ করেছে। এক জনের কথা বলতে ভুলে গিয়েছি। টেবি কুকুরটি

অনেকক্ষণ হোলো এসে আঙনের কাছে আরামে বসে আছে। ছোট্ট কুকুরটি। ঝাঁকড়া ঝাঁকড়া রোঁয়া। রোঁয়াতে চোখ মুখ ঢাকা। বুড়ো হয়েছে, আর তার একটা চোখ কানা হয়ে গেছে। আদর পেয়ে পেয়ে এই ব্যক্তির অভ্যাস হয়েছে নবাবি চাল। ড্রয়িং রুম ছাড়া অল্প কোনো ঘরে তার মন বসে না। ঘরের সকলের চেয়ে ভালো কেদারাটিতে অন্নানবদনে লাফিয়ে উঠে বসে, একপাশে যদি আর কেউ এসে বসল, অমনি সে সদর্পে পাশেব কোচটির উপরে গিয়ে বসে পড়ে। সকাল বেলায় ব্রেকফাস্টের সময় তার তিনটি বিস্কুট বরাদ্দ। সে বিস্কুটগুলি নিয়ে খাবার ঘরে বসে থাকে, যতক্ষণ না আমি গিয়ে সেই বিস্কুটগুলি নিয়ে তার সঙ্গে পানিকটা খেল করি, একবার তার মুখ থেকে কেড়ে নিই, একবার গড়িয়ে দিই। আগে আগে যখন আমার উঠতে দেরি হোত; সে তাব বরাদ্দ বিস্কুট নিয়ে আমার শোবার ঘরের কাছে বসে যেউ যেউ কবত। কিন্তু গোল করলে বিরক্ত হতুম দেখে সে এখন আর যেউ যেউ করে না। আস্তে আস্তে পা দিয়ে দরজা ঠেলে, যতক্ষণ না দরজা খুলে দিই—চূপ ক'রে বাইরে বসে থাকে। দরজা খুলে ঘর থেকে বেরোলেই লাফিয়ে ঝাঁপিয়ে লেজ নেড়ে উৎসাহ প্রকাশ করে; তার পরে একবার বিস্কুটেব দিকে চায়, একবার আমার মুখের দিকে। যাহোক সাড়ে নটার মধ্যে ব্রেকফাস্ট শেষ হয়। তার পরে হাতে দস্তানা-পরী গৃহিণী দাসীদের নিয়ে তাঁর চৌতলা থেকে এক তলা পর্যন্ত, জিনিষপত্র গুছিয়ে, ঘর দ্বার পরিষ্কার ও গৃহকার্য তদারক ক'রে উঠা-নাবায় প্রবৃত্ত। একবার রান্না ঘবে যান, সেখানে শাকওয়াদা, কুটিওয়াদা, মাংসওয়াদার বিল দেখেন, দেন। চুকিয়ে দেন। মাঝে মাঝে উপরে এসে কর্তার সঙ্গে গৃহকার্যের পরামর্শ হয়। রান্নাঘরের উপকরণ পরিষ্কার আছে কিনা ও যথাস্থানে তাদের

রাখা হয়েছে কিনা দেখেন, ভালো মাংস এনেছে কিনা, ওজন কত পড়েছে কিনা তদন্ত করেন। রাধুনীর সঙ্গে মাঝে মাঝে যোগ দেন। এই রকম ব্রেকফাস্টের পর থেকে প্রায় বেলা একটা দেউটা পর্যন্ত তাঁকে নানাবিধ কাজে ব্যস্ত থাকতে হয়। মাঝে মাঝে তাঁর সঙ্গে তাঁর বড়ো মেয়ে যোগ দেন। মেঝো মেয়ে প্রত্যাহ একটি ঝাডন নিয়ে ড্রয়িং রুম সাফ করেন। দাসীরা ঘর কাঁট দিয়ে যায়, আর জিনিষপত্র যা কিছু ধুলো লাগে তা তিনি নিজের হাতে ঝেড়ে ঝুড়ে সাফ করেন। তৃতীয় মেয়ে বালিশের আচ্ছাদন, আসন, মোজা, কাপড় প্রভৃতি নানাবিধ সেলাইয়ে নিযুক্ত হন, চিঠিপত্র লেখেন, এক এক দিন বাজনা ও গান অভ্যাস করেন। বাড়ির মধ্যে তিনিই গাইয়ে বাজিয়ে। আজকাল স্কুল বন্ধ, ছোটো ছেলেরা ও মেয়েটি ভারি খেলায় মগ্ন। দেউটার সময় আমরাদেব লক্ষ খাওয়া সমাপন হোলে আবার যিনি ষাঁর কাজে নিযুক্ত হন। এই সময়ে ভিজিটরদের আসবার সময়। হয়তো মিসেস ক—তাঁর স্বামীর একজোড়া ছেঁড়া মোজা নিয়ে চসমা প’রে ড্রয়িং রুমে ব’সে সেলাই করছেন। ছোটো মেয়ে একটি পশমের জামা তাঁর ভাইপোব জন্তে তৈরি ক’রে দিচ্ছেন। মেঝো মেয়েটি একটু অবসর পেয়ে আঙনের কাছে ব’সে হয়ত গ্রীনের লিখিত ইংরেজ জাতির ইতিহাস পড়তে নিযুক্ত। বড়ো মিস ক—হয়তো তাঁর কোনো আলাপির বাড়িতে ভিজিট করতে গিয়েছেন। তিনটের সময় হয়তো একজন ভিজিটর এলেন। দাসী ড্রয়িংরুমে এসে নাম উচ্চারণ করলে “মিষ্টর ও মিসেস ক”; বলতে বলতে ঘরের মধ্যে তাঁরা দুজনে উপস্থিত। মোজা জামা রেখে বই মুড়ে গৃহিণী ও তাঁর কন্যারা আগন্তুকদের অভ্যর্থনা করলেন। আবহাওয়া স্বস্ত্রে পরস্পরের মতামতের ঐক্য নিয়ে আলাপ শুরু হোলো। মিসেস এ বললেন, “মিষ্টর এক্সেস-র ৪৩ বৎসর বয়সে হাম হয়। হাম

হয়েছিল বলে তিনি চার দিন আপিসে যেতে পারেন নি। কাল আপিসে গিয়েছিলেন। তাঁর হামের প্রসঙ্গে আপিসের লোকেরা তাঁকে নির্দিষ্টরূপে ঠাট্টা করতে আরম্ভ করেছে।” অন্তেরা লোকটির সম্বন্ধে দরদ প্রকাশ করলে। এই কথা থেকে ক্রমে হাম রোগের বিষয়ে যত কথা উঠতে পারে উঠল। মিস্ এ—খবর দিলেন মিষ্টর জ-এর তৃতীয় ছেলেটির হাম হয়েছে। তার থেকে কথা উঠল যে, মিষ্টর জ-এর যে এক পিতৃব্য বোন মিস্ ই—অষ্ট্রেলিয়ায় আছেন, তাঁর কাপ্তেন ব-এর সঙ্গে বিবাহ হয়ে গেছে। এইরকম খানিকক্ষণ কথোপকথন হোলে পর তাঁরা চ’লে গেলেন। বিকেলে হয়তো আমরা সবাই মিলে একটু বেড়াতে গেলুম। বেড়িয়ে এসে সাড়ে ছটার সময় আমাদের ডিনর। ডিনর খেয়ে সাতটার সময় আমরা সবাই মিলে ড্রয়িংরুমে গিয়ে বসি। আগুন জলছে। ঘরটি বেশ গরম হয়ে উঠেছে। আমরা আগুনের চারদিকে ঘিরে বসলুম। এক এক দিন আমাদের গান বাজনা হয়। আমি ইতিমধ্যে অনেক ইংরেজি গান শিখেছি। আমি গান করি। মিস্ এ—বাজান। মিস্ এ—আমাকে অনেকগুলি গান শিখিয়েছেন। কিন্তু প্রায় সন্ধ্যাবেলায় আমাদের একটু আধটু পড়াশুনা হয়। আমরা পালা করে ছ দিনে ছ রকমের বই পড়ি। বই পড়তে পড়তে এক এক দিন প্রায় ১১টা ১২টা হয়ে যায়।

ছেলেদের সঙ্গে আমার খুব ভাব হয়ে গেছে। তারা আমাকে আর্থর খুড়ো বলে। এখেল ছোটো মেয়েটির ইচ্ছে যে, আমি কেবল একলা তারই আঙ্কল আর্থর হই। তার ভাই টম যদি আমাকে দাবী করে তবেই তার দুঃখ। একদিন টম তার ছোটো বোনকে রাগাবার জন্তে একটু বিশেষ জোর দিয়ে বলেছিল, আমারই আঙ্কল আর্থর। তখনি এখেল আমার গলা জড়িয়ে ন’রে ঠোঁট দুটি ফুলিয়ে কাঁদতে আরম্ভ:

ক'রে দিলে। টম একটু অস্থির, কিন্তু ভারি ভালোমানুষ। খুব মোটা-সোটা। মাথাটা খুব প্রকাণ্ড। মুখটা খুব ভারি ভারি। সে এক এক সময়ে আমাকে এক একটা অদ্ভুত প্রশ্ন করে। একদিন আমাকে জিজ্ঞাসা করছিল, “আচ্ছা, আঙ্ক্ল আর্থর, ইন্দুররা কী করে?” আঙ্ক্ল বললেন “তারা রান্নাঘর থেকে চুরি ক'রে খায়।” সে একটু ভেবে বললে, “চুরি ক'রে? আচ্ছা, চুরি করে কেন?” আঙ্ক্ল বললেন, “তাদের ক্ষিদে পায় ব'লে।” শুনে টম-এর বড়ো ভালো লাগল না। সে বরাবর শুনে আসছে যে, জিজ্ঞাসা না ক'রে পরের জিনিষ নেওয়া অত্যাচার। আর একটি কথা না ব'লে সে চলে গেল। যদি তার কোন কখনো কান্দে, সে ভাড়াভাড়ি এসে সাঙ্কনার স্বরে বলে, “Oh, poor Ethel, don't you cry! Poor Ethel!” এখেলের মনে মনে জ্ঞান আছে যে, সে একজন লেডি। সে কেবল গম্ভীরভাবে কেদারায় ঠেস দিয়ে বসে। টমকে এক এক সময়ে ভৎসনা ক'রে বলে, “আমাকে বিরক্ত কোরো না।” একদিন টম পড়ে গিয়ে কান্দছিল। আমি তাকে বললেম “ছি, কান্দতে আছে!” অমনি এখেল আমার কাছে ছুটে এসে জাঁক ক'রে বললে “আঙ্ক্ল আর্থর, আমি একবার ছেলেবেলায় রান্নাঘরে পড়ে গিয়েছিলেম, কিন্তু কান্দিনি।” ছেলেবেলায়!

মিষ্টর ন—, ডাক্তারের আর এক ছেলে বাড়িতে থাকেন কিন্তু তাঁকে দেখতে পাইনে। তিনি সমস্ত দিন আপিসে। আপিস থেকে এলেও তাঁর বড়ো একটা দেখা পাওয়া যায় না। তার কারণ মিস্ ই-র সঙ্গে তাঁর বিয়ের সম্বন্ধ। তাঁদের দুজনে কোর্টশিপ চলছে। রবিবার দুবেলা প্রেয়সীকে নিয়ে তাঁর চর্কে যেতে হয়। যখন বিকেলে একটু অবসর পান, প্রণয়িনীর বাড়িতে গিয়ে এক পেয়লা চা খেয়ে আসেন। প্রতি শুক্রবার সন্ধ্যা বেলা তাঁদের বাড়িতে তাঁর নৈমন্ত্য। এই রকমে তাঁর

সময় ভারি অল্প। উভয়ে পরস্পরকে নিয়ে এমন স্তূখী আছেন যে, অবসর কাল কাটাবার ক্ষেত্রে অল্প কোনো জীবের সঙ্গ তাঁদের আবশ্যক করে না। শুক্রবার সন্ধ্যাবেলায় যদি আকাশ ভেঙে পড়ে তবু ন—পরিষ্কার ক'রে চুলাটি ফিরিয়ে, পমেটম বেখে, কোট ব্রশ ক'রে ফিট্‌ফাট হয়ে, ছাতা হাতে বাড়ি থেকে বোরাবেনই। একবার খুব শীত পড়েছিল, আর তাঁর ভারি কাশি হয়েছিল; মনে করলেম, আজ বুঝি বেচারীর আর যাওয়া হয় না। ৭টা বাজতে না বাজতেই দেখি তিনি ফিট্‌ফাট হয়ে নেবে এসেছেন।

যা হোক, আমার এই পরিবারের সঙ্গে খুব বন্ধুত্ব হয়ে গেছে। সেদিন মেঝে মেয়ে আমাকে বলছিলেন যে, প্রথম যখন তাঁরা গুনলেন যে, একজন ভারতবর্ষীয় ভ্রমলোক তাঁদের মধ্যে বাস করতে আসছে, তাঁদের ভারি ভয় হয়েছিল। যেদিন আমার আসবার কথা সেইদিন মেঝে ও ছোটো মেয়ে, তাঁদের এক আত্মীয়ের বাড়িতে পালিয়ে গিয়েছিলেন। প্রায় এক হপ্তা বাড়িতে আসেন নি। তার পর হয়তো যখন তাঁরা গুনলেন যে, মুখে ও সর্কাক্ষে উক্কি নেই, ঠোঁট বিঁধিয়ে অলঙ্কার পরেনি, তখন তাঁরা বাড়িতে ফিরে এলেন। ওরা বলেন যে প্রথম প্রথম এসে যদিও আমার সঙ্গে কথাবার্তা কয়েছিলেন তবুও দুদিন পর্যন্ত আমার মুখ দেখেন নি। হয়তো ভয় হয়েছিল যে, কী অপূর্ব ছাঁচে ঢালাই মুখই না জানি দেখবেন। তার পর যখন মুখ দেখলেন—তখন?

যা হোক, এই পরিবারে স্নেহে আছি। সন্ধ্যাবেলা আমোদে কেটে যায়;—গান, বাজনা, বই পড়া। আর এখেল তার আঙ্গল আর্থরকে মুহূর্ত ছেড়ে থাকতে চায় না।

দুরোপ-যাত্রীর ডায়ারি

উৎসর্গ

লোকেন্দ্রনাথ পালিত

স্বহৃদয়কে এই গ্রন্থ

স্মরণোপহার স্বরূপে

উৎসর্গ করিলাম।

গ্রন্থকার।

যুরোপ-যাত্রীর ডায়ারি

শুক্রবার। ২২শে আগষ্ট ১৮৯০। দেশকালের মধ্যে যে একটা প্রাচীন ঘনিষ্ঠতা আছে, বাস্পবানে সেটা লোপ ক'রে দেবার চেষ্টা করছে। পূর্বে, সময় দিয়ে দূরত্বের পরিমাণ হোত ; লোকে বলত এক প্রহরের রাস্তা, দুদিনের রাস্তা। এখন কেবল গাছের মাপটাই অবশিষ্ট। দেশকালের চিরদাম্পত্যের মাঝখান দিয়ে অবাধে বড়ো বড়ো কলের গাড়ি এবং কলের জাহাজ চ'লে যাচ্ছে।

কেবল তাই নয়—এসিয়া এবং আফ্রিকা দুই ভগ্নীর বাহুবন্ধন বিচ্ছিন্ন ক'রে মাঝে বিরহের লবণাধুরাশি প্রবাহিত করা হয়েছে। আমেরিকার উত্তর দক্ষিণ যমজ ভ্রাতার মতো জন্মাবধি সংলগ্ন হয়ে আছে, শোনা যায় তাদের মধ্যেও লৌহাস্ত্র চালনার উদ্যোগ করা হয়েছিল। এমনি ক'রে সভ্যতা সর্বত্রই জলে স্থলে দেশে কালে গৃহবিচ্ছেদ ঘটিয়ে দিয়ে আপনার পথটি ক'রে নেবার চেষ্টা করছে।

পূর্বে যখন দীর্ঘ পথ প্রদক্ষিণ ক'রে যুরোপে পৌঁছতে অর্ধেক বৎসর লাগত তখন এই দুই মহাদেশের যথার্থ ব্যবধান সম্পূর্ণ ধারণা করবার দীর্ঘকাল অবসর পাওয়া যেত। এখন ক্রমেই সেটা হ্রাস হয়ে আসছে।

কিন্তু দেশকালের ঘনিষ্ঠতা যতই হ্রাস হোক, চিরকালের অভ্যাস একেবারে বাবার নয়। যদিও তিন মাসের টিকিট মাত্র নিয়ে যুরোপে চলেছি, তবু একটা কাল্পনিক দীর্ঘকালের বিভীষিকা মন থেকে তাড়াতে পারছি। মনে হচ্ছে যেন অনেক দিনের জন্তে চলেছি।

কালিদাসের সময়ে যখন রেলগাড়ী, ঈপ্তিমার, পোষ্ট আপিস ছিল

না তখনি ঝাঁটি বিরহ ছিল ; এবং তখনকার দিনে বছর খানেকের জন্ত রামগিরিতে বদলি হয়ে যক্ষ যে সুদীর্ঘচ্ছন্দে বিলাপ পরিতাপ করেছিল সে তার পক্ষে অযথা হয় নি। কিন্তু সুপাকার তুলো যেমন কলে চেপে একটি পরিমিত গাঁঠে পরিণত হয়, সভাতার চাপে আমাদের সমস্তই তেমনি সংক্ষিপ্ত নিবিড় হয়ে আসছে। ছয় মাসকে জাঁতার তলায় ফেলে তিন মাসের মধ্যে ঠেসে দেওয়া হচ্ছে ; পূর্বে যা মুটের মাথার বোঝা ছিল এখন তা পকেটের মধ্যে ধরে। এখন দুই এক পাতার মধ্যেই বিরহ গীতি সমাপ্তি ; এবং বিদ্বাংযান যখন প্রচলিত হবে তখন বিরহ এত গাঢ় হবে যে, চতুর্দশপদীও তার পক্ষে চিলে বোধ হবে।

সূর্য্য অন্তপ্রায়। জাহাজের ছাদের উপর হালের কাছে দাঁড়িয়ে ভারতবর্ষের তীরের দিকে চেয়ে রইলুম। সমুদ্রের জল সবুজ, তীরের রেখা নীলাভ, আকাশ মেঘাচ্ছন্ন। সন্ধ্যা রাত্রির দিকে এবং জাহাজ সমুদ্রের মধ্যে ক্রমশই অগ্রসর হচ্ছে। বায়ে বোম্বাই বন্দরের দীর্ঘরেখা এখনো দেখা যাচ্ছে।

ক্রমে বন্দর ছাড়িয়ে গেলুম। সন্ধ্যার মেঘাবৃত অন্ধকারটি সমুদ্রের অনন্ত শস্যায় দেহ বিস্তার করলে। আকাশে তারা নেই। কেবল দূরে লাইট-হাউসের আলো জ্বলে উঠল ; সমুদ্রের শিয়রের কাছে সেই কম্পিত দীপশিখা যেন ভাসমান সন্তানদের জন্তে ভূমিমাতার আশঙ্কাকুল জাগ্রত দৃষ্টি।

জাহাজ বোম্বাই বন্দর পার হয়ে গেল।

ভাসূল তরী সন্ধ্যাবেলা, ভাবিলাম এ জলখেলা,

মধুর বহিবে বায়ু ভেসে যাব রঙ্গে।—

কিন্তু শী-সিক্‌নেসের কথা কে মনে করেছিল !

যখন সবুজ জল ক্রমে নীল হয়ে এল এবং তরঙ্গে তরীতে মিলে' আন্দোলন উপস্থিত ক'রে দিলে তখন দেখলুম সমুদ্রের পক্ষে জলখেলা বটে কিন্তু আমার পক্ষে নয়।

ভাবলুম এই বেলা মানে মানে কুঠরির মধ্যে ঢুকে কঞ্চলটা মুড়ি দিয়ে শুয়ে পড়িগে। যথাসম্ভব ক্যাবিনের মধ্যে প্রবেশ ক'রে কাঁধ থেকে কঞ্চলটা বিছানার উপর ফেলে দরজা বন্ধ ক'রে দিলুম। ঘর অন্ধকার। বুঝলুম, আলো নিবিয়ে দিয়ে দাদা তাঁর বিছানায় শুয়েছেন। শারীরিক দুঃখ নিবেদন ক'রে একটুখানি স্নেহ উদ্বেক করবার অভিপ্রায়ে জিজ্ঞাসা করলুম “দাদা, ঘুমিয়েছেন কি?” হঠাৎ নিতান্ত বিজাতীয় মোটা গলায় কে একজন হুক্কার দিয়ে উঠল “হুজ ছাট্!” আমি বললুম “বাসরে! এ তো দাদা নয়!” তৎক্ষণাৎ বিনীত অন্ততপ্তস্বরে জ্ঞাপন করলুম “ক্ষমা করবেন, দৈবক্রমে ভুল কুঠরিতে প্রবেশ করেছি।” অপরিচিত কণ্ঠ বললে “অল্ রাইট্!” কঞ্চলটি পুনশ্চ তুলে নিয়ে কাতর শরীরে সঙ্কুচিত চিন্তে বেরোতে গিয়ে দেখি দরজা খুঁজে পাইনে। বাক্স তোরঙ্গ লাঠি বিছানা প্রভৃতি বিচিত্র জিনিষের মধ্যে খট্ খট্ শব্দে হাত্‌ড়ে বেড়াতে লাগলুম। ইঁদুর কলে পড়লে তার মানসিক ভাব কাঁ রকম হয় এই অবসরে কতকটা বুঝতে পারা যেত, কিন্তু তার সঙ্গে সমুদ্রপীড়ার সংযোগ হওয়াতে ব্যাপারটা অপেক্ষাকৃত জটিল হয়ে পড়েছিল।

মন যতই ব্যাকুল হয়ে উঠছে শরীর ততই গলদ্বন্দ্ব এবং কণ্ঠাগত অগুরিস্ক্রিয়ের আক্ষেপ উত্তরোত্তর অবাধ্য হয়ে উঠছে। অমুসন্ধানের পর যখন হঠাৎ মস্তণ চিক্ণ শ্বেতকাচ-নির্মিত দ্বারকর্ণটি হাতে ঠেকল, তখন মনে হোলো এমন প্রিয়স্পর্শস্থখ বহুকাল অনুভব করা হয় নি। দরজা খুলে' বেবিয়ে প'ড়ে নিঃসংশয়চিত্তে পরবর্তী

ক্যাবিনের দ্বারে গিয়ে উপস্থিত । গিয়েই দেখি, আলো জ্বলছে ; কিন্তু মেজের উপর পরিত্যক্ত গাউন পেটিকোট প্রভৃতি স্ত্রীলোকের গাত্রাবরণ বিক্ষিপ্ত । আর অধিক কিছু দৃষ্টিপথে পড়বার পূর্বেই পলায়ন করলুম । প্রচলিত প্রবাদ অনুসারে বারবার তিনবার ভ্রম করবার অধিকার সকলেরই আছে, কিন্তু তৃতীয়বার পরীক্ষা করতে সাহস হোলো না । এবং সেরূপ শক্তিও ছিল না । অবিলম্বে জাহাজের ছাতে গিয়ে উপস্থিত হলাম । সেখানে বিহ্বলচিত্তে জাহাজের কাঠার পরে ঝুঁকে পড়ে শরীরমনের একান্ত উদ্বেগ কিঞ্চিৎ লাঘব করা গেল । তার পরে বহলাঞ্জিত অপরাধীর মতো আন্তে আন্তে কঞ্চলটি গুটিয়ে তার উপর লঙ্কিত নতমস্তক স্থাপন করে একটি কাঠের বেঞ্চিতে গুয়ে পড়লুম ।

কী সর্কনাশ ! এ কার কঞ্চল ! এ তো আমার নয় দেখছি ! যে সুখমুগ্ধ বিশ্বস্ত ভ্রমলোকটির ঘরের মধ্যে রাত্রে প্রবেশ করে কয়েক মিনিট ধরে অল্পসন্ধান কার্যে ব্যাপৃত ছিলাম নিশ্চয় এ তারই । একবার ভাবলুম ফিরে গিয়ে চুপিচুপি তার কঞ্চল স্থানে রেখে আমারটি নিয়ে আসি ; কিন্তু যদি তার ঘুম ভেঙে যায় ! পুনর্বীর যদি তার ক্ষমা প্রার্থনা করবার প্রয়োজন হয় তবে সে কি আর আমাকে বিশ্বাস করবে ! যদি বা করে, তবু এক রাত্রে মধ্যে দুবার ক্ষমা প্রার্থনা করলে নিদ্রাকাতর বিদেশীর ধৃষ্টীয় সহিষ্ণুতার প্রতি অতিমাত্র উপদ্রব করা হবে না কি !—আরো একটা ভয়ঙ্কর সম্ভাবনার কথা মনে উদয় হোলো । দৈববশত দ্বিতীয়বার যে ক্যাবিনের দ্বারে গিয়ে পড়েছিলাম তৃতীয়বারও যদি ভ্রমক্রমে সেইখানে গিয়েই উপস্থিত হই এবং প্রথম ক্যাবিনের ভ্রমলোকটির কঞ্চলটি সেখানে রেখে সেখানকার একটি গাত্রোচ্ছাদন তুলে নিয়ে আসি তাহোলে কী রকমের একটা রোমহর্ষণ প্রমাদ-প্রহেলিকা

উপস্থিত হয়! ইত্যাকার দুশ্চিন্তায় তীব্র তাত্রকূটবাসিত পরের কণ্ঠের উপর কাষ্ঠাসনে রাত্রি যাপন করলুম।

২৩ আগষ্ট। আমার স্বদেশীয় সঙ্গী বন্ধুটি সমস্ত রাত্রির স্মৃতিচিত্রাবসানে প্রাতঃকালে অত্যন্ত প্রফুল্ল পরিপূর্ণ মুখে ডেকের উপর দর্শন দিলেন। আমি তাঁর দুই হস্ত চেপে ধরে বললুম, “ভাই, আমার তো এই অবস্থা!”—তিনি আমার বুদ্ধিবৃত্তির উপর কলঙ্ক আরোপ ক’রে হাস্ত-সহকারে এমন দুটো একটা বিশেষণ প্রয়োগ করলেন যা গুরুমশায়ের সান্নিধ্য পরিত্যাগের পর থেকে আর কখনো শোনা হয় নি। সমস্ত রজনীর দুঃখের পর প্রভাতের এই অপমানটাও নিরুত্তরে সহ্য করলুম। অবশেষে তিনি দয়াপরবশ হয়ে আমার ক্যাবিনের ভূত্যাটিকে ডেকে দিলেন। তাকেও আবার একে একে সমস্ত ঘটনাটি খুলে বলতে হোলো। প্রথমে সে কিছুই বুঝতে পারলে না, মুখের দিকে তাকিয়ে রইল। তাব জীবনের অভিজ্ঞতায় নিঃসন্দেহ এরকম ঘটনা এই প্রথম। অবশেষে ধীরে ধীরে সে সমুদ্রের দিকে একবার মুখ ফেরালে এবং ঈষৎ হাসলে; তার পর চলে গেল।

দী-সিকনেস্ ক্রমশ বৃদ্ধি পেতে লাগল। সে ব্যাধিটার যত্নগা অনভিজ্ঞ স্থলচরদের কিছুতে বোঝানো যেতে পারে না। নাড়িতে ভারতবর্ষের অন্ন তিলমাত্র অবশিষ্ট রইল না। যুরোপে প্রবেশ করবার পূর্বে সমুদ্র এই দেহ হতে ভারতবর্ষটাকে যেন ঝাঁকিয়ে ঝাঁকিয়ে একেবারে সাফ ক’রে ফেলবার চেষ্টা করছে। ক্যাবিনে চার দিন পড়ে আছি।

২৬ আগষ্ট। শনিবার থেকে আর আজ এই মঙ্গলবার পর্য্যন্ত কেটে গেল। জগতে ঘটনা বড়ো কম হয়নি—সূর্য্য চারবার উঠেছে এবং তিনবার অস্ত গেছে; বৃহৎ পৃথিবীর অসংখ্য জীব দস্তধাবন থেকে দেশ

উদ্ধার পর্যন্ত বিচিত্রে কর্তব্যের মধ্যে দিয়ে তিনটে দিন মহা ব্যস্তভাবে অতিবাহিত করেছে—জীবনসংগ্রাম, প্রাকৃতিক নির্বাচন, আত্মরক্ষা, বংশরক্ষা প্রভৃতি জীবরাজ্যের বড়ো বড়ো ব্যাপার সবেগে চলছিল—কেবল আমি শয্যাগত জীবনমৃত হয়ে পড়ে ছিলাম। আধুনিক কবির কখনও মুহূর্তকে অনন্ত কখনও অনন্তকে মুহূর্ত আখ্যা দিয়ে প্রচলিত ভাষাকে নানাপ্রকার বিপবীত ব্যায়াম বিপাকে প্রবৃত্ত করান। আমি আমার এই চারটে দিনকে বড়ো রকমের একটা মুহূর্ত বলব, না এর প্রত্যেক মুহূর্তকে একটা যুগ বলব স্থির করতে পারছি নে।

যাই হোক কষ্টের সীমা নেই। মানুষের মতো এত বড়ো একটা উন্নত জীব যে সহসা এতটা উৎকট দুঃখ ভোগ করে তার একটা মহৎ নৈতিক কিম্বা আধ্যাত্মিক কারণ থাকাই উচিত ছিল; কিন্তু জলের উপরে কেবল খানিকটা ঢেউ ওঠার দরুন জীবাঙ্গার এতবেশি পীড়া নিতাস্ত অত্যাঁয় অসঙ্গত এবং অগৌরবজনক বলে বোধ হয়। কিন্তু জাগতিক নিয়মের প্রতি দোষারোপ করে কোনো স্থখ নেই, কারণ, সে নিন্দাবাদে কারো গায়ে কিছু ব্যথা বাজে না এবং জগৎ-রচনার তিলমাত্র সংশোধন হয় না।

যন্ত্রণাশয্যায় অচেতনপ্রায় ভাবে প'ড়ে আছি। কখনো কখনো ডেকের উপর থেকে পিয়নোর সঙ্গীত মুহু মুহু কর্ণে এসে প্রবেশ করে, তখন স্বরণ হয়, আমার এই সঙ্গীর্ণ শয়ন-কারাগারে বাইরে সংসারের নিত্য আনন্দস্রোত সমভাবে প্রবাহিত হচ্ছে। বহুদূরে ভারতবর্ষের পূর্ব সীমায় আমার সেই সঙ্গীতধ্বনিত মেহমধুর গৃহ মনে পড়ে। স্বথস্বাস্থ্য সৌন্দর্যময় জীবজগৎকে অতিদূরবর্তী ছায়ারাজ্যের মতো বোধ হয়। মধ্যের এই স্বদীর্ঘ নরুপথ অতিক্রম ক'বে কখন সেখানকার জীবন-উৎসবের মধ্যে ফিরে যেতে পারব, এই কথাই কেবল ভাবি। মঙ্গলবার

প্রাতে যখন শরীরের মধ্যে প্রাণটা ছাড়া কিছুই অবশিষ্ট ছিল না, তখন আমার বন্ধু অনেক আশ্বাস দিয়ে আমাকে জাহাজের ছাদের উপর নিয়ে গেলেন। সেখানে লম্বা বেতের চৌকিটির উপর পা ছড়িয়ে বসে পুনর্বার এই মর্ত্য পৃথিবীর স্পর্শ এবং নবজীবনের আশ্বাস লাভ করা গেল।

জাহাজের যাত্রীদের বর্ণনা করতে চাইনে। অতি নিকট হতে কোনো মসীলিপ্ত লেখনীর সূচ্যগ্রভাগ যে তাদের প্রতি তীক্ষ্ণ লক্ষ্য স্থাপন করতে পারে এ কথা তারা স্বপ্নেও না মনে ক'রে বেশ বিশ্বস্তচিত্তে ডেকের উপর বিচরণ করছে, টুংটাং শব্দে পিয়নো বাজাচ্ছে, বাজি রেখে হার-জিৎ খেলছে, ধূমপানশালায় বসে তাস পিটছে; তাদের সঙ্গে আমাব কোনো সম্পর্ক নেই। আমরা তিন বাঙালি তিন লম্বা চৌকিতে জাহাজের একটি প্রান্ত সম্পূর্ণ অধিকার ক'বে অবশিষ্ট জনসংখ্যাব প্রতি অত্যন্ত উদাস্তদৃষ্টিপাত ক'রে থাকি।

আমার সঙ্গী যুবকটির নিতাকর্ষ হচ্চে তামাকেব থলিটি বারবার হাবানো, তার সন্ধান এবং উদ্ধারসাধন। আমি তাঁকে বারম্বার সতর্ক ক'রে দিয়েছি যে, যদি তাঁর মুক্তির কোনো ব্যাঘাত থাকে সে তাঁর চুরোট। মহর্ষি ভরত মৃত্যুকালেও হরিণশিশুর প্রতি চিন্তনিবেশ করেছিলেন ব'লে পবজন্মে হরিণশাবক হয়ে জন্মগ্রহণ করলেন। আমার সর্বদাই আশঙ্কা হয়, আমার বন্ধু জন্মান্তরে ব্রহ্মদেশীয় কোনো এক কৃষকের কুটারের সম্মুখে মস্ত একটা তামাকের ক্ষেত হয়ে উদ্ভূত হবেন। বিনা প্রমাণে তিনি শাস্ত্রেব এ সকল কথা বিশ্বাস করেন না, বরঞ্চ তর্ক ক'রে আমারও সরল বিশ্বাস নষ্ট করতে চান এবং আমাকে পর্য্যস্ত চুরুট ধরাতে চেষ্টা করেন, কিন্তু এ পর্য্যস্ত ক্লতকার্য্য হোতে পারেন নি।

২৭২৮ আগষ্ট। দেবাস্তুরগণ সমুদ্র মস্থন ক'রে সমুদ্রের মধ্যে যা কিছু ছিল সমস্ত বাহির কবেছিলেন। সমুদ্র দেবেরও কিছু করতে

পারলেন না, অম্বরেরও কিছু করতে পারলেন না, হতভাগ্য দুর্বল মানুষের উপর তার প্রতিশোধ তুলছেন। মন্দর-পর্বত কোথায় জানিনে এবং শেষ নাগ তদবধি পাতালে বিশ্রাম করছেন, কিন্তু সেই সনাতন মন্ত্রনের ঘূর্ণী-বেগ যে এখনো সমুদ্রের মধ্যে রয়ে গেছে তা নরজ্ঞঠরধারী মাত্রেই অনুভব করেন। যারা করেন না তাঁরা বোধ করি দেবতা অথবা অম্বরবংশীয়। আমার বন্ধুটিও শেযোক্ত দলের, অর্থাৎ তিনিও করেন না।

রোগশয্যা ছেড়ে এখন “ডেকে” উঠে বসেছি। সম্পূর্ণ বললাভ হয় নি। শরীরের এই রকম অবস্থার মধ্যে একটু মাধুর্য আছে। এই সময়ে পৃথিবীর আকাশ, বাতাস, সূর্যালোক সবস্বক সমস্ত বাহ্য প্রকৃতির সঙ্গে যেন একটি নূতন পরিচয় আরম্ভ হয়। তাদের সঙ্গে আমাদের প্রতিদিনের ঘনিষ্ঠ সম্পর্ক কিছুকালের মতো বিচ্ছিন্ন হওয়াতে আবার যেন নবপ্রেমিকের মতো উভয়ের মধ্যে মৃদু সলজ্জ মধুর ভাবে কথাবার্তা জানাশোনার অল্প অল্প সূত্রপাত হোতে থাকে।

২২ আগষ্ট। আজ রাত্রে এডেনে পৌঁছব। সেখানে কাল প্রাতে জাহাজ বদল করতে হবে। সমুদ্রের মধ্যে দুটি একটি ক’রে পাহাড় পর্বতের রেখা দেখা যাচ্ছে।

জ্যোৎস্না রাত্রি। এডেন বন্দরে এসে জাহাজ থামল। আহাঙ্কের পর রহস্যলাপে প্রবৃত্ত হবার জগ্রে আমরা দুই বন্ধু ছাতের একপ্রান্তে চৌকি দুটি সংলগ্ন ক’রে আরামে ব’সে আছি। নিস্তরঙ্গ সমুদ্র এবং জ্যোৎস্নাবিমুগ্ধ পর্বতবেষ্টিত তটচিত্রে আমাদের আলস্ত-বিজড়িত অর্দ্ধ-নিমৌলিত নেত্রে স্বপ্ন-মরীচিকার মতো লাগছে।

এমন সময় শোনা গেল এখনি নূতন জাহাজে চড়তে হবে। সে জাহাজ আজ রাত্রেই ছাড়বে। ক্যাবিনের মধ্যে স্ত্রুপাকার বিক্ষিপ্ত জিনিসপত্র যেমন তেমন ক’রে চন্দ্রপেটকের মধ্যে প্রবিষ্ট করিয়ে দিয়ে

তার উপরে তিন চার জনে দাঁড়িয়ে নির্দয় ভাবে নৃত্য ক'রে বহুকষ্টে চাবি বন্ধ করা গেল। ভৃত্যদের যথাযোগ্য পুরস্কার দিয়ে ছোটো বড়ো মাঝারি নানা আকাবের বাস্তু তোরঙ্গ বিছানাপত্র বহন ক'রে নৌকারোহণপূর্বক নূতন জাহাজ “ম্যাসীলিয়া” অভিমুখে চললুম।

অনতিদূরে মান্তলকন্টকিত ম্যাসীলিয়া তার দীপালোকিত ক্যাবিন-গুলির সুদীর্ঘশ্রেণীবদ্ধ বাতায়ন উন্মোচিত ক'রে দিয়ে পৃথিবীর আদিম কালের অতিকায় সহস্রচক্ষু জলজন্তুর মতো স্থির সমুদ্রে জ্যোৎস্নালোকে নিস্তরুভাবে ভাসছে। সহসা সেখান থেকে ব্যাণ্ড বেজে উঠল। সঙ্গীতের ধ্বনিতে এবং নিস্তরু জ্যোৎস্নানিশীথে মনে হোতে লাগল, অর্ধরাত্রে এই আরবের উপকূলে আরবা উপত্যাসের মতো কী একটা মায়ার কাণ্ড ঘটবে।

ম্যাসীলিয়া অষ্টেলিয়া থেকে যাত্রী নিয়ে আসছে। কুতূহলী নর-নারীগণ ডেকের বাবান্দা ধরে সকৌতুকে নবযাত্রীসমাগম দেখছে। কিন্তু সে রাত্রে নূতনত্ব সঙ্ঘর্ষে আমাদেরই তিনজনের সব চেয়ে জিত। বহুকষ্টে জিনিষপত্র উদ্ধার ক'রে ডেকের উপর যখন উঠলুম মুহূর্তের মধ্যে এক-জাহাজ দৃষ্টি আমাদের উপর বর্ষিত হোলো। যদি তার কোনো চিহ্ন দেবার ক্ষমতা থাকত তাহলে আমাদের সর্কীয় কটা কালো ও নীল ছাপে ভরে যেত। জাহাজটি প্রকাণ্ড। তার সঙ্গীতশালা এবং ভোজনগৃহের ভিত্তি শ্বেত প্রস্তরে মণ্ডিত। বিদ্যুতের আলো এবং ব্যাণ্ডের বাণ্ডে উৎসবময়।

অনেক রাত্রে জাহাজ ছেড়ে দিলে।

৩০ আগষ্ট। আমাদের এ জাহাজে ডেকের উপরে আর একটি দোতলা ডেকের মতো আছে। সেটি ছোটো এবং অপেক্ষাকৃত নির্জন। সেইখানেই আমরা আশ্রয় গ্রহণ করলুম।

আমার বন্ধুটি নীরব এবং অশ্রমনস্ক। আমিও তরুণ। দূর সমুদ্র-তীরের পাহাড়গুলো রৌদ্রে ক্লান্ত এবং ঝাপসা দেখাচ্ছে, একটা মধ্যাহ্ন-তন্দ্রার ছায়া পড়ে যেন অস্পষ্ট হয়ে এসেছে।

খানিকটা ভাবছি, খানিকটা লিখছি, খানিকটা ছেলেদের খেলা দেখছি। এ জাহাজে অনেকগুলি ছোটো ছোটো ছেলে মেয়ে আছে; আজকের দিনে যেটুকু চাকল্য সে কেবল তাদেরই মধ্যে। জুতো মোজা খুলে ফেলে তারা আমাদের ডেকের উপর কমলালেবু গড়িয়ে খেলা করছে—তাদের তিনটি দাসী বেঞ্চির উপরে বসে নতমুখে নিস্তরুভাবে শেলাই করে যাচ্ছে, এবং মাঝে মাঝে কটাক্ষপাতে বাত্রীদের অবস্থা পর্যবেক্ষণ করছে।

বহুদূরে এক আধটা জাহাজ দেখা যাচ্ছে। মাঝে মাঝে সমুদ্রে এক একটা পাহাড় জেগে উঠছে, অম্বর্ষের কঠিন কালো দন্ধ তপ্ত জনশৃঙ্খ। অশ্রমনস্ক প্রহরীর মতো সমুদ্রের মাঝখানে দাঁড়িয়ে তারা উদাসীনভাবে তাকিয়ে আছে, সামনে দিয়ে কে আসছে কে যাচ্ছে তার প্রতি কিছু মাত্র খেয়াল নেই।

এইরকম করে ক্রমে সূর্যাস্তের সময় হোলো। “কাস্প্ অফ্ ইণ্ডোলেন্স্” অর্থাৎ কুঁড়েমির কেলা যদি কাঁকেও বলা যায় সে হচ্ছে জাহাজ। বিশেষত গরম দিনে, প্রশান্ত লোহিতসাগরের উপরে। যাত্রীরা সমস্ত বেলা ডেকের উপর আরাম কেদারায় পড়ে দ্রুত উপরে টুপি টেনে দিয়ে দিবা-স্বপ্নে তলিয়ে রয়েছে। চলবার মধ্যে কেবল জাহাজ চলছে এবং তার চুই পাশের আহত নীল জল নাড়া পেয়ে অলস আপত্তির ক্ষীণ কলস্বরে পাশ কাটিয়ে কোনোমতে একটুখানি মাত্র সঞ্চে যাচ্ছে।

সূর্য্য অস্ত গেল। আকাশ এবং জলের উপরে চমৎকার রং দেখা

দিয়েছে। সমুদ্রের জলে একটি রেখামাত্র নেই। দিগন্তবিস্তৃত অটুট জলরাশি যৌবনপরিপূর্ণ পরিষ্কৃত দেহের মতো একেবারে নিটোল এবং সুডোল। এই অপার অখণ্ড পরিপূর্ণতা আকাশের এক প্রান্ত থেকে আর এক প্রান্ত পর্যন্ত থমথম করছে। বহুৎ সমুদ্র হঠাৎ যেন একটা জায়গায় এসে থেমেছে যার উর্দ্ধে আর গতি নেই, পবিত্বর্জন নেই; যা অনন্তকাল অবিশ্রাম চাঞ্চল্যের পরম পরিণতি, চরম নির্মাণ। সূর্যাস্তের সময় চিল আকাশের নীলিমার যে একটি সর্কোচ্চ সীমার কাছে গিয়ে সমস্ত বহুৎ পাখা সমতলরেখায় বিস্তৃত ক'রে দিয়ে হঠাৎ গতি বন্ধ ক'রে দেয়, চিরচঞ্চল সমুদ্র ঠিক যেন সহসা সেইরকম একটা পরম প্রশান্তির শেষ সীমায় এসে ক্ষণেকের জন্তে পশ্চিম অস্তাচলের দিকে মুখ তুলে একেবারে নিস্তব্ধ হয়ে আছে। জলের যে বর্ণবিকাশ হয়েছে সে আকাশের ছায়া কি সমুদ্রের আলো ঠিক বলা যায় না। যেন একটা মাহেজ্ঞক্ষেণে আকাশের নীরব নিনিমেষ নীল নেত্রের দৃষ্টিপাতে হঠাৎ সমুদ্রের অতলস্পর্শ গভীরতার মধ্যে থেকে একটা আকস্মিক প্রতিভার দীপ্তি স্ফূর্তি পেয়ে তাকে অপূর্ব মহিমাম্বিত ক'রে তুলেছে।

সন্ধ্যা হয়ে এল। চং চং চং চং ঘণ্টা বাজল। সকলে বেশভূষা পরিবর্তন ক'রে সান্ধ্যভোজনের জন্তে সূসজ্জিত হোতে গেল। আধঘণ্টা পরে আবার ঘণ্টা। নরনারীগণ দলে দলে ভোজনশালায় প্রবেশ করলে। আমরা তিন বাঙালি একটি স্বতন্ত্র ছোটো টেবিল অধিকার ক'রে বসলুম। আমাদের সামনে আর একটি টেবিলে দুটি মেয়ে একটি উপাসক সম্প্রদায়ের দ্বারা বেষ্টিত হয়ে খেতে বসেছেন।

চেয়ে দেখলুম তাঁদের মধ্যে একটি যুবতী আপনার যৌবনশ্রী বহুল-পরিমাণে উদ্ঘাটিত ক'রে দিয়ে সহাস্ত মুখে আহার এবং আলাপে নিযুক্ত। তাঁর শুভ্র স্নেহাল স্ফটিকণ গ্রীনাবক্ষবাহর উপর সমস্ত বিদ্যুৎ-

প্রদীপের অনিমেঘ আলো এবং পুরুষমণ্ডলীর বিস্মিত সকৌতুক দৃষ্টি বর্ষিত হচ্ছিল। একটা অনাবৃত আলোক-শিখা দেখে দৃষ্টিগুলো যেন কালো পতঙ্গের মতো চারিদিক থেকে ঝাঁকে ঝাঁকে লক্ষ দিয়ে পড়ছে। এমন কি অনেকে মুখ ফিরিয়ে ফিরিয়ে তাঁকে নিরীক্ষণ করছে এবং তাই নিয়ে ঘরের সর্বত্র একটা চাপা হাসির চাঞ্চল্য উঠেছে। অনেকেই সেই যুবতীর পরিচ্ছদটিকে “ইগোকোরাস্” বলে উল্লেখ করছে। কিন্তু আমাদের মতো বিদেশী লোকের পক্ষে তার বেআক্র বেআদবিটা বোঝা একটু শক্ত। কারণ, নৃত্যশালায় এ রকম কিম্বা এর চেয়ে অনাবৃত বেশে গেলে কারো বিস্ময় উদ্ভেক করে না।

কিন্তু বিদেশের সমাজনীতি সম্বন্ধে বেশি উৎসাহের সঙ্গে কিছু বলা ভালো নয়। আমাদের দেশে বাসরঘরে এবং কোনো কোনো বিশেষ উপলক্ষ্যে মেয়েরা যেমন অবাধে লজ্জাহীনতা প্রকাশ করে অথ কোনো সভায় তেমন করলে সাধারণের কাছে হুম্ব হোত সন্দেহ নেই। সমাজে যেমন নিয়মের বাধাবাধি, তেমনি মাঝে মাঝে ছুটো একটা ছুটিও থাকে।

৩১ আগষ্ট। আজ রবিবার। প্রাতঃকালে উঠে উপরের ডেকে চৌকিতে বসে সমুদ্রের বায়ু সেবন করছি, এমন সময় নিচের ডেকে খুষ্টানদের উপাসনা আরম্ভ হোলো। যদিও জানি এদের মধ্যে অনেকেই গুঞ্চভাবে অভ্যস্ত মন্ত্র আউড়িয়ে কলটেপা আর্গিনের মতো গান গেয়ে যাচ্ছিল—কিন্তু তবু এই যে দৃশ্য—এই যে গুটিকতক চঞ্চল ছোটো ছোটো মনুষ্য অপার সমুদ্রের মাঝখানে স্থির বিনম্রভাবে দাঁড়িয়ে গম্ভীর সমবেত কণ্ঠে এক চির-অজ্ঞাত অনন্ত রহস্যের প্রতি ক্ষুদ্র মানব-হৃদয়ের তল্লি উপহার প্রেরণ করছে, এ অতি আশ্চর্য্য।

কিন্তু এর মধ্যে হঠাৎ এক এক বার অট্টহাস্য শোনা গেল। গতরাত্তরের সেই ডিনর-টেবিলের নায়িকাটি উপাসনায় যোগ না দিয়ে

উপরের ডেকে বসে তাঁরি একটি উপাসক ঘূবকের সঙ্গে কৌতুকালাপে নিমগ্ন আছেন। মাঝে মাঝে উচ্চহাস্য করে উঠছেন, আবার মাঝে মাঝে গুন্ গুন্ স্বরে ধর্মসঙ্গীতেও যোগ দিচ্ছেন।

আজ আহ্বারের সময় একটি নূতন সংবাদের সৃষ্টি করা গেছে। ছোটো টেবিলটিতে আমরা তিন জনে ব্রেকফাস্ট খেতে বসেছি। একটা শক্ত গোলাকার রুটির উপরে ছুরি চালনা করতে গিয়ে ছুরিটা সবলে পিছলে আমার বাম হাতের ছই আঙুলের উপর এসে পড়ল। রক্ত চারদিকে ছিটকে পড়ে গেল। তৎক্ষণাৎ আহ্বারে ভঙ্গ দিয়ে ক্যাবিনে পলায়ন করলুম। ইতিহাসে অনেক রক্তপাত লিপিবদ্ধ হয়েছে—আমার ডায়ারিতে আমার এই রক্তপাত লিখে রাখলুম;—ভাবী বঙ্গবীরদের কাছে গৌরবের প্রার্থী নই, বর্তমান বঙ্গাঙ্গনাদের মধ্যে কেউ যদি একবার “আহা” বলেন।

১ সেপ্টেম্বর। সন্ধ্যার পর আহ্বারান্তে উপরের ডেকে আমাদের যথাস্থানে আশ্রয় গ্রহণ করা গেল। মুহূ শীতল বায়ুতে আমার বহু ঘুমিয়ে পড়েছেন এবং দাদা অলসভাবে ধূমসেবন করছেন, এমন সময়ে নিচের ডেকে নাচের বাজনা বেজে উঠল। সকলে মিলে জুড়ি জুড়ি ঘূর্ণনৃত্য আরম্ভ হোলো।

তখন পূর্বদিকে নব কৃষ্ণপক্ষের পূর্ণপ্রায় চন্দ্র ধীরে ধীরে সমুদ্রশয়ন থেকে উঠে আসছে। এই তীররেখাশূন্য জলময় মহামকর পূর্বসীমাতে উদয়পথের ঠিক নিচে থেকে আমাদের জাহাজ পর্যন্ত অন্ধকার সমুদ্রের মধ্যে প্রশস্ত দীর্ঘ আলোকপথ ঝিক্‌ঝিক্‌ করছে। জ্যোৎস্নাময়ী সন্ধ্যা কোন এক অলৌকিক বস্তুর উপরে অপূর্ব শুভ্র রঞ্জনীপঙ্কর মতো আপন প্রশান্ত সৌন্দর্যে নিঃশব্দে চতুর্দিকে দলপ্রসারণ করল। আর মানুষগুলো পরস্পরকে জড়াজড়ি করে ধরে পাগলের মতো তীব্র আমোদে ঘূরণাক খাচ্ছে, হাঁপাচ্ছে, উত্তপ্ত হয়ে উঠছে।

৩ সেপ্টেম্বর। বেলা দশটার সময় হয়েজখালের প্রবেশমুখে এসে জাহাজ থামল। চারিদিকে চমৎকার রঙের খেলা। পাহাড়ের উপর রৌদ্র, ছায়া এবং নীলিমবাম্প। ঘননীল সমুদ্রের প্রান্তে বালুকাতীরের রৌদ্রদুঃসহ গাঢ় পীত রেখা।

খালের মধ্যে দিয়ে জাহাজ সমস্ত দিন অতি ধীরগতিতে চলছে। দুধারে তরুহীন বালুকা। কেবল মাঝে মাঝে এক একটি ছোট্ট কোঠাঘর বহুযত্নবদ্ধিত গুটিকতক গাছে-পালায় বেষ্টিত হয়ে আরামজনক দেখাচ্ছে।

অনেক রাতে আধখানা চাঁদ উঠল। ক্ষীণ চন্দ্রালোকে দুই তীর অম্পষ্ট ধূ ধূ করছে।—রাত দুটো তিনটের সময় জাহাজ পোর্টসৈয়েদে নোঙর করলে।

৪ সেপ্টেম্বর। এখন আমরা ভূমধ্যসাগরে, যুরোপের অধিকারের মধ্যে। বাতাসও শীতল হয়ে এসেছে, সমুদ্রও গাঢ়তর নীল। আজ রাত্রে আর ডেকের উপর শোওয়া হোলো না।

৫ সেপ্টেম্বর। বিকালের দিকে ক্রীট দ্বীপের তটপর্কিত দেখা দিয়েছিল। ডেকের উপর একটা ষ্টেজ্ বান্ধা হুচ্ছে। জাহাজে একদল নাট্য ব্যবসায়ী যাত্রী আছে তারা অভিনয় করবে। অল্পদিনের চেয়ে সকাল সকাল ডিনর খেয়ে নিয়ে তামাসা আরম্ভ হোলো। প্রথমে যাত্রীদের মধ্যে ধারা গানবাজনা কিঞ্চিৎ জানেন এবং জানেন না, তাঁদের কারো বা দুর্বল পিয়নো টিং টিং কারো বা মৃদু ক্ষীণকণ্ঠে গান হোলো। তার পরে যবনিকা উদ্ঘাটন ক'রে নটনটী কর্তৃক “ব্যালো” নাচ, সং নিগ্রোর গান, জাহাজ প্রহসন অভিনয় প্রভৃতি বিবিধ কৌতুক হয়েছিল। মধ্যে নাটিকাশ্রমের জন্তে দর্শকদের কাছ থেকে টাকা সংগ্রহ হোলো।

৬ সেপ্টেম্বর। খাবার ঘরে খোলা জানলার কাছে বসে বাড়িতে চিঠি লিখছি। একবার মুখ তুলে বামে চেয়ে দেখলুম “আয়োনিয়ান” দ্বীপ দেখা দিয়েছে। পাহাড়ের কোলের মধ্যে সমুদ্রের ঠিক ধারেই মনুষ্যরচিত ঘনসন্নিবিষ্ট একটি শ্বেত মৌচাকের মতো দেখা যাচ্ছে। এইটি জ্যান্টিসহর (Zanthe)। দূর থেকে মনে হচ্ছে যেন পর্বতটা তা’র প্রকাণ্ড করপুটে কতকগুলো শ্বেত পুষ্প নিয়ে সমুদ্রকে অঞ্জলি দেবার উপক্রম করছে।

ডেকের উপর উঠে দেখি আমরা দুই শৈলশ্রেণীর মাঝখান দিয়ে সঙ্কীর্ণ সমুদ্রপথে চলেছি। আকাশে মেঘ ক’রে এসেছে, বিদ্যুৎ চমকচ্ছে, ঝড়ের সম্ভাবনা। আমাদের সর্বোচ্চ ডেকের চাঁদোয়া খুলে ফেলে দিলে। পর্বতের উপর অত্যন্ত নিবিড় মেঘ নেমে এসেছে; কেবল দূরে একটিমাত্র পাহাড়ের উপর মেঘছিদ্রমুক্ত সন্ধ্যালোকের একটি দীর্ঘ আরক্ত ইঙ্গিত এসে স্পর্শ করেছে, অল্প সবগুলো আসন্ন বাটিকার ডায়ারি আচ্ছন্ন। কিন্তু ঝড় এল না। একটু প্রবল বাতাস এবং সবেগ বৃষ্টির উপর দিব্যই সমস্ত কেটে গেল। ভূমধাসাগরে আকাশের অবস্থা অত্যন্ত অনিশ্চিত। শুনলুম, আমরা যে পথ দিয়ে যাচ্ছি এখান দিয়ে জাহাজ সচরাচর যায় না। জায়গাটা নাকি ভারি ঝোড়ো।

বাত্রে ডিনরের পর যাত্রীর কাপ্তানের স্বাস্থ্যপান এবং গুণগান করলে। কাল ত্রিদিশি পৌছব। জিনিষপত্র বাঁধতে হবে।

৭ সেপ্টেম্বর। আজ সকালে ত্রিদিশি পৌছন গেল। মেলগাড়ি প্রস্তুত ছিল, আমরা গাড়িতে উঠলুম।

গাড়ি যখন ছাড়ল তখন টিপ্টিপ্ ক’বে বৃষ্টি আরম্ভ হয়েছে। আহার ক’রে এসে একটি কোণে জানলার কাছে বসি গেল।

প্রথমে, দুইধারে কেবল আঙুরের স্কেত। তার পরে জলপাইয়ের

বাগান। জলপাইয়ের গাছগুলো নিতান্ত বাঁকাচোরা, গ্রহি ও ফাটল-বিশিষ্ট, বলি-অঙ্কিত, বেঁটেখাটো রকমের; পাতাগুলো উর্দ্ধমুখ; প্রকৃতির হাতের কাজে যেমন একটি সহজ অনায়াসের ভাব দেখা যায়, এই গাছ-গুলোয় তার বিপরীত। এরা নিতান্ত লক্ষীছাড়া, কায়ক্ৰেশে অষ্টাবক্র হয়ে দাঁড়িয়ে আছে; এক একটা এমন বৈকে খুঁকে পড়েছে যে পাথর উঁচু করে তাদের ঠেকো দিয়ে রাখতে হয়েছে।

বামে চষা মাঠ; শাদা শাদা ভাঙা ভাঙা পাথরের টুকরো চষা মাটির মধ্যে মধ্যে উৎক্ষিপ্ত। দক্ষিণে সমুদ্র। সমুদ্রের একেবারে ধারেই এক একটি ছোটো ছোটো সহর দেখা দিচ্ছে। চর্চচূড়া-মুকুটিত শাদা ধ্বংসবে নগরীটি একটি পরিপাটি তরী নাগরীর মতো কোলের কাছে সমুদ্র-দর্পণ-রেখে নিজের মুখ দেখে হাসছে। নগর পেরিয়ে আবার মাঠ। ভূটার ক্ষেত, আঙুরের ক্ষেত, ফলের ক্ষেত, জলপাইয়ের বন; ক্ষেতগুলি খণ্ড প্রস্তরের বেড়া দেওয়া। মাঝে মাঝে এক একটি বাঁধা কূপ। দূরে দূরে দুটো একটা সঙ্গীহীন ছোটো শাদা বাড়ি।

সূর্যাস্তের সময় হয়ে এল। আমি কোলের উপর এক খোলো আঙুর নিয়ে বসে বসে এক আধটা করে মুখে দিচ্ছি। এমন মিষ্ট টস্টসে, স্বগন্ধ আঙুর ইতিপূর্বে কখনো খাইনি। মাথায় রঙীন রুমাল বাঁধা ঐ ইতালীয়া যুবতীকে দেখে আমার মনে হচ্ছে, ইতালীয়ানীরা এখানকার আঙুরের গুচ্ছের মতো, অম্নি একটি বৃন্ততরা অজস্র স্ফডোল সৌন্দর্য্য, যৌবনরসে অম্নি উৎপূর্ণ,—এবং ঐ আঙুরেরই মতো তাদের মুখের রং—অতি বেশি সাদা নয়।

এখন একটা উচ্চ সমুদ্রতটের উপর দিয়ে চলেছি। আমাদের ঠিক নিচেই ডানদিকে সমুদ্র। ভাঙাচোরা জমি ঢালু হয়ে জলের মধ্যে প্রবেশ করেছে। গোটা চার পাঁচ পাল-মোড়া নৌকো ডাঙার উপর

তোলা। নিচেকার পথ দিয়ে গাধার উপর চড়ে লোক চলেছে। সমুদ্রতীরে কতকগুলো গরু চরছে—কী খাচ্ছে ওরাই জানে ;—মান্নে মান্নে কেবল কতকগুলো শুকনো খড়কের মতো আছে মাত্র।

রাত্রে আমরা গাড়ির ভোজনশালায় ডিনরে বসেছি, এমন সময়ে গাড়ি একটা ষ্টেশনে এসে দাঁড়াল। একদল নরনারী প্ল্যাটফর্মে ভীড় করে বিশেষ কৌতূহলের সঙ্গে আমাদের ভোজ দেখতে লাগল। তারি মধ্যে গ্যাসের আলোকে দুটি একটি সুন্দর মেয়ের মুখ দেখা যাচ্ছিল, তাতে ক'রে ভোজনপাত্র থেকে আমাদের চিত্তকে অনেকটা পরিমাণে বিক্ষিপ্ত করছিল। ট্রেন ছাড়বার সময় আমাদের সহযাত্রীগণ তাদের প্রতি অনেক টুপি কুমাল আন্দোলন, অনেক চুষন-সঙ্কেত প্রেরণ, তারম্বরে অনেক উল্লাসধ্বনি প্রয়োগ করলে ; তারাও গ্রীবা আন্দোলনে আমাদের প্রত্যাভিবাদন করতে লাগল।

৮ সেপ্টেম্বর। কাল আড্রিয়াটিকের সমতল শ্রীহীন তীরভূমি দিয়ে আসছিলুম, আজ শশুশ্রামলা লম্বাডির মধ্যে দিয়ে গাড়ি চলছে। চারিদিকে আঙুর, জলপাই, ভুট্টা ও তুঁতের ক্ষেত। কাল যে আঙুরের লতা দেখা গিয়েছিল সেগুলো ছোটো ছোটো গুল্মের মতো। আজ দেখছি, ক্ষেতময় লম্বা লম্বা কাঠি পোঁতা, তারি উপর ফলগুচ্ছপূর্ণ দ্রাক্ষালতা লতিয়ে উঠেছে।

ক্রমে পাহাড় দেখা দিচ্ছে। পাহাড়গুলি উপর থেকে নিচে পর্যাস্ত দ্রাক্ষাদণ্ডে কণ্টকিত হয়ে উঠেছে, তারি মাঝখানে এক একটি লোকালয়।

রেলের লাইনের ধারে দ্রাক্ষাক্ষেত্রের প্রান্তে একটি ক্ষুদ্র কুটার ; এক হাতে তারি একটি ছয়ার ধ'রে এক হাত কোমরে দিয়ে একটি ইতালিয়ান নৃতী সেকৌতুক রুঞ্চনেত্রে আমাদের গাড়ির গতি নিরীক্ষণ

করছে। অনতিদূরে একটি বাগিকা একটা প্রথরশৃঙ্গ প্রকাণ্ড গফুর গলার দড়িটি ধরে নিশ্চিন্তমনে চরিয়ে নিয়ে বেড়াচ্ছে। তার থেকে আমাদের বাংলা দেশের নব দম্পতির চিত্র মনে পড়ল। মস্ত একটা চষমা-পরা গ্র্যাজুয়েট-পুঙ্গব, এবং তারি দড়িটা ধরে ছোটো একটা চোদ্দ পনেরো বৎসরের নোলকপরা নববধূ; জঙ্ঘাটি দিব্যি পোষ মেনে চরে বেড়াচ্ছে, এবং মাঝে মাঝে বিস্ফারিত নয়নে কত্রীর প্রতি দৃষ্টিপাত করছে।

ট্যুরিন্ স্টেশনে আসা গেল। এ দেশের সামান্য পুলিশমানের সাজ দেখে অবাক হোতে হয়। মস্ত চূড়াওয়াল টুপি, বিস্তর জরিজরাও, লম্বা তলোয়ার,—সকল ক'টিকেই সম্রাটের জ্যেষ্ঠপুত্র ব'লে মনে হয়।

দক্ষিণে বামে তুবারেরখান্ধিত সুনীল পর্বতশ্রেণী। বামে ঘনচ্ছায়া-ম্লিঙ্ঘ অরণ্য। যেখানে অরণ্যের একটু বিচ্ছেদ পাওয়া যাচ্ছে সেই-খানেই শস্তক্ষেত্র তরুশ্রেণী ও পর্বতসমেত এক একটা নব নব আশ্চর্য্য দৃশ্য খুলে যাচ্ছে। পর্বতশৃঙ্খের উপর পুরাতন দুর্গশিখর, তনদেশে এক একটি ছোটো ছোটো গ্রাম। যত এগোচ্ছি অরণ্যপর্বত ক্রমশ ঘন হয়ে আসছে। মাঝে মাঝে যে গ্রামগুলি আসছে সেগুলি তেমন উদ্ধত শুভ্র নবীন পরিপাটি নয়; একটু যেন শ্লান দরিদ্র নিভৃত; একটু আধটি চর্কের চূড়া আছে মাত্র; কিন্তু কল কারখানার ধূমোৎসারী বৃংহিতধ্বনিত উৎকৃষ্ট ইষ্টকশুণ্ড নেই।

ক্রমে অল্পে অল্পে পাহাড়ের উপরে ওঠা যাচ্ছে। পার্শ্বতাপথ সাপের মত একে বঁকে চলেছে; চালু পাহাড়ের উপর চষাক্ষেত সোপানের মতো থাকে থাকে উঠেছে। একটা গিরিনদী স্বচ্ছ সফেন জলরাশি নিয়ে সঙ্কীর্ণ উপলপথ দিয়ে ঝরে পড়ছে।

গাড়িতে আলো দিয়ে গেল। এখনি মণ্ট্ সেনিসের বিখ্যাত দীর্ঘ

রেলোয়ে-স্ট্রেকের মধ্যে প্রবেশ করতে হবে গছেরটি উত্তীর্ণ হোতে প্রায় আধঘণ্টা লাগল।

এইবার ফ্রান্স। দক্ষিণে এক জলস্রোত ফেনিয়ে ফেনিয়ে চলেছে। ফরাসী জাতির মতো দ্রুত চঞ্চল উচ্ছ্বলিত হান্তপ্রিয় কলভাষী।

ফ্রান্সের প্রবেশদ্বারে একবার একজন কাম্বোচীয় গাড়িতে এসে জিজ্ঞাসা করে গেল আমাদের মাঙ্গল দেবার যোগ্য জিনিষ কিছু আছে কি না—আমরা বললুম, না। আমাদের একজন বুদ্ধ সহযাত্রী ইংরাজ বলেন, I don't parlez-vous francaise.

সেই স্রোত এখনো আমাদের ডান দিক দিয়ে চলেছে। তার পূর্বতীরে “ফার” অরণ্য নিয়ে পাহাড় দাঁড়িয়ে আছে। চঞ্চলা নির্ঝরিতা বঁকে চুরে ফেনিয়ে ফুলে’ নেচে কলরব ক’রে পাথরগুলোকে সর্কাক্ষ দিয়ে ঠেলে রেলগাড়ির সঙ্গে সমান দৌড় দিয়েছে। মাঝে মাঝে একটা লোহার সঁকো-মুষ্টি দিয়ে তা’র ক্ষীণ কটিদেশ পরিমাপ করবার চেষ্টা করছে। এক জায়গায় জলরাশি খুব সঙ্কীর্ণ; দুই তীরের শ্রেণীবদ্ধ দীর্ঘ বৃক্ষগুলি শাখায় শাখায় বেঠন ক’রে দুঃস্থ স্রোতকে অন্তঃপুরে বন্দী করতে বুধা চেষ্টা করছে। উপর থেকে বরণা এসে সেই প্রবাহের সঙ্গে মিশছে। বরাবর পূর্বতীর দিয়ে একটি পার্কিত্য পথ সমরেথায় স্রোতের সঙ্গে বঁকে চলে গেছে। এক জায়গায় আমাদের সহচরীর সঙ্গে বিচ্ছেদ হোলো। হঠাৎ সে দক্ষিণ থেকে বামে এসে এক অজ্ঞাত সঙ্কীর্ণ শৈলপথে অন্তর্হিত হয়ে গেল।

গ্রামল তৃণাচ্ছন্ন পর্বতশ্রেণীর মধ্যে এক একটা পাহাড় তৃণহীন সহস্র রেখাক্তিত পাষাণ-কঙ্কাল প্রকাশ ক’রে নগ্নভাবে দাঁড়িয়ে আছে; কেবল তা’র মাঝে মাঝে এক এক জায়গায় খানিকটা ক’রে অরণ্যের খণ্ড আবরণ রয়েছে। প্রচণ্ড সংগ্রামে একটা দৈত্য সহস্র সহস্র নখের

বিদারণরেখা রেখে যেন ওর শ্রামল স্বক্ অনেকখানি ক'রে ঝাঁচড়ে ছিঁড়ে নিয়েছে।

আবার হঠাৎ ডান দিকে আমাদের সেই পূর্বসঙ্গিনী মুহূর্তের জন্তে দেখা দিয়ে বামে চলে গেল। একবার দক্ষিণে একবার বামে, একবার অন্তরালে। আবার হয়তো যেতে যেতে কোন্ এক পর্বতের আড়াল থেকে সহসা কলহাশ্বে করতালি দিয়ে আচম্কা দেখা দেবে।

সেই জলপাই এবং ড্রাকাকুঞ্জ অনেক কমে গেছে। বিবিধ শস্তের ক্ষেত্র এবং দীর্ঘ সরল পল্লার গাছের শ্রেণী। ভুট্টা, তামাক, নানাবিধ শাক সব্জি। কেবলি যেন বাগানের পর বাগান। এই কঠিন পর্বতের মধ্যে মানুষ বহুদিন থেকে বহু যত্নে প্রকৃতিকে বশ ক'রে তার উচ্চ জলতা হরণ করেছে। প্রত্যেক ভূমিখণ্ডের উপর মানুষের কত প্রয়াস প্রকাশ পাচ্ছে। এদেশের লোকেরা যে আপনার দেশকে ভালোবাসবে তাতে কিছু আশ্চর্য্য নেই। এরা আপনার দেশকে আপনার যত্নে আপনার ক'রে নিয়েছে। এখানে প্রকৃতির সঙ্গে মানুষের বহুকাল থেকে একটা বোঝাপড়া হয়ে আসছে, উভয়ের মধ্যে ক্রমিক আদান প্রদান চলছে, তারা পরস্পর স্থপরিচিত এবং ঘনিষ্ঠ সম্পর্কে আবদ্ধ। একদিকে প্রকাণ্ড প্রকৃতি উদাসীনভাবে দাঁড়িয়ে আর একদিকে বৈরাগ্যবুদ্ধ মানব উদাসীনভাবে শুয়ে—যুরোপের সে ভাব নয়। এদের এই স্তম্ভরী ভূমি এদের একান্ত সাধনার ধন, একে এরা নিয়ত বহু আদর ক'রে রেখেছে। এর জন্তে যদি প্রাণ না দেবে তো কিসের জন্তে দেবে! এই প্রেয়সীর প্রীতি কেউ তিলমাত্র হস্তক্ষেপ করলে কি আর সহ্য হয়? আমরা তো জঙ্গলে থাকি; খাল বিল বন বাদাড ভাঙারাস্তা এবং পানাপুকুরের ধারে বাস করি। ক্ষেত থেকে দুমুঠে ধান আনি, মেয়েরা আঁচল ভরে শাক তুলে নিয়ে আসে, ছেলেরা পাকের মধ্যে নেমে চিংড়িমাছ ধরে

‘আনে, প্রাদ্রণের গাছ থেকে গোটাকতক তেঁতুল পাড়ি, তার পরে শুকনো কাঠফুট সংগ্রহ ক’রে একবেলা অথবা দুবেলা কোনো রকম ক’রে আহার চলে যায় ; ম্যালেরিয়া এসে যখন জীর্ণ অস্থিকঙ্কাল কাঁপিয়ে তোলে তখন কাঁথা মুড়ি দিয়ে রৌদ্রে পড়ে থাকি, গ্রীষ্মকালে শুষ্কপ্রায় পঙ্ককুণ্ডের হরিদ্বর্ণ জলাবশেষ থেকে উঠে এসে ওলাওঠা যখন আমাদের গৃহ আক্রমণ করে তখন ওলাদেবীর পূজা দিই, এবং অদৃষ্টের দিকে কোটর-প্রবিষ্ট হতাশ শূন্যদৃষ্টি বদ্ধ ক’রে দল বেঁধে মরতে আরম্ভ করি। আমরা কি আমাদের দেশকে পেয়েছি না পেতে চেষ্টা করেছি? আমরা ইহলোকের প্রতি উদাস্ত ক’রে এখানে কেবল অনিচ্ছুক পথিকের মতো যেখানে সেখানে পড়ে থাকি এবং যত শীঘ্র পারি দ্রুতবেগে বিশ পঁচিশটা বৎসর ডিঙিয়ে একেবারে পরলোকে গিয়ে উপস্থিত হই।

কিন্তু এ কী চমৎকার চিত্র! পর্কতের কোলে, নদীর ধারে, হ্রদের তীরে পপ্লর-উইলোবেষ্টিত কাননশ্রেণী। নিরুন্টক নিরাপদ নিরাময় ফলশস্তপরিপূর্ণ প্রকৃতি প্রতিক্ষেণে মানুষের ভালোবাসা পাচ্ছে এবং মানুষকে দ্বিগুণ ভালোবাসছে। মানুষের মতো জীবের এইতো যোগ্য আবাসস্থান। মানুষের প্রেম এবং মানুষের ক্ষমতা যদি আপনার চতুর্দিককে সংযত সুন্দর সমুজ্জল ক’রে না তুলতে পারে তবে তরুকোটর গুহাগহ্বর বনবাসী জন্তুর সঙ্গে মানুষের প্রভেদ কী?

৮ সেপ্টেম্বর। পথের মধ্যে আমাদের প্যারিসে নাববার প্রস্তাব হচ্ছে। কিন্তু আমাদের এই ট্রেন প্যারিসে যায় না—একটু পাশ কাটিয়ে যায়। প্যারিসের একটি নিকটবর্তী ষ্টেশনে স্পেশাল ট্রেন প্রস্তুত রাখবার জন্তে টেলিগ্রাফ করা গেল।

রাত দু’টোর সময় আমাদের জাগিয়ে দিলে। ট্রেন বদল করতে হবে। জিনিষপত্র বেঁধে বেরিয়ে পড়লুম। বিষম ঠাণ্ডা। অনতিদূরে

আমাদের গাড়ি দাঁড়িয়ে। কেবলমাত্র একটি এঞ্জিন, একটি ফষ্টক্লাস এবং একটি ব্রেকভ্যান। আরোহীর মধ্যে আমরা তিনটি ভারতবর্ষীয়। রাত তিনটের সময় প্যারিসের জনশূন্য বৃহৎ ষ্টেশনে পৌঁছন গেল। সুপ্রোথিত দুই একজন “মসিয়” আলো হস্তে উপস্থিত। অনেক হাঙ্গাম ক’রে নিদ্রিত কাষ্টম্ হোস্কে জাগিয়ে তা’র পরীক্ষা থেকে উত্তীর্ণ হয়ে একটা গাড়ি ভাড়া করলুম। তখন প্যারিস তা’র সমস্ত দ্বার রুদ্ধ ক’রে স্তর রাজপথে দীপশ্রেণী আলিয়ে রেখে নিদ্রামগ্ন। আমরা হোটেল টার্মিনুতে আমাদের শয়নকক্ষে প্রবেশ করলুম। পরিপাটি, পরিচ্ছন্ন, বিদ্যুদুজ্জ্বল, স্ফটিকমণ্ডিত, কার্পেটারত, চিত্রিতভিত্তি, নীলঘবনিকা প্রচ্ছন্ন শয়নশালা; বিহগপক্ষসুকোমল শুভ্র শয্যা।

বেশ বদল ক’রে শয়নের উদ্যোগ করবার সময় দেখা গেল আমাদের জিনিষপত্রের মধ্যে আর এক জনের ওভারকোট্ গাত্রবস্ত্র। আমরা তিনজনেই পরস্পরের জিনিষ চিনিনে; স্তরাতং হাতের কাছে যে-কোনো অপরিচিত বস্তু পাওয়া যায় সেইটেই আমাদের কারো-না-কারো স্থির ক’রে অসংশয়ে সংগ্রহ ক’রে আনি। অবশেষে নিজের নিজের জিনিষ পৃথক ক’রে নেবার পর উদ্ভক্ত সামগ্রী পাওয়া গেলে, তা আর পূর্বাধিকারীকে ফিরিয়ে দেবার কোনো স্মযোগ থাকে না। ওভারকোট্টি রেলগাড়ি থেকে আনা হয়েছে; যার কোট্ সে বেচারার বিশ্বস্তচিত্তে গভীর নিদ্রায় মগ্ন। গাড়ি এতক্ষণে সমুদ্রতীরস্থ ক্যালেন নগরীর নিকট-বর্তী হয়েছে। লোকটি কে, এবং সমস্ত বৃটিশ রাজ্যের মধ্যে তার ঠিকানা কোথায়, আমরা কিছুই জানিনে। মাঝের থেকে তার লম্বা কুত্তি এবং আমাদের পাপের ভার স্বক্লেব উপর বহন ক’রে বেড়াচ্ছি—প্রায়শ্চিত্তের পথ বন্ধ। মনে হচ্ছে, একবার যে লোকটির কপল হরণ করেছিলুম এ কুর্ভিত্তি তার। সে বেচারার বৃদ্ধ, শীতপীড়িত, বাহে পঙ্গু, অ্যাংলো-

ইণ্ডিয়ন পুলিস অধ্যক্ষ। পুলিসের কাজ ক'রে মানবচরিত্রের প্রতি সহজেই তার বিশ্বাস শিথিল হয়ে এসেছে, তার পরে যখন কাল প্রত্যুষে ব্রিটিশ চ্যানেল পার হবার সময় তীব্র শীতবায়ু তার হৃৎকুন্তি জীর্ণ দেহকে কম্পায়িত ক'রে তুলবে তখন সেই সঙ্গে মহুশ্যজাতির সাধুতার প্রতিও তার বিশ্বাস কম্পিত হোতে থাকবে।

৯ সেপ্টেম্বর। প্রাতঃকালে দ্বিতীয়বার বেশ পরিবর্তন করবার সময় দেখা গেল আমার বন্ধুর একটি পোর্টম্যান্টো পাওয়া যাচ্ছে না।

পুলিসে সংবাদ দিয়ে প্রাতঃকালে তিনজনে প্যারিসের পথে পদব্রজে বেরিয়ে পড়লুম। প্রকাণ্ড রাজপথ দোকান বাগান প্রাসাদ প্রস্তরমূর্তি ফোয়ারা লোকজন গাড়িঘোড়ার মধ্যে অনেক ঘুরে ঘুরে এক ভোজন-গৃহের বিরাট স্ফটিকশালার প্রান্তটেবিলে ব'সে অন্ন আহাৰ ক'রে এবং বিস্তর মূল্য দিয়ে ষ্টেফেল্ স্তম্ভ দেখতে গেলেম। এই লৌহস্তম্ভ চারি পায়েৰ উপরে ভর দিয়ে এক বাগানের মাঝখানে দাঁড়িয়ে আছে। কলের দোলায় চ'ড়ে এই স্তম্ভের চতুৰ্থ তলায় উঠে নিম্নে সমস্ত প্যারিসটাকে খুব একটা বড়ো ম্যাপের মতো প্রসারিত দেখতে পেলুম।

বলা বাহুল্য, এমন ক'রে একদিনে তাড়াতাড়ি চক্ষু দ্বারা বহির্ভাগ লেহন ক'রে প্যারিসের রসায়াদন করা যায় না। এ যেন, ধনীগৃহের মেয়েদের মতো বন্ধ পাঙ্কির মধ্যে থেকে গঙ্গান্নান করার মতো—কেবল নিতান্ত তীরের কাছে একটা অংশে এক ডুবে যতখানি পাওয়া যায়। কেবল হাঁপানিই সার।

হোটেলে এসে দেখলুম পুলিসের সাহায্যে বন্ধুর পোর্টম্যান্টো ফিরে এসেছে, কিন্তু এখনো সেই পরের হৃৎকোৰ্ত্তী সম্বন্ধে কিংকৰ্ত্তব্যবিমূঢ় হয়ে আছি।

১০ সেপ্টেম্বর। লণ্ডন অভিমুখে চললুম। সন্ধ্যার সময় লণ্ডনে

পৌছে দুই-একটি হোটেল সন্বেষণ ক'রে দেখা গেল স্থানাভাব। অবশেষে একটি ভদ্র পরিবারের মধ্যে আশ্রয় গ্রহণ করা গেল।

১১ সেপ্টেম্বর। সকালবেলায় আমাদের পুরাতন বন্ধুদের সন্ধানে বাহির হওয়া গেল।

প্রথমে, লণ্ডনের মধ্যে আমার সর্কাপেক্ষা পরিচিত বাডির দ্বাবে গিয়ে আঘাত করা গেল। যে দাসী এসে দরজা খুলে দিলে তাকে চিনি। তাকে জিজ্ঞাসা করলুম আমার বন্ধু বাড়িতে আছেন কি না। সে বললে তিনি এ বাড়িতে থাকেন না। জিজ্ঞাসা করলুম, কোথায় থাকেন? সে বললে, আমি জানিনে, আপনারা ঘরে এসে বসুন, আমি জিজ্ঞাসা করে আসছি। পূর্বে যে ঘরে আমরা আহার করতুম সেই ঘরে গিয়ে দেখলেম সমস্ত বদল হয়ে গেছে—সেখানে টেবিলের উপর খবরের কাগজ এবং বই—সে ঘর এখন অতিথিদের প্রতীক্ষাশালা হয়েছে। খানিকক্ষণ বাদে দাসী একটি কার্ডে লেখা ঠিকানা এনে দিলে। আমার বন্ধু এখন লণ্ডনের বাইরে কোনো এক অপরিচিত স্থানে থাকেন। নিরাশ হৃদয়ে আমার সেই পরিচিত বাড়ি থেকে বেরলুম।

আমাদের গাড়ি মিস্ শ—য়ের বাডির সম্মুখে এসে দাঁড়াল। গিয়ে দেখি তিনি নির্জনগৃহে ব'সে একটি পীড়িত কুকুব শাবকের সেবার নিযুক্ত। জল বায়ু, পরম্পরের স্বাস্থ্য এবং কালের পরিবর্তন সম্বন্ধে কতকগুলি প্রচলিত শিষ্টালাপ করা গেল।

সেখান থেকে বেরিয়ে, লণ্ডনের স্তরঙ্গপথে যে পাতাল-বাস্থান চলে, তাই অবলম্বন ক'রে বাসায় ফেরবার চেষ্টা করা গেল। কিন্তু পরিণামে দেখতে পেলুম পৃথিবীতে সকল চেষ্টা সহজে সফল হয় না। আমরা দুই ভাই তো গাড়িতে চড়ে বেশ নিশ্চিন্ত ব'সে আছি; এমন সময়

গাড়ি যখন হামারুস্মিথ্ নামক দূরবর্তী স্টেশনে গিয়ে থামল তখন আমাদের বিশ্বাসপ রায়ণ চিত্তে ঈষৎ সংশয়ের সঞ্চার হোলো। একজনকে জিজ্ঞাসা করাতে সে স্পষ্ট বুঝিয়ে দিলে আমাদের গম্যস্থান যেদিকে এ গাড়ির গম্যস্থান সেদিকে নয়। পুনর্বার তিনচার স্টেশন ফিরে গিয়ে গাড়ি বদল করা আবশ্যিক। তাই করা গেল। অবশেষে গম্য স্টেশনে নেমে রাস্তায় বেরিয়ে আমাদের বাসা খুঁজে পাইনে। বিস্তর গবেষণার পর বেলা সাড়ে তিনটের সময় বাড়ি ফিরে ঠাণ্ডা টিফিন খাওয়া গেল। এইটুকু আত্মজ্ঞান জন্মেছে যে, আমরা দুটি ভাই লিভিংস্টোন অথবা ষ্টান্লির মতো ভৌগোলিক আবিষ্কার কার্যের যোগ্য নই ; পৃথিবীতে যদি অক্ষয় খ্যাতি উপার্জন করতে চাই তো নিশ্চয় অল্প কোনো দিকে মনোনিবেশ করতে হবে।

১২ সেপ্টেম্বর। আমাদের বন্ধুর একটি গুণ আছে তিনি যতই কল্পনার চর্চা করুন না কেন, কখনো পথ ভোলেন না। সুতরাং তাঁকেই আমাদের লগুনের পাণ্ডাপদে বরণ করেছি। আমরা যেখানে যাই তাঁকে সঙ্গে টেনে নিয়ে যাই, এবং তিনি যেখানে যান আমরা কিছুতেই তাঁর সঙ্গ ছাড়িনে। কিন্তু একটা আশঙ্কা আছে এ রকম অবিচ্ছেদ্য বন্ধুত্ব এ পৃথিবীতে সকল সময় সমাদৃত হয় না। হায় ! এ সংসারে কুম্ভমে কণ্টক, কলানাথে কলঙ্ক এবং বন্ধুত্বে বিচ্ছেদ আছে—কিন্তু, ভাগ্যিস আছে !

১৫ সেপ্টেম্বর। শ্রাভয় থিয়েটারে “গণ্ডোলিয়র্স” নামক একটি গীতিনাট্য অভিনয় দেখতে গিয়েছিলুম। আলোকে, সঙ্গীতে, সৌন্দর্যে, বর্ণবিভাসে, দৃশ্যে, নৃত্যে, হাস্যে, কোতুকে মনে হোলো একটা কোন কল্পনারাজ্যে আছি। মাঝে এক অংশে অনেকগুলি নর্তক নর্তকীতে মিলে নৃত্য আছে ; আমাব মনে হোলো যেন হঠাৎ এক সময়ে একটা

উন্মাদকর যৌবনের বাতাসে পৃথিবী জুড়ে নরনারীর একটা উলটু পালটু চেউ উঠেছে—তাতে আলোক এবং বর্ণচ্ছটা, সঙ্গীত এবং উৎফুল্লনয়নের উজ্জ্বল হাসি সহস্র ভঙ্গীতে চারিদিকে ঠিকরে পড়ছে।

১৬ সেপ্টেম্বর। আজ আমাদের গৃহস্বামীর কুমারী কণ্ঠা আমার কতকগুলি পুরাতন পূর্বশ্রুত স্মর পিয়নোয় বাজাচ্ছিলেন; তাই শুনে আমার গৃহ মনে পড়তে লাগল! সেই ভারতবর্ষের রৌদ্রালোকিত প্রাতঃকাল, মুক্ত বাতায়ন, অব্যাহত আকাশ এবং পিয়নো যন্ত্রে এই স্বপ্নবহ পরিচিত সঙ্গীতধ্বনি।

১৭ সেপ্টেম্বর। যে দুর্ভাগার শীতকোর্ভা আমরা বহন ক'রে ক'রে বেড়াচ্ছি, ইণ্ডিয়া আপিস যোগে সে আমাদের একটি পত্র লিখেছে—আমরাই যে তার গাত্রবস্ত্রটি সংগ্রহ ক'রে এনেছি সে বিষয়ে পত্রলেখক নিজের দৃঢ় বিশ্বাস প্রকাশ করেছে; তার সঙ্গে “ভ্রম ক্রমে” ব'লে একটা শব্দ যোগ ক'রে দিয়েছিল। একটা সন্তোষের বিষয় এই, যার কঞ্চল নিয়েছিলুম এটা তার নয়। ভ্রমক্রমে দুবার একজনের গরম কাপড় নিলে ভ্রম সপ্রমাণ করা কিছু কঠিন হোত।

১৯ সেপ্টেম্বর। এখানে রাস্তায় বেরিয়ে স্মৃথ আছে। স্মন্দর মুখ চোখে পড়বেই। শ্রীযুক্ত দেশানুরাগ যদি পারেন তো আমাকে ক্ষমা করবেন। নবনীর মতো স্নকোমল শুভ্র রঙের উপরে একখানি পাতলা টুকটুকে ঠোঁঠ, স্নগঠিত নাসিকা এবং দীর্ঘ পল্লববিশিষ্ট নিম্নল নীলনেত্র;—দেখে প্রবাসদুঃখ দূর হয়ে যায়। শুভানুরাগীরা শঙ্কিত এবং চিন্তিত হবেন, প্রিয় বয়স্হেরা পরিহাস করবেন কিন্তু এ কথা আমাকে স্বীকার করতেই হবে স্মন্দর মুখ আমার স্মন্দর লাগে। স্মন্দর হওরা এবং মিষ্ট ক'রে হাসা মানবীয় যেন একটি পরমাশ্চর্য্য ক্ষমতা। কিন্তু দুঃখের বিষয় আমার ভাগ্যক্রমে ঐ হাসিটা এদেশে কিছু বাহুল্যপরিমাণে পেয়ে

থাকি। অনেক সময়ে রাজপথে কোনো নীলনয়না পাছরমণীর সম্মুখবর্তী হবামাত্র সে আমার মুখের দিকে চেয়ে আর হাসি সঞ্চার করতে পারে না। তখন তাকে ডেকে ব'লে দিতে ইচ্ছা করে, “সুন্দরি, আমি হাসি ভালোবাসি বটে, কিন্তু এতটা নয়। তা ছাড়া বিশ্বাধর-সংলগ্ন হাসি যতই সুমিষ্ট হোক না কেন, তারো একটা যুক্তিসঙ্গত কারণ থাকা চাই; কারণ, মানুষ কেবলমাত্র যে সুন্দর তা নয়, মানুষ বুদ্ধিমান জীব। হে নীলাঙ্গনয়নে, আমি তো ইংরেজের মতো অসভ্য খাটো কুর্ভি এবং অসঙ্গত লম্বা ধুচুনি টুপি পরিনে, তবে হাসো কী দেখে? আমি স্ত্রী কি কুশ্রী সে বিষয়ে কোনো প্রসঙ্গ উত্থাপন করা রুচিবিক্রম কিন্তু এটা আমি জোর ক'রে বলতে পারি বিজ্ঞপের তুলি দিয়ে বিধাতাপুরুষ আমার মুখমণ্ডল অঙ্কিত করেন নি। তবে যদি রঙটা কোনো এবং চুলগুলো কিছু লম্বা দেখে হাসি পায় তাহলে এই পর্যন্ত বলতে পারি, প্রকৃতিভেদে হাশুরসসম্বন্ধে অদ্ভুত রুচিভেদ লক্ষিত হয়। তোমরা যাকে “হিউমার” বলে, আমার মতে কালো রঙের সঙ্গে তার কোনো কার্যকারণ সম্বন্ধ নেই। দেখছি বটে, তোমাদের দেশে মুখে কালি মেখে কাফ্রি সঙ্গে নৃত্যগীত করা একটা কৌতুকের মধ্যে গণ্য হয়ে থাকে। কিন্তু, কনক-কেশিনি, সেটা আমার কাছে নিতান্ত হৃদয়-হীন বর্বরতা ব'লে বোধ হয়।”

২২ সেপ্টেম্বর। আজ সন্ধ্যার সময় গোটাকতক বাংলা গান গাওয়া গেল। তার মধ্যে গুটি দুই তিন এখানকার শ্রোত্রীগণ বিশেষ পছন্দ করেছেন। আশা করি, সেটা কেবলমাত্র মৌখিক ভদ্রতা নয়। তবে চাপকা বলেছেন ইত্যাদি।

২২ সেপ্টেম্বর। আজকাল সমস্ত দিনই প্রায় জিনিষপত্র কিনে দোকানে দোকানে ঘুরে কেটে যাচ্ছে। বাড়ি ফিরে এলেই

আমার বন্ধু বলেন, এসো বিশ্রাম করিগে। তার পরে খুব সমারোহে বিশ্রাম করতে যাই। শয়নগৃহে প্রবেশ ক'রে বাঙ্কবটি অনতিবিলম্বে শয্যাতে আস্রয় করেন, আমি পার্শ্ববর্তী একটি সুগভীর কেদারার মধ্যে নিমগ্ন হয়ে বসি। তার পরে, কোনো বিদেশী কাব্যগ্রন্থ পাঠ করি, না হয়, দুজনে মিলে জগতের যত কিছু অতলম্পর্শ বিষয় আছে, দেখতে দেখতে তার মধ্যে তলিয়ে অন্তর্ধান করি। আজকাল এই ভাবে এতই অধিক বিশ্রাম করছি, যে, কাজের অবকাশ তিলমাত্র থাকে না। ড্রয়িংরুমে ভক্তলোকেরা গীতবাদ্য সদালাপ করেন, আমরা তার সময় পাইনে, আমরা বিশ্রামে নিযুক্ত। শরীর রক্ষার জন্তে সকলে কিয়ৎকাল মুক্ত বায়ুতে ভ্রমণাদি ক'রে থাকেন, সে হতেও আমরা বঞ্চিত, আমরা এত অধিক বিশ্রাম ক'বে থাকি। রাত ছোটো বাজল, আলো নিবিয়ে দিয়ে সকলেই আরামে নিদ্রা দিচ্ছে, কেবল আমাদের দুই হতভাগ্যের ঘুমোবার অবসর নেই, আমরা তখনো অত্যন্ত দুঃস্থ বিশ্রামে ব্যস্ত।

২৫ সেপ্টেম্বর। আজ এখানকার একটি ছোটোখাটো একজিবিশন্ দেখতে গিয়েছিলুম। গুনলুম, এটা প্যারিস্ একজিবিশনের অত্যন্ত সুলভ এবং সংক্ষিপ্ত দ্বিতীয় সংস্করণ। সেখানে চিত্রশালায় প্রবেশ ক'রে, কারোলু ড্যুরাঁ নামক একজন বিখ্যাত ফরাসী চিত্রকররচিত একটি বসনহীনা মানবীর ছবি দেখলুম। আমরা প্রকৃতির সকল শোভাই দেখি, কিন্তু মর্ত্যের এই চরম সৌন্দর্যের উপর, জীব-অভিব্যক্তির এই সর্বশেষ কীর্ত্তিখানির উপর, মানুষ স্বহস্তে একটি চির-অস্তুরাল টেনে রেখে দিয়েছে। এই দেহখানির স্নিগ্ধ শুভ্র কোমলতা এবং প্রত্যেক স্তম্ভাম স্তম্ভপুণ্ড্রিকার উপরে অসীম স্নন্দরের সযত্ন অঙ্গুলির সদ্যস্পর্শ দেখা যায় যেন। এ কেবলমাত্র দেহের সৌন্দর্য নয়, যদিও দেহের সৌন্দর্য যে বড়ো সামান্য

এবং সাধুজনের উপেক্ষণীয় তা বলতে পারিনে—কিন্তু এতে আরো অনেকখানি গভীরতা আছে। একটি প্রীতিরমণীয় সুকোমল নারী-প্রকৃতি, একটি অমরতুল্য মানবাত্মা এর মধ্যে বাস করে, তারি দিব্য লাবণ্য এর সর্বত্র উদ্ভাসিত। দূর থেকে চকিতের মতো সেই অনির্বচনীয় চির-রহস্যকে দেহের স্ফটিক বাতায়নে একটুখানি যেন দেখা গেল।

২৭ সেপ্টেম্বর। আজ লাইসীয়ম্ নাট্যাশালায় গিয়েছিলুম। স্বর্ট রচিত “ব্রাইড অফ লামারমুর” উপভাস নাট্যকারে অভিনীত হয়েছিল। বিখ্যাত অভিনেতা অতিং নায়ক সেজেছিলেন। তাঁর উচ্চারণ অস্পষ্ট এবং অঙ্গভঙ্গী অস্তুত। তৎসঙ্গেও তিনি কী এক নাট্যকৌশলে ক্রমশঃ দর্শকদের হৃদয়ে সম্পূর্ণ আধিপত্য স্থাপন করতে পারেন।

আমাদের সম্মুখবর্তী একটি বক্সে দুটি মেয়ে বসে ছিল। তার মধ্যে একটি মেয়ের মুখ রঙ্গভূমির সমস্ত দর্শকের চিত্ত এবং দূরবীন আকৃষ্ট করেছিল। নিখুঁৎ স্তম্ভর ছোটো মুখখানি, অল্প বয়স, দীর্ঘ বেণী পিঠে ঝুলছে—বেশভূবার আড়ম্বর নেই। অভিনয়ের সময় যখন সমস্ত আলো নিবিয়ে দিয়ে কেবল ষ্টেজের আলো জ্বলছিল এবং সেই আলো ষ্টেজের অনতিদূরবর্তী তার আধখানি মুখের উপর এসে পড়েছিল—তখন তার আলোকিত স্নকুমার মুখের রেখা এবং স্তম্ভঙ্গিম গ্রীবা অঙ্ককারের উপর চমৎকার চিত্রে রচনা করেছিল। হিতৈবীরা আমাকে পুনশ্চ মার্জনা করবেন—অভিনয়কালে সেদিকে আমার দৃষ্টি বদ্ধ হয়েছিল। কিন্তু দূরবীন কষাটা আমার আসে না। নিলঙ্ক স্পর্ধার সহিত পরস্পরের প্রতি অসঙ্কোচে দূরবীন প্রয়োগ করা নিতান্ত ক্লত মনে হয়।

২ অক্টোবর। একটি গুজরাটীর সঙ্গে দেখা হোলো। ইনি ভারতবর্ষ থেকে সমস্ত পথ জাহাজের ডেকে চ’ড়ে এসেছেন। তখন

শীতের সময়। মাছ মাংস খান না। সঙ্গে চিঁড়ে শুক ফল প্রভৃতি কিছু ছিল এবং জাহাজ থেকে শাক সব্জি কিছু সংগ্রহ করতেন। ইংরেজি অতি সামান্য জানেন। গায়ে শীত বস্ত্র অধিক নেই। লণ্ডনে স্থানে স্থানে উদ্ভিজ্জ ভোজের ভোজনশালা আছে সেখানে ছয় পেনিতে তাঁর আহার সমাধা হয়। যেখানে যা কিছু দ্রষ্টব্য জ্ঞাতব্য বিষয় আছে সমস্ত অনুসন্ধান ক'রে বেড়ান। বড়ো বড়ো লোকের সঙ্গে অসঙ্কোচে সাক্ষাৎ করেন। কী রকম ক'রে কথাবার্তা চলে বলা শক্ত। মধ্যে মধ্যে কার্ডিনাল্ গ্যানিঙের সঙ্গে ধর্ম্মালোচনা ক'রে আসেন। ইতিমধ্যে একজিবিশনের সময় প্যারিসে দুই মাস যাপন ক'রে এসেছেন এবং অবসরমতো আমেরিকায় যাবার সঙ্কল্প করছেন। ভারতবর্ষে এঁকে আমি জানতুম। ইনি বাংলা শিক্ষা ক'রে অনেক ভালো বাংলা বই গুজরাটিতে তর্জমা করেছেন। এঁর স্ত্রীপুত্র পরিবার কিছুই নেই। ভ্রমণ করা, শিক্ষা করা, এবং স্বদেশীয় সাহিত্যের উন্নতি সাধন করা এঁর একমাত্র কাজ। লোকটি অতি নিরীহ, শীর্ণ, খর্ব, পৃথিবীতে অতি অল্প পরিমাণ স্থান অধিকার করেন। এঁকে দেখে আমার আশ্চর্য্য বোধ হয়।

৬ অক্টোবর। এখানে আমাদের প্রবাসের সময় উত্তীর্ণ হয় নি, কিন্তু আমি আর এখানে পেরে উঠছিনে। বলতে লজ্জা বোধ হয়, আমার এখানে ভালো লাগছে না। সেটা গর্কের বিষয় নয়, লজ্জার বিষয়—সেটা আমার স্বভাবের ক্রটি।

যখন কৈফিয়ৎ সন্ধান করি তখন মনে হয় যে, যুরোপের যে ভাবটা আমাদের মনে জাজ্জল্যমান হয়ে উঠেছে, সেটা সেখানকার সাহিত্য ইতিহাস প'ড়ে। সেটা হচ্ছে আইডিয়ল্ যুরোপ। অস্তরের মধ্যে প্রবেশ না করলে সেটা প্রত্যক্ষ করবার জো নেই। তিন মাস, ছ'মাস কিম্বা ছ'বৎসর এখানে থেকে আমরা যুরোপীয় সভ্যতার কেবল হাত পা

নাড়া দেখতে পাই মাত্র। বড়ো বড়ো বাড়ি, বড়ো বড়ো কারখানা, নানা আমোদের জায়গা; লোক চলছে ফিরছে, যাচ্ছে আসছে, খুব একটা সমারোহ। সে যতই বিচিত্র, যতই আশ্চর্য্য হোক না কেন, তাতে দর্শককে শ্রান্তি দেয়; কেবলমাত্র বিশ্বয়ের উত্তেজনা চিত্তকে পরিপূর্ণ করতে পারে না বরং তাতে মনকে সর্বদা বিক্ষিপ্ত করতে থাকে।

অবশেষে এই কথা মনে আসে—আচ্ছা ভালোরে বাপু, আমি মেনে নিচ্ছি তুমি মস্ত সহর, মস্ত দেশ, তোমার ক্ষমতা এবং ঐশ্বর্য্যের সীমা নেই। অধিক প্রমাণের আবশ্যকতা নেই। এখন আমি বাড়ি যেতে পারলে বাঁচি। সেখানে আমি সকলকে চিনি, সকলকে বুঝি; সেখানে সমস্ত বাহ্যাবরণ ভেদ ক'রে মনুষ্যত্বের আনন্দ সহজে পাই। সহজে উপভোগ করতে পারি, সহজে চিন্তা করতে পারি, সহজে ভালোবাসতে পারি। যেখানে আসল মানুষটি আছে সেখানে যদি অবাধে যেতে পারতুম; তাহোলে বিদেশেও আপনার স্বজাতীয়কে দেখে এস্থানকে আর প্রবাস ব'লে মনে হোত না। কিন্তু এখানে এসে দেখি কেবল ইংরেজ কেবল বিদেশী;—তাদের চালচলন ধরণধারণ যা কিছু নূতন সেইটেই কেবল ক্রমিক চক্ষে পড়ে, যা চিরকালে পুরাতন সেটাটাকা প'ড়ে থাকে; সেই জন্তে এদের সঙ্গে কেবল পরিচয় হোতে থাকে কিন্তু প্রাণয় হয় না।

এইখানে কথামালায় একটা গল্প মনে পড়ছে।

একটা চতুর শূগাল একদিন স্তব্ধ বককে আহারে নিমন্ত্রণ করেছিল। বক সভায় গিয়ে দেখে বড়ো বড়ো থালা স্তম্ভিষ্ট লেছ পদার্থে পরিপূর্ণ। প্রথম শিষ্ট সম্ভাষণের পর শূগাল বল্লে “ভাই, এসো আরস্ত ক'রে দেওয়া যাক!” ব'লেই তৎক্ষণাৎ অবলীলাক্রমে লেহন করতে প্রবৃত্ত হোলো। বক তার দীর্ঘ চঞ্চু নিয়ে থালার মধ্যে যতই ঠোকর

মারে মুখে কিছুই তুলতে পারে না। অবশেষে চেষ্টায় নিবৃত্ত হয়ে স্বাভাবিক অটল গাঙ্গীর্থ্যে সরোবরকূলের ধানে নিমগ্ন হোলো। শৃগাল বোধ করি মাঝে মাঝে কটাক্ষপাত ক'রে বলছিল “ভাই খাচ্ছ না? যে! এ কেবল তোমাকে মিথ্যা কষ্ট দেওয়াই হোলো। তোমার যোগ্য আয়োজন হয় নি!” বক বোধ করি মাথা নেড়ে উত্তর দিয়েছিল “আহা সে কী কথা! রন্ধন অতি পরিপাটি হয়েছে। কিন্তু শরীর-গতিকে আজ আমার ক্ষুধা বোধ হচ্ছে না।” পরদিন বকের নিমন্ত্রণে শৃগাল গিয়ে দেখেন, লম্বা তাঁড়ের মধ্যে বিবিধ উপাদেয় সামগ্রী সাজানো রয়েছে। দেখে লোভ হয় কিন্তু তার মধ্যে শৃগালের মুখ প্রবেশ করে না। বক অনতিবিলম্বে লম্বচঞ্চালনা ক'রে ভোজনে প্রবৃত্ত হোলো। শৃগাল বাহিরের থেকে পাত্রলেহন এবং দুটো একটা উৎক্লিপ্ত খাঞ্চখণ্ডের স্বাদগ্রহণ ক'রে নিতান্ত ক্ষুধাতুর ভাবে বাড়ি ফিরে গেল।

জাতীয় ভোজে বিদেশীর অবস্থা সেইরকম। খাণ্ডটা উভয়ের পক্ষে সমান উপাদেয় কিন্তু পাত্রটা তফাৎ। ইংরেজ যদি শৃগাল হয় তবে তার সুবিস্তৃত গুত্র রক্তত থালের উপর উদ্ভাটিত পায়সান কেবল চক্ষে দর্শন ক'রেই আমাদের ক্ষুধিতভাবে চলে আসতে হয়, আর আমরা যদি তপস্বী বক হই, তবে আমাদের সুগভীর পাথরের পাত্রটার মধ্যে কী আছে শৃগাল তা ভালো ক'রে চক্ষেও দেখতে পায় না—দূর থেকে ঈর্ষ এবং ভ্রাণ নিয়েই তাকে ফিরতে হয়।

প্রত্যেক জাতির অতীত ইতিহাস এবং বাহ্যিক আচার ব্যবহারে তার নিজের পক্ষে সুবিধা কিন্তু অল্প জাতির পক্ষে বাধা। এই জন্ত ইংরেজসমাজ যদিও বাহ্যতঃ সাধারণসমক্ষে উদ্ভাটিত কিন্তু আমরা চক্ষুর অগ্রভাগটুকুতে তার দুই চার কঁোটার স্বাদ পাই মাত্র, ক্ষুধা নিবৃত্তি করতে পারিনে। সর্বজাতীয় ভোজ্য কেবল সাহিত্য-ক্ষেত্রেই সম্ভব।

সেখানে, যার লম্বা চকু সেও বঞ্চিত হয় না, যাব লোলজিহ্বা সেও পরিতৃপ্ত হয়।

কারণটা সাধারণের হৃদয়গ্রাহী হোক বা না হোক, এখানকার লোকের সঙ্গে হৌ-ডু-য়ু-ডু ব'লে, হাঁ ক'রে রাস্তায় ঘাটে পর্যটন ক'রে থিয়েটার দেখে, দোকান ঘুরে, কলকাবখানার তথ্য নির্ণয় ক'রে—এমন কি, স্তম্ভর মুখ দেখে আমাব শ্রান্তি বোধ হয়েছে।

অতএব স্থির করেছি এখন বাড়ি ফিরব।—

৭ অক্টোবর। “টেমস্” জাহাজে একটা ক্যাবিন স্থির ক'রে আসা গেল। পরশু জাহাজ ছাডবে।

৯ অক্টোবর। জাহাজে ওঠা গেল। এবাবে আমি একা। আমাব সঙ্গীরা বিলাতে রয়ে গেলেন। আমার নির্দিষ্ট ক্যাবিনে গিয়ে দেখি সেখানে এক কক্ষে চারজনের থাকবার স্থান; এবং আর একজনের জিনিষপত্র একটি কোণে রাশীকৃত হয়ে আছে। বাস্ক তোরঙের উপর নামের সংলগ্নে লেখা আছে “বেঙ্গল সিভিল্ সার্ভিস্।” বলা বাহুল্য, এই লিখন দেখে ভারী সঙ্গমুগের কল্পনায় আমার মনে অপরিমেয় আনন্দের সঞ্চার হয়নি। ভাবলুম, ভারতবর্ষের রোদে ঝলসা শুকনো খটখটে হাড-পাকা অত্যন্ত কাঁঝালো ঝুনো আংলো ইণ্ডিয়ানের সঙ্গে আমাকে এক জাহাজে পুরেছে! গালে হাত দিয়ে বসে ভাবছি এমন সমবে এক অল্পবয়স্ক স্ত্রী ইংবেজ যুবক ঘরের মধ্যে ঢুকে আমাকে সহাস্রমুখে শুভপ্রভাত অভিবাদন করলেন—মুহূর্তের মধ্যে আমার সমস্ত আশঙ্কা দূর হয়ে গেল। সবে পরীক্ষায় উত্তীর্ণ হয়ে ইনি ভারতবর্ষে যাত্রা করছেন! এঁর শরীরে ইংলণ্ডবাসী ইংরেজের স্বাভাবিক সজ্জদয় ভক্ততার ভাব এখনো সম্পূর্ণ অক্ষুণ্ণ রয়েছে।

১০ অক্টোবর। স্তম্ভর প্রাতঃকাল। সমুদ্র স্থির। আকাশ পরিষ্কার।

স্বর্ষ্য উঠেছে। ভোরের বেলা কুয়াশার মধ্যে দিয়ে আমাদের ডান দিক থেকে অল্প অল্প তীরের চিহ্ন দেখা যাচ্ছে। অল্পে অল্পে কুয়াশার স্ববিনিকা উঠে গিয়ে ওয়াইট হীপের পার্শ্বত্যাতির এবং ভেন্টনর সহর ক্রমে ক্রমে প্রকাশিত হয়ে পড়ল।

এ জাহাজে বড়ো ভিড়। নিরিবিলি কোণে চোঁকি টেনে যে একটু লিখব তার জো নেই, হুতরাং সম্মুখে যা কিছু চোখে পড়ে তাই চেয়ে চেয়ে দেখি।

ইংরেজ মেয়ের চোখ নিয়ে আমাদের দেশের লোক প্রায়ই ঠাট্টা করে, বিড়ালের চোখের সঙ্গে তার তুলনা ক'রে থাকে। কিন্তু, এমন সর্বদাই দেখা যায়, তারাই যখন আবার বিলেতে আসে তখন স্বদেশের হরিণনয়নের কথাটা আর বড়ো মনে করে না। যতক্ষণ দূরে আছি কোনো বালাই নেই, কিন্তু লক্ষ্যপথে প্রবেশ করলেই ইংরেজ স্নন্দরীর দৃষ্টি আমাদের অভ্যাসের আবরণ বিদ্ধ ক'রে অন্তরের মধ্যে প্রবেশ করে। ইংরেজ স্ননয়নার চোখ মেঘমুক্ত নীলাকাশের মতো পরিষ্কার, হীবকের মতো উজ্জ্বল এবং ঘন পল্লবে আচ্ছন্ন, তাতে আবেশের ছায়া নেই। এমন ভারত সস্তান আমার জানা আছে যে নীলনেত্রের কাছেও অতিভূত এবং হরিণনয়নকেও কিছুতেই উপেক্ষা করতে পারে না। কৃষ্ণ কেশ-পাশও সে মুচের পক্ষে বন্ধন এবং কনককুন্তলও সামান্ত দৃঢ় নয়।

সঙ্গীত সম্বন্ধেও দেখা যায়, পূর্বে যে ইংরেজি সঙ্গীতকে পরিহাস ক'রে আনন্দলাভ করা গেছে, এখন তার প্রতি মনোযোগ ক'রে ততোধিক বেশি আনন্দ লাভ করা যায়। এখন অভ্যাসক্রমে যুরোপীয় সঙ্গীতের এতটুকু আশ্বাদ পাওয়া গেছে যার থেকে নিদেন এইটুকু বোঝা গেছে যে যদি চর্চা করা যায় তাহলে যুরোপীয় সঙ্গীতের মধ্যে থেকে পরিপূর্ণ রস পাওয়া যেতে পারে। আমাদের দেশী সঙ্গীত যে আমার

ভালো লাগে সে কথা'র বিশেষ উল্লেখ করা বাহ্যল্য। অথচ দুয়ের মধ্যে যে সম্পূর্ণ জ্ঞাতিভেদ আছে তার আর সন্দেহ নেই।

১৩ অক্টোবর। একটি রমণী গল্প করছিলেন, তিনি পূর্বেকার কোন এক সমুদ্রযাত্রায় কাপ্তেন অথবা কোনো কোনো পুরুষযাত্রীর প্রতি কঠিন পরিহাস ও উৎপীড়ন করতেন—তার মধ্যে একটা হচ্ছে চোকিতে পিন ফুটিয়ে রাখা। শুনে আমার তেমন মজাও মনে হোলো না এবং সেই সকল বিশেষ অঙ্গগৃহীত পুরুষদের স্থলাভিষিক্ত হোতেও একান্ত বাসনার উদ্রেক হোলো না। দেখা যাচ্ছে, এখানে পুরুষদের প্রতি মেয়েরা অনেকটা দূর পর্যন্ত রূঢ়াচরণ কবতে পারেন। যেমন বালকের কাছ থেকে উপদ্রব অনেক সময় আমোদজনক লীলার মতো মনে হয় স্ত্রীলোকদের অত্যাচারের প্রতিও পুরুষেরা সেই রকম মেহময় উপেক্ষা প্রদর্শন কবে, এবং অনেক সময় সেটা ভালোবাসে। পুরুষদের মুখের উপরে রূঢ় সমালোচনা শুনিতে দেওয়া স্ত্রীলোকদের একটা অধিকারের মধ্যে। সেই লঘুগতি তীব্রতার দ্বারা তাঁরা পুরুষের শ্রেষ্ঠতাভিমান বিদ্ধ ক'রে গৌরব অচুত্ব কবেন। সামাজিক প্রথা এবং অনিবাধ্য কারণবশতঃ নানা বিষয়ে তাঁরা পুরুষের অধীন ব'লেই লৌকিকতা এবং শিষ্টাচার সম্বন্ধে অনেক সময়ে তাঁরা পুরুষদের লজ্বন ক'রে আনন্দ পান। কার্যক্ষেত্রে যেখানে প্রতিযোগিতা নেই সেখানে দুর্বল কিঞ্চিৎ ছরস্তু এবং সবল সম্পূর্ণ সহিষ্ণু এটা দেখতে মন্দ হয় না। বলাভিমানী পুরুষের পক্ষে এ একটা শিক্ষা। অবলার দুর্বলতা পুরুষের ইচ্ছাতেই বল প্রাপ্ত হয়েছে, এই জন্ত যে পুরুষের পৌকষ আছে স্ত্রীলোকের উপদ্রব সে বিনা বিদ্রোহে আনন্দের সহিত সহ্য করে, এবং এই সহিষ্ণুতায় তার পৌকুষেরই চর্চা হোতে থাকে। যে দেশের পুরুষেরা কাপুরুষ তারা ই নিলজ্জভাবে পুরুষপূজাকে পুরুষের প্রাণপণ সেবাকেই স্ত্রীলোকের সর্বোচ্চ

ধর্ম ব'লে প্রচার করে; সেই দেশেই দেখা যায় স্বামী রিক্তহস্তে আগে আগে যাচ্ছে আর স্ত্রী তার বোঝাটি বহন ক'রে পিছনে চলেছে, স্বামীর দল ফষ্টক্লাসে চড়ে যাত্রা করছে আর কতকগুলি জড়সড় ঘোমটাচ্ছন্ন স্ত্রীগণকে নিম্নশ্রেণীতে পুরে দেওয়া হয়েছে; সেই দেশেই দেখা যায় আহারে বিহারে ব্যবহারে সকল বিষয়েই স্মৃথ এবং আরাম কেবল পুরুষের, উচ্ছিষ্ট ও উদ্বৃত্ত কেবল স্ত্রীলোকের, তাই নিয়ে বেহায়া কাপুরুষেরা অসঙ্কোচে গোরব ক'রে থাকে এবং তার তিলমাত্র ব্যত্যয় হোলে সেটাকে তারা খুব একটা প্রহসনের বিষয় ব'লে জ্ঞান করে। স্বভাবদুর্বল স্বকুমার স্ত্রীলোকদের সর্বপ্রকার আরামসাধন এবং কষ্ট-লাঘবের প্রতি সযত্ন মনোযোগ যে কঠিনকায় বলিষ্ঠ পুরুষদের একটি স্বভাবসিদ্ধ গুণ হওয়া উচিত এ তারা কল্পনা করতে পারে না—তারা কেবল এইটুকুমাত্র জানে শাসনভীতা স্নেহশালিনী রমণী তাদের চরণে তৈল লেপন করবে, তাদের বদনে অন্ন জুগিয়ে দেবে, তাদের তপ্ত কলেবরে পাখার ব্যঞ্জন করবে, তাদের আলমুচর্চার আয়োজন ক'রে দেবে, পঙ্কিল পথে পায়ে জুতা দেবে না, শীতের সময় গায়ে কাপড় দেবে না, রৌদ্রের সময় মাথায় ছাতা দেবে না, ক্ষুধার সময় কম ক'রে খাবে, আমোদের সময় যবনিকার আড়ালে থাকবে এবং এই বৃহৎ মুক্ত প্রকৃতির মধ্যে যে আলোক আনন্দ সৌন্দর্য্য স্বাস্থ্য আছে তার থেকে বঞ্চিত হয়ে থাকবে। স্বার্থপরতা পৃথিবীর সর্বত্রই আছে কিন্তু নিলজ্জ নিঃসঙ্কোচ স্বার্থপরতা কেবল সেই দেশেই আছে যে দেশে পুরুষেরা ষোলো আনা পুরুষ নয়।

মেয়েরা আপনার স্নেহপরায়ণ সহৃদয়তা থেকে পুরুষের সেবা ক'রে থাকে এবং পুরুষেরা আপনার উদার দুর্বল-বৎসলতা থেকে স্ত্রীলোকের সেবা ক'রে থাকে; যে দেশে স্ত্রীলোকেরা সেই সেবা পায় না,

কেবল সেবা করে, সে দেশে তারা অপমানিত এবং সে দেশও লক্ষ্মীছাড়া।

কিন্তু কথাটা হচ্ছিল স্ত্রীলোকের দৌরাশ্রয় সঙ্কটে। গোলাপের যে কারণে কাঁটা থাকা আবশ্যিক, যেখানে স্ত্রীপুরুষে বিচ্ছেদ নেই সেখানে স্ত্রীলোকেরও সেই কাবণে প্রথরতা থাকা চাই, তীক্ষ্ণ কথায় মর্শ্বচ্ছেদ করবার অভ্যাস অবলার পক্ষে অনেক সময়েই কাজে লাগে।

আমাদের গোলাপগুলিই কি একেবারে নিষ্ফলক? কিন্তু সে বিষয়ে সমধিক সমালোচনা করতে বিরত থাকা গেল।

১৪ অক্টোবর। জিব্রল্টার পৌছন গেল। মুঘলধারায় বৃষ্টি হচ্ছে।

আজ দিনর টেবিলে একটা মোটা আঙুল এবং ফুলো গৌফওয়ালার প্রকাণ্ড জোয়ান গোরা তার সুন্দরী পার্শ্ববর্তিনীর সঙ্গে ভারতবর্ষীয় পাখাওয়ালার গল্প করছিল। সুন্দরী কিঞ্চিং নালিশের নাকিস্বরে বললেন—পাখাওয়ালার বাত্রে পাখা টানতে টানতে ঘুমোয়। জোয়ান লোকটা বললে তার একমাত্র প্রতিবিধান লাথি কিস্বা লাঠি। পাখা-আন্দোলন সঙ্কটে এই ভাবে আন্দোলন চলতে লাগল। আমার বুকে হঠাৎ বেন একটা তপ্ত শূল বিধল। এইভাবে যারা স্ত্রীপুরুষে কথোপ-কথন করে তারা যে অকাতরে এক সময় একটা দিশি দুর্বল মানব-বিভবনাকে ভবপারে লাথিয়ে ফেলে দেবে তার আয় বিচিত্র কী? আমিও তো সেই অপমানিত জাতের লোক, আমি কোন্ লজ্জায় কোন স্থখে এদের সঙ্গে এক টেবিলে বসে খাই এবং একত্রে দস্তোন্মৌলন করি।—শরীরের সমস্ত রাগ কণ্ঠ পর্য্যন্ত এল, কিন্তু একটা কথাও বহুচেষ্টাতে সে জায়গায় এসে পৌছল না। বিশেষতঃ ওদের ঐ ইংরেজি ভাষাটা বড়োই বিজ্ঞাতীয়—মনটা একটু বিচলিত হয়ে গেলেই ও ভাষাটা মনের মতো কায়দা ক'রে উঠতে পারিনে—তখন মাথার চতুর্দিক হতে

রাজ্যের বাংলা কথা চাক-নাড়া মৌমাছির মতো মুখবারে ভিড় ক'রে ছুটে আসে। ভাবধূম এত উতলা হয়ে উঠলে চমবে না, একটু ঠাণ্ডা হয়ে দুটো চারটে ব্যাকরণশুদ্ধ ইংরেজি কথা মাথার মধ্যে গুছিয়ে নিই। ঝগড়া করতে গেলে নিদেন ভাষাটা ভালো হওয়া চাই।

তখন মনে মনে নিম্নলিখিত মতো ভাবটা ইংরেজিতে রচনা করতে লাগলুম।

কথাটা ঠিক বটে মশায়, পাখাওয়ারালা মাঝে মাঝে রাত্রে তুললে অত্যন্ত অস্ববিধা হয়। দেহধারণ করলেই এমন কতকগুলো সহ্য করতে হয় এবং সেইসবই খ্রিস্টীয় সহিষ্ণুতার প্রয়োজন ঘটে। এবং এইরূপ সময়েই ভদ্রাভদ্রের পরিচয় পাওয়া যায়।

যে লোক তোমার আঘাতের প্রতিশোধ নিতে একেবারেই অক্ষম, গপ ক'রে তার উপরে লাথি তোলা চূড়ান্ত কাপুরুষতা; অভদ্রতার চেয়ে বেশি।

আমরা জাতটা যে তোমাদের চেয়ে দুর্বল সেটা একটা প্রাকৃতিক সত্য—সে আমাদের অস্বীকার করবার জো নেই। তোমাদের গায়ের জোর বড্ড বেশি—তোমরা ভারি পালোয়ান।

কিন্তু সেইটেই কি এত গর্বের বিষয়, যে, মন্তব্যস্বকে তার নিচে আসন দেওয়া হবে?

তোমরা বলবে, কেন, আমাদের আর কি কোনো শ্রেষ্ঠতা নেই?

থাকতেও পারে। তবে, যখন একজন অস্থিজর্জর অর্ধ-উপবাসী দরিদ্রের রিক্ত উদরের উপবে লাথি বসিয়ে দাও এবং তৎসম্বন্ধে রমণীদের সঙ্গে কৌতুকালাপ করো এবং স্নকুমারীগণও তাতে বিশেষ বেদনা অনুভব করেন না, তখন কিছুতেই তোমাদের শ্রেষ্ঠ ব'লে ঠাহর করা যায় না।

বেচারার অপরাধ কী দেখা থাক ! ভোরের বেলা অর্দ্ধাশনে বেরিয়েছে, সমস্ত দিন খেটেছে। হতভাগা আর দুটো পয়সা বেশি উপার্জন করবার আশায় রাত্তিরে বিশ্রামটা তোমাকে দুচার আনায় বিক্রি করেছে। নিতান্ত গরীব ব'লেই তার এই ব্যবসায়, বড়ো সাহেবকে ঠকাবার জন্তে সে ষড়যন্ত্র করেনি।

এই ব্যক্তি রাত্রে পাখা টানতে টানতে মাঝে মাঝে ঘুমিয়ে পড়ে— এ দোষটা তার আছে বলতেই হবে।

কিন্তু আমার বোধ হয় এটা মানবজাতির একটা আদিম পাপের ফল। যন্ত্রের মতো বসে বসে পাখা টানতে গেলেই আদমের সন্তানের চোখে ঘুম আসবেই। সাহেব নিজে একবার পরীক্ষা ক'রে দেখতে পারেন।

এক ভৃত্যের দ্বারা কাজ না পেলে দ্বিতীয় ভৃত্য রাখা যেতে পারে, কিন্তু যে কাপুরুষ তাকে লাথি মারে সে নিজেকে অপমান করে, কারণ, তখনি তার একটি প্রতিলাথি প্রাপ্য হয়—সেটা প্রয়োগ করবার লোক কেউ হাতের কাছে উপস্থিত নেই এইটুকু-মাত্র প্রভেদ।

তোমরা অবসর পেলেই আমাদের ব'লে থাকো যে, “তোমাদের মধ্যে যখন বাল্যবিবাহ প্রভৃতি সামাজিক কুপ্রথা প্রচলিত তখন তোমরা রাজ্যতন্ত্রের মধ্যে কোনো স্বাধীন অধিকার প্রাপ্তির যোগ্য নও।”

কিন্তু তার চেয়ে এ কথা সত্য যে,—যে-জাত নিরাপদ দেখে দুর্কলের কাছে “তেরিয়া”—অর্থাৎ তোমরা যাকে বলে “বুলি”—যার কোনো বাংলা প্রতিশব্দ নেই—অপ্রিয় অশিষ্ট ব্যবহার যাদের স্বভাবতঃ আসে, কেবল স্বার্থের স্থলে যারা নম্রভাব দারণ করে, তারা কোনো বিদেশী রাজ্যশাসনের যোগ্য নয়।

অন্য যোগ্যতা ছরকমের আছে—ধর্মত এবং কার্যত। এমন.

কতকগুলি স্থল আছে যেখানে শুধুমাত্র কৃতকারিতাই যোগ্যতার প্রমাণ নয়। গায়ের জোর থাকলে অনেক কাজই বলপূর্বক চালিয়ে দেওয়া যায় কিন্তু বিশেষ বিশেষ কাজে বিশেষ বিশেষ উপযোগী নৈতিকগুণের দ্বারাই সে কার্যবহনের প্রকৃত অধিকার পাওয়া যায়।

কিন্তু ধর্মের শাসন সঙ্গ সঙ্গ দেখা যায় না ব'লে যে, ধর্মের রাজ্য অরাজক তা বলা যায় না। এই ক্ষুদ্র ক্ষুদ্র নির্ভরতা এবং প্রতিদিনের ঔদ্ধত্য প্রতিদিন সঞ্চিত হচ্ছে, একসময় এরা তোমাদেরই মাথায় ভেঙে পড়বে।

যদি বা আমরা সকল অপমানই নীরবে অথবা কথঞ্চিৎ কণরব সহকারে সহ ক'রে যাই, প্রতিকারের কোনো ক্ষমতাই যদি আমাদের না থাকে, তবু তোমাদের মঙ্গল হবে না।

কারণ, অপ্রেতিহত ক্ষমতার দম্ভ জাতীয় চরিত্রের মূল আক্রমণ করে। যে স্বাধীনতাপ্রিয়তার ভিত্তির উপর তোমাদের জাতীয় গৌরব প্রতিষ্ঠিত, তলে তলে সেই স্বাধীনতাপ্রিয়তার বিসৃঙ্খতা নষ্ট করে। সেই স্ৰগ্ন ইংলণ্ডবাসী ইংরেজের কাছে শোনা যায় ভারতবর্ষীয় ইংরেজ একটা জাতই স্বতন্ত্র; কেবলমাত্র বিকৃত যকুংই তার একমাত্র কারণ নয়; যকুতের চেয়ে মানুষের আরো উচ্চতর অস্তরিশ্রিয় আছে সেটাও নষ্ট হয়ে যায়।

কিন্তু আমার এ বিভীষিকায় কেউ ডরাবে না। যার দ্বারে অর্গল নেই সেই অগত্যা চোরকে সাধুভাবে ধর্মোপদেশ দিতে বসে; যেন চোরের পরকালের হিতের জন্তেই তার রাত্রে ঘুম হয় না।

লাথির পরিবর্তে উপদেশ দেওয়া এবং ধর্মভয় দেখানো যদিচ দেখতে অতি মনোহর বটে, কিন্তু লাথির পরিবর্তে লাথি দিলেই ফলটা অতি শীঘ্র পাওয়া যায়। এই পুরাতন সত্যটি আমাদের জানা আছে, কিন্তু

বিধাতা আমাদেৱ সমস্ত শৰীৰমনেৰ মধ্যে কেবল ৰসনাৰ অগ্ৰভাগটুকুতে বহনসঞ্চাৰ কৰেছেন। সুতৰাং হে জ্ঞোয়ান, কিঞ্চিং নীতি কথা শোনো।

শোনা যায় ভাৰতবৰ্ষীয়েৰ পিলে বস্তুটাই কিছু খাৰাপ হয়ে আছে, এই জন্তু তাৰা পেটেৰ উপৰে ইংৰেজ প্ৰভুৰ নিতাস্ত “পেটৰ্নল টী টুমেণ্ট”টুকুৰও ভৰ সহিতে পাৰে না। কিন্তু ইংৰেজৰ পিলে কী ৰকম অবস্থায় আছে এ পৰ্যাস্ত কাৰ্য্যত তাৰ কোনো পৰীক্ষাই হয়নি।

কিন্তু সে নিয়ে কথা হচে না ; পিলে ফেটে যে আমাদেৱ অপঘাত মৃত্যু হয় সেটা আমাদেৱ ললাটেৰ লিখন। কিন্তু তাৰ পৰেই সমস্ত ব্যাপাৰটা তোমবা যে ৰকম তুঁড়ি দিয়ে উড়িয়ে দিতে চাও তাতেই আমাদেৱ সমস্ত জাতিকে অপমান কৰা হয়। তাতেই একৰকম ক’ৰে বলা হয় যে, আমাদেৱ তোমৰা মানুষ জ্ঞান কৰো না। আমাদেৱ দুটো চাৰটে মানুষ যে খামকা তোমাদেৱ চৰণতলে বিলুপ্ত হয়ে যায় সে আমাদেৱ পিলেৰ দোষ। পিলে যদি ঠিক থাক্ত তাহোলে লাধিও খেতে, বৈচেও থাকতে এবং পুনশ্চ দ্বিতীয়বাৰ খাবাৰ অবসৰ পেতে।

যা হোক ভদ্ৰনাম ধাৰণ ক’ৰে অসহায়কে অপমান কৰতে যাৰ সঙ্কোচ বোধ হয় না, তাকে এত কথা বলাই বাহুল্য। বিশেষতঃ যে ব্যক্তি অপমান সহ কৰে দুৰ্বল হোলেও তাকে যখন অন্তৰেৰ সঙ্কে ঘৃণা না ক’বে থাকা যায় না।

কিন্তু একটা কথা আমি ভালো বুঝতে পাৰিনে। ইংলেণ্ডে তো আমাদেৱ এত বিশ্বহিতৈষিণী মেয়ে আছেন তাঁৰা সভাসমিতি ক’ৰে নিতাস্ত অসম্পৰ্কীয় কিম্বা দূৰসম্পৰ্কীয় মানবজাতিৰ প্ৰতিও দূৰ থেকে দয়া প্ৰকাশ কৰেন। এই হতভাগ্য দেশে সেই ইংৰেজৰ ঘৰ থেকে কি যথেষ্ট পৰিমাণ মেয়ে আসেন না, যাঁৰা উক্ত বাহুল্য কৰুণৰসেৰ কিয়-দংশ উপস্থিত ক্ষেত্ৰে ব্যয় ক’ৰে মনোভাৱ কিঞ্চিং লাঘব ক’ৰে যেতে

পারেন। বরঞ্চ পুরুষমাত্বে দয়াব দৃষ্টান্ত দেখেছি। কিন্তু তোমাদের মেয়েরা এখানে কেবল নাচগান করেন, স্বেযোগমতে বিবাহ করেন এবং কথোপকথনকালে স্বেচারক নাসিকার স্কুমার অগ্রভাগটুকু কুঞ্চিত ক'রে আমাদের স্বজাতীয়ের প্রতি অবজ্ঞা প্রকাশ করেন। জানি না, কী অভিপ্রায়ে বিধাতা আমাদের ভারতবাসীকে তোমাদের ললনাদের স্নায়ু-তন্ত্রের ঠিক উপযোগী ক'রে সৃজন করেন নি!—

বাই হোক, স্বগত উক্তি যত ভালোই হোক স্বেজ ছাড়া আর কোথাও শ্রোতাদের কর্ণগোচর হয় না। তা ছাড়া যে কথাসুলো আক্ষেপবশতঃ মনের মধ্যে উদয় হয়েছিল সেগুলো যে এই গৌফওয়াল পালায়ানের বিশেষ কিছু হৃদয়ঙ্গম হোত এমন আমার বোধ হয় না। এদিকে, বুদ্ধি যখন বেড়ে উঠল চোর তখন পালিয়েছে—তারা পূর্বপ্রসঙ্গ ছেড়ে অল্প কথায় গিয়ে পড়েছে। মনের খেদে কেবল নিজেকেই ধিক্কার দিতে লাগলুম।

১৫ অক্টোবর। জাহাজে আমার একটি ইংবেজ বন্ধু জুটেছে। লোকটাকে লাগছে ভালো। অল্পবয়স, মন খুলে কথা কয়, কারো সঙ্গে বড়ো মেশে না, আমার সঙ্গে খুব চট ক'রে ব'নে গেছে। আমার বিবেচনায় শেষটাই সব চেয়ে মহৎ-গুণ।

এ জাহাজে তিনটি অষ্ট্রেলিয়ান কুমারী আছেন—তাদের সঙ্গেও আমার আলাপ হয়েছে। বেশ সহজ সরল রকমের লোক, কোনো প্রকার অতিরিক্ত কাঁজ নেই। আমার নববন্ধু এঁদের প্রশংসাস্বরূপে বলে “They are not at all smart;” বাস্তবিক, অনেক অল্পবয়সী ইংরেজমেয়ে দেখা যায় তারা বড়োই smart—বড্ড চোখমুগের খেলা, বড্ড নাকে মুখে কথা, বড্ড গরতর হাসি, বড্ড চোখাচোখা জবাব—কারো কারো লাগে ভালো, কিন্তু শাস্তিপ্রিয় সামান্য লোকের পক্ষে নিতান্ত আশ্চর্যজনক।

১৬ অক্টোবৰ। আজ জাহাজে দুটি ছোটো ছোটো নাট্যাভিনয় হয়ে গেল। দলের মধ্যে একটি অভিনেত্রীকে যেমন সুন্দর দেখতে তিনি তেমন সুন্দর অভিনয় করেছিলেন।

আজ অনেক রাত্রে নিরালায় একলা দাঁড়িয়ে জাহাজের কাঠরা ধ'রে সমুদ্রের দিকে চেয়ে অল্পমনস্কভাবে গুন্‌গুন্ ক'রে একটা দিশি রাগিনী ধরেছিলুম। তখন দেখতে পেলুম অনেক দিন ইংরেজি গান গেয়ে গেয়ে মনের ভিতরটা যেন অতৃপ্ত হয়ে ছিল। হঠাৎ এই বাংলা সুরটা পিপাসার জলের মতো বোধ হোলো। আমি দেখলুম সেই সুরটি সমুদ্রের উপর অক্ষকায়ের মধ্যে বেরকম প্রসারিত হোলো, এমন আর কোনো সুর কোথাও পাওয়া যায় ব'লে আমার মনে হয় না। আমার কাছে ইংরেজি গানের সঙ্গে আমাদের গানের এই প্রধান প্রভেদ ঠেকে যে, ইংরেজি সঙ্গীত মানব-জগতের সঙ্গীত, আর আমাদের সঙ্গীত প্রকৃতি নিৰ্জ্জন প্রকৃতির অনিৰ্দিষ্ট অনিৰ্বচনীয় বিষাদ-গভীর সঙ্গীত। কানাড়া টৌড়ি প্রভৃতি বড়ো বড়ো রাগিনীর মধ্যে যে গান্ধীৰ্য্য এবং কাতরতা আছে সে যেন কোনো ব্যক্তিবিশেষের নয়—সে যেন অকূল অসৌমের প্রাস্তবন্তী এই সঙ্গীতহীন বিশ্বজগতের।

১৭ অক্টোবৰ। বিকালের দিকে জাহাজ মণ্টা দ্বীপে পৌছিল। কঠিন দুৰ্গপ্রাকারে বেষ্টিত অটালিকাখচিত তরুগুহ্মহীন সহর। এই শ্রামল পৃথিবীর একটা অংশ যেন ব্যাধি হয়ে কঠিন হয়ে গেছে। দূর থেকে দেখে নাবুতে ইচ্ছে করে না। অবশেষে আমার নববন্ধুর অনুৰোধে তাঁর সঙ্গে একত্রে নেবে পড়া গেল। সমুদ্রতীর থেকে সুড়ঙ্গপথের মধ্য দিয়ে দীর্ঘ ঘাটের মতো উঠেছে, তারি সোপান বেয়ে সহরের মধ্যে উঠলুম। অনেকগুলি গাইডপাণ্ডা আমাদের হেঁকে ধরলে। আমার বন্ধু বহুকষ্টে তাদের তাড়িয়ে দিলেন। কিন্তু একজন কিছুতেই আমাদের সঙ্গ ছাড়লে

না। বন্ধু তাকে বারবার ঝঁক্কে ঝঁক্কে বললেন—“চাইনে তোমাকে”—
 “একটি পয়সাও দেব না”—তবু সে সন্ধ্যা সাতটা পর্যন্ত আমাদের সঙ্গে
 লেগে ছিল। তার পরে যখন তাকে নিতান্তই তাড়িয়ে দিলে তখন সে
 স্নানমুখে চ’লে গেল। আমার তাকে কিছু দেবার ইচ্ছা ছিল কিন্তু সঙ্গে
 স্বর্ণমুদ্রা ছাড়া আর কিছুই ছিল না। বন্ধু বললেন লোকটা গরীব সন্দেহ
 নেই কিন্তু কোনো ইংরেজ হোলে এমন করত না।—আসলে মানুষ
 পরিচিত দোষ গুরুতর হোলেও মার্জনা করতে পারে কিন্তু সামান্য
 অপরিচিত দোষ সহ্য করতে পারে না।

মন্টা সহরটা দেখে মনে হয় একটা অপরিণত বিকৃত যুরোপীয়
 সহর। পাথরে বাঁধানো সড়ক রাস্তা একবার উপরে উঠছে একবার নিচে
 নামছে। সমস্তই দুর্গন্ধ ঘেঁসাঘেঁসি অপরিষ্কার। রাত্রে হোটেল গিয়ে
 খেলুম। অনেক দাম দেওয়া গেল, কিন্তু খাণ্ডদ্রব্য কদর্য। আহা-
 রান্তে, সহরের মধ্যে একটি বাঁধানো চক আছে, সেখানে ব্যাঙ বাণ্ড
 শুনে রাত দশটার সময় জাহাজে ফিরে আসা গেল। ফেরবার সময়
 নৌকোওয়ালা আমাদের কাছে থেকে গ্রাযা ভাড়ার চেয়ে কিছু বেশি
 আদায়ের চেষ্টায় ছিল। আমার বন্ধু এদের অসৎ ব্যবহারে নিমম
 বাগান্বিত। তাতে আমার মনে পড়ল এবারে লণ্ডনে প্রথম যেদিন
 আমরা দুই ভাই গাড়ি নিয়ে বেরিয়েছিলুম গাডোয়ান পাঁচ শিলিং
 ভাড়ার জায়গায় আমাদের কাছে বারো শিলিং ঠিকিয়ে নিয়েছিল।
 সে লোকটার তত দোষ ছিল না—দোষ আমাদেরই। আমাদের
 দুই ভাইয়ের মুখে বোধ করি এমন কিছু ছিল যা দেখলে সংলোকেরও
 ঠিকিয়ে নিতে হঠাৎ প্রলোভন হোতে পারে। বা হোক মন্টাবাসীর
 অসাধু স্বভাবের প্রতি আমার বন্ধুর অতিমাত্র ক্রোধ দেখে এ ঘটনাটা
 উল্লেখ করা আমার কর্তব্য মনে করলুম।

১৮ অক্টোবর। আজ ডিনরটেবিলে অগ্নিৎ সন্ধ্যা কেউ কেউ নিজ নিজ কীর্ত্তি রটনা করছিলেন। গবর্নেন্টকে মাগুল ফাঁকি দেবার জন্তে মিথ্যা প্রতারণা করাকে এরা তেমন নিন্দা বা লজ্জার বিষয় মনে করে না। অথচ মিথ্যা এবং প্রতারণাকে যে এরা দুষণীয় জ্ঞান করে না সে কথা বলাও অস্বাভাবিক। মামুষ এমনি জীব! একজন ব্যারিষ্টার তার মক্কেলের কাছ থেকে পুরা ফি নিয়ে যদি কাজ না করে এবং সে জন্তে যদি সে হতভাগ্যের সর্বনাশ হয়ে যায় তাহলেও কিছু লজ্জা বোধ করে না—কিন্তু ঐ মক্কেল যদি তার দেয় ফি'র দুটি পয়সা কম দেয় তাহলে কৌশলিগণ মনে যে যুগ্মমিশ্রিত আক্রোশের উদয় হয় তাকে তাঁরা ইংরেজি ক'রে বলেন “ইণ্ডিগ্নেশন্!”

১৯ অক্টোবর। আজ সকালে জাহাজ যখন ত্রিন্দিশি পৌছিল তখন ঘোর বৃষ্টি। এই বৃষ্টিতে একদল গাইয়ে বাজিয়ে হার্প্ বোয়ালা ম্যাগ্গো-লীন্ নিয়ে ছাতা মাথায় জাহাজেব সম্মুখে বন্দরের পথে দাঁড়িয়ে গান বাজনা জুড়ে দিলে।

বৃষ্টি থেমে গেলে বন্ধুর সঙ্গে ত্রিন্দিশিতে বেরোন গেল। সহর ছাড়িয়ে একটা খোলা জায়গায় গিয়ে পৌছিলুম। আকাশ মেঘাচ্ছন্ন, পাহাড়ে রাস্তা শুকিয়ে গেছে, কেবল দুইধারে নালায় মাঝে মাঝে জল দাঁড়িয়ে আছে। রাস্তার ধারে গাছে চ'ড়ে দুটো খালি-পা ইটালিয়ান ছোকরা ফিগ পেড়ে খাচ্ছিল; আমাদের ডেকে ইসারায় জিজ্ঞাসা করলে তোমরা খাবে কি—আমরা বললুম, না। খানিক বাদে দেখি তা'রা ফলবিশিষ্ট একটা ছিন্ন অলিভশাখা নিয়ে এসে উপস্থিত। জিজ্ঞাসা করলে, অলিভ খাবে? আমরা অসম্মত হলুম। তার পরে ইসারায় তামাক প্রার্থনা ক'রে বন্ধুর কাছে থেকে কিঞ্চিৎ তামাক আদায় করলে। তামাক খেতে খেতে দুজনে বরাবর আমাদের সঙ্গে সঙ্গে চলল।

আমরা পরস্পরের ভাষা জানিনে—আমাদের উভয় পক্ষে প্রবল অর্গভঙ্গ-
 দ্বারা ভাবপ্রকাশ চলতে লাগল। জনশূন্য রাস্তা ক্রমশঃ উঁচু হয়ে শস্ত-
 ক্ষেত্রের মধ্যে দিয়ে বরাবর চলে গিয়েছে। কেবল মাঝে মাঝে এক
 একটা ছোটো বাড়ি, সেখানে জানলার কাছে ফিগ ফল শুকোতে
 দিয়েছে। এক এক জায়গায় ছোটো ছোটো শাখাপথ বক্রপায়ে
 এক পাশ দিয়ে নেমে নিচে কোথায় অদৃশ্য হয়ে গেছে।

ফেরবার মুখে একটা গোরস্থানে ঢোকা গেল। এখানকার গোর
 নূতন রকমের। অধিকাংশ গোরের উপরে এক-একটি ছোটো ঘর
 গেঁথেছে। সেই ঘর পর্দা দিয়ে ছবি দিয়ে রঙীন জিনিস দিয়ে নানা
 রকমে সাজানো, যেন মৃত্যুর একটা খেলাঘর—এর মধ্যে কেমন একটি
 ছেলেমানুষী আছে—মৃত্যুটাকে যেন যথেষ্ট খাতির করা হচ্ছে না।

গোরস্থানের একজায়গায় সিঁড়ি দিয়ে একটা মাটির নিচেকার ঘবে
 নাবা গেল। সেখানে সহস্র সহস্র মড়ার মাথা অতি সুশৃঙ্খলভাবে
 স্তুপাকারে সাজানো। আমাদের সঙ্গে সঙ্গেই নিশিদিন যে একটা কঙ্কাল
 চলে বেড়াচ্ছে ঐ মুণ্ডুলো দেখে তার আকৃতিটা মনে উদয় হোলো।
 জীবন এবং সৌন্দর্য্য এই অসীম জীবলোকের উপর একটা চিত্রিত পর্দা
 ফেলে রেখেছে—কোনো নিষ্ঠুর দেবতা যদি হঠাৎ একদিন সেই
 লাভণ্যময় চন্দ্রযবনিকা সমস্ত নরসংসার থেকে উঠিয়ে ফেলে, তাহোলে
 অকস্মাৎ দেখতে পাওয়া যায় আরক্ত অধরপল্লবের অন্তরালে গোপনে
 ব'সে ব'সে শুষ্ক খেঁত দস্তপংক্তি সমস্ত পৃথিবী জুড়ে বিজ্রপের হাসি
 হাসছে। পুরোনো বিষয়! পুরোনো কথা! ঐ নরকপাল অবলম্বন
 ক'রে নীতিজ্ঞ পণ্ডিতেরা অনেক বিভীষিকা প্রচার করেছেন—কিন্তু
 অনেকক্ষণ চেয়ে চেয়ে দেখে আমার কিছুই ভয় হোলো না। শুধু এই
 মনে হোলো, সীতাকুণ্ডের বিদীর্ণ জনবিহ্ব থেকে যেমন খানিকটা তপ্ত

বাম্প বেরিয়ে যায়, তেমনি পৃথিবীর কত যুগের কত হুশিচিন্তা, ছুরাশা, অনিদ্রা ও শিরঃপীড়া ঐ মাথার খুলিগুলোর—ঐ গোলাকার অস্থি-বুদবুদগুলোর মধ্যে থেকে অব্যাহতি পেয়েছে। এবং সেই সঙ্গে এও মনে হোলো, পৃথিবীতে অনেক ডাক্তার অনেক টাকের ওষুধ আবিষ্কার ক'রে চীৎকার ক'রে মরছে, কিন্তু ঐ লক্ষ লক্ষ কেশহীন মস্তক তৎপ্রতি সম্পূর্ণ উদাসীন, এবং দস্তমার্জ্জনওয়ালারা বতই প্রচুর বিজ্ঞাপন প্রচার করছে এই অসংখ্য দস্তশ্রেণী তার কোনো খোঁজ নিচ্ছে না।

যাই হোক, আপাততঃ আমার নিজের কপালফলকটার ভিতরে বাড়ির চিঠির প্রত্যাশা সঞ্চরণ করছে। যদি পাওয়া যায় তাহলে এই খুলিটার মধ্যে খানিকটা খুসির উদয় হবে, আর যদি না পাই তাহলে এই অস্থিকোটরের মধ্যে দুঃখ নামক একটা ব্যাপারের উদ্ভব হবে—ঠিক মনে হবে আমি কষ্ট পাচ্ছি।

২৩ অক্টোবর। স্নেহেজ খালের মধ্যে দিয়ে চলেছি। জাহাজের গতি অতি মন্থর।

উজ্জল উত্তপ্ত দিন। একরকম মধুর আলো পূর্ণ আছি। যুরোপের ভাব সম্পূর্ণ কাটল। আমাদের সেই বৌদ্ধতপ্ত শ্রান্ত দরিদ্র ভারতবর্ষ, আমাদের সেই ধরাপ্রাপ্তবর্তী পৃথিবীর অপরিচিত নিভৃত নদীকলধ্বনিত ছায়াস্বপ্ন বাংলা দেশ, আমার সেই অকস্মণ্য গৃহপ্রিয় বাল্যকাল, কল্পনাবিষ্ট যৌবন, নিশ্চেষ্ট নিরুণম চিন্তাপ্রিয় জীবনের স্মৃতি এই স্বর্ধ্য-কিরণে, এই তপ্ত বায়ুহিল্লোলে সূদূর মরীচিকার মতো; আমার দৃষ্টির সম্মুখে জেগে উঠেছে।

ডেকের উপরে গল্পের বই পড়ছিলুম। মাঝে একবার উঠে দেখলুম, দুধারে ধূসরবর্ণ বালুকাতীর ;—জলের ধারে একটু একটু বনঝাউ এবং অর্ধশুক তৃণ উঠেছে। আমাদের ডানদিকের বালুকা-রাশির মধ্যে দিয়ে

একদল আরব শ্রেণীবদ্ধ উট বোঝাই ক'রে নিয়ে চলেছে। প্রথর সূর্যালোক এবং ধূসর মরুভূমির মধ্যে তাদের নীল কাপড় এবং শাদা পাগড়ি স্পষ্ট হয়ে উঠেছে। কেউ বা এক জায়গায় বালুকাগহ্বরের ছায়ায় পা ছড়িয়ে অলসভাবে শুয়ে আছে—কেউ বা নমাজ পড়ছে, কেউ বা নাসারজ্জু ধ'রে অনিচ্ছুক উটকে টানাটানি করছে। সমস্তটা মিলে খররোজ্জ আরব মরুভূমির একখণ্ড ছবির মতো মনে হোলো।

২৪ অক্টোবর। আমাদের জাহাজের মিসেস—কে দেখে একটা নাট্যশালার ভগ্নাবশেষ ব'লে মনে হয়। সেখানে অভিনয়ও বন্ধ, বাসের পক্ষেও সুবিধা নয়। রমণীটি খুব তীক্ষ্ণধার—যৌবনকালে নিঃসন্দেহ সেই তীক্ষ্ণতা ছিল উজ্জল। যদিও এখনো এর নাকে মুখে কথা, এবং অচিরজ্ঞাত বিভালশাবকের মতো জ্রীড়াচাতুর্য্য, তবু কোনো যুবক এর সঙ্গে দুটো কথা বলবার ছুতো অন্বেষণ করে না, নাচের সময় আহ্বান করে না, আহ্বারের সময় সবত্রে পরিবেষণ করে না। তার চঞ্চলতার মধ্যে শ্রী নেই, প্রোচতার সঙ্গে রমণীর মুখে যে একটি স্নেহময় স্প্রসন্ন স্নগস্তীর মাতৃভাব পরিস্ফুট হয়ে ওঠে তাও তার কিছুমাত্র দেখিনে।

২৫ অক্টোবর। আজ সকালবেলা স্নানের ঘর বন্ধ দেখে দরজ্জার সামনে অপেক্ষা ক'রে দাঁড়িয়ে আছি। কিছুক্ষণ বাদে বিরলকেশ পৃথুকলেবর দ্বিতীয় ব্যক্তি তোয়ালে এবং স্পঞ্জ হস্তে উপস্থিত। ঘর খালাস হলামাত্র সেই জন-বুল্ অম্লাবদনে প্রথমাগত আমাকে অতিক্রম ক'রে ঘরে প্রবেশ করলে। প্রথমেই মনে হোলো তাকে ঠেলে ঠুলে ঘরের মধ্যে ঢুকে পড়ি, কিন্তু শারীরিক দৃন্দটা অত্যন্ত হীন এবং রূঢ় ব'লে মনে হয়, বেশ স্বাভাবিকরূপে আসে না। স্নতরাং অধিকার ছেড়ে দিয়ে অবাক হয়ে দাঁড়িয়ে ভাবলুম; নন্দ্রতা গুণটা খুব ভালো হোতে পারে

কিন্তু খৃষ্টজন্মের উনবিংশ শতাব্দী পরেও এই পৃথিবীর পক্ষে অল্পপযোগী এবং দেখতে অনেকটা ভীকৃতার মতো। এক্ষেত্রে নাবার ঘরে প্রবেশ করতে যতটা জেদের ততটা সংগ্রামের দরকার ছিল না। কিন্তু প্রাতঃকালেই এতটা মাংসবহুল কপিশবর্ণ পিঙ্গলচক্ষু রূঢ় ব্যক্তির সঙ্গে সংঘর্ষ সম্ভাবনাটা কেমন সঙ্কোচজনক মনে হোলো। স্বার্থোত্তম জয়লাভ করে—বলিষ্ঠ ব'লে নয়—অতিমাংসগ্রস্ত কুৎসিত ব'লে।

২৬ অক্টোবর। জাহাজের একটা দিন বর্ণনা করা যাক।

সকালে ডেক ধুয়ে গেছে, এখনো ভিজ়ে রয়েছে। জুইধারে ডেক-চেয়ার বিশৃঙ্খলভাবে পরস্পরের উপর রাশীকৃত। খালিপায়ের রাত-কাপড় পরা পুরুষগণ কেউ বা বন্ধু সঙ্গে কেউ বা একলা মধ্যপথ দিয়ে হু হু ক'রে বেড়াচ্ছে। ক্রমে যখন আটটা বাজল এবং একটি আধটি ক'রে মেয়ে উপরে উঠতে লাগল তখন একে একে এই বিরলবেশ পুরুষদের অন্তর্ধান।

স্নানের ঘরের সম্মুখে বিষম ভিড। তিনটি মাত্র স্নানাগার; আমরা অনেকগুলি দ্বারস্থ। তোয়ালে এবং স্পঞ্জ হাতে দ্বারমোচনের অপেক্ষায় দাঁড়িয়ে আছি। দশ মিনিটের অধিক স্নানের ঘর অধিকার করবার নিয়ম নেই।

স্নান এবং বেশভূষা সমাপনের পর উপরে গিয়ে দেখা যায় ডেকের উপর পদচারণশীল প্রভাতবায়ুসেবী অনেকগুলি স্ত্রীপুরুষের সমাগম হয়েছে। ঘন ঘন টুপি উদ্ঘাটন ক'রে মহিলাদের এবং শিরঃকম্পে পরিচিত বন্ধুবান্ধবদের সঙ্গে শুভপ্রভাত অভিবাদন ক'রে গ্রীষ্মের তার-তম্য সম্বন্ধে পরস্পরের মত ব্যক্ত করা গেল।

ন'টার ঘণ্টা বাজল। ব্রেক্‌ফাস্ট প্রস্তুত। বুভুকু নরনারীগণ সোপানপথ দিয়ে নিম্নকক্ষে ভোজনবিবরে প্রবেশ করলে। ডেকের উপরে

আর জনপ্রাণী অবশিষ্ট নেই কেবল সারিসারি শূন্য চৌকি উর্দ্ধমুখে প্রভুদের জন্ত প্রতীক্ষমান।

ভোজনশালা প্রকাণ্ড ঘর। মাঝে দুই সার লম্বা টেবিল, এবং তার দুই পার্শ্বে ষণ্ড ষণ্ড ছোটো ছোটো টেবিল। আমরা দক্ষিণ পার্শ্বে একটি ক্ষুদ্র টেবিল অধিকার ক'রে সাতটি প্রাণী দিনের মধ্যে তিনবার ক্ষুধা নিবৃত্ত ক'রে থাকি। মাংস কুটি ফলমূল মিষ্টান্ন মদিরায় এবং হাঙ্গ-কৌতুক গল্পগুজবে এই অনতিউচ্চ সুপ্রশস্ত ঘর কানায় কানায় পরিপূর্ণ হয়ে ওঠে।

আহারের পর উপরে গিয়ে যে যার নিজ নিজ চৌকি অন্বেষণ এবং সেটা যথাস্থানে স্থাপনে ব্যস্ত। চৌকি খুঁজে পাওয়া দায়। ডেক ধোবার সময় কার চৌকি কোথায় ফেলেছে তার ঠিক নেই।

তারপর যেখানে একটু কোণ, যেখানে একটু বাতাস, যেখানে একটু রোদের তেজ কম, যেখানে যার অভ্যাস সেইখানে ঠেলেঠুলে টেনেটুনে পাশ কাটিয়ে পথ ক'রে আপনার চৌকিটি রাখতে পারলে সমস্ত দিনের মতো নিশ্চিন্ত।

দেখা যায় কোনো চৌকিহারা স্তানমুখী রমণী কাতরভাবে ইতস্ততঃ দৃষ্টিপাত করছে, কিম্বা কোনো বিপদগ্রস্ত অবলা এই চৌকি অরণ্যের মধ্যে থেকে নিজেরটি বিশ্লিষ্ট ক'রে নিয়ে অভিপ্রেত স্থানে স্থাপন করতে পারছে না—তখন পুরুষগণ নারীসহায়ত্রে চৌকিউদ্ধারকার্যে নিযুক্ত হয়ে স্মৃষ্টি ও স্মৃষ্টি শত্ববাদ অর্জন ক'রে থাকে।

তার পরে যে যার চৌকি অধিকার ক'রে বসে যাওয়া যায়। ধূম-সেবীগণ, হয় ধূম সেবন কক্ষে নয় ডেকের পশ্চাত্তাগে সমবেত হয়ে পরিতৃপ্ত মনে ধূমপান করছে। মেয়েরা অর্ধনিলীন অবস্থায় কেউ বা নভেল পড়ছে, কেউ বা শেলাই করছে; নাহে মাঝে দুই একজন যুবক কণেকের

জন্তে পাশে বসে মধুকরের মতো কানের কাছে গুন গুন করে আবার চলে যাচ্ছে।

আহার কিঞ্চিৎ পরিপাক হবামাত্র এক দলের মধ্যে ক্লয়ট্‌স্ খেলা আরম্ভ হোলো। দুই বালতি পরস্পর হতে হাত দশেক দূরে স্থাপিত হোলো। দুই জুড়ি স্বীপুরুষ বিরোধী পক্ষ অবলম্বন করে পালাক্রমে স্ব স্ব স্থান থেকে কলসীর বিড়ের মতো কতকগুলো রজ্জুক্রম বিপরীত বালতির মধ্যে ফেলবার চেষ্টা করতে লাগল। যে পক্ষ সর্বাগ্রে একুশ করতে পারবে তারই জিত। মেয়ে খেলোয়াড়েরা কখনো জম্বোচ্ছুকসে কখনো নৈরাশ্রে উর্দ্ধকণ্ঠে চীৎকার করে উঠছে। কেউবা দাঁড়িয়ে দেখছে, কেউবা গণনা করছে, কেউবা খেলায় যোগ দিচ্ছে, কেউবা আপন আপন পড়ায় কিম্বা গল্পে নিবিষ্ট।

একটার সময় আবার ঘণ্টা। আবার আহার। আচারান্তে উপরে ফিরে এসে দুইস্তর খাণ্ডের ভাৱে এবং মধ্যাহ্নের উত্তাপে আলস্য অত্যন্ত ঘনীভূত হয়ে আসে। সমুদ্র প্রশান্ত, আকাশ স্তনীল মেঘমুক্ত, অল্প অল্প বাতাস দিচ্ছে। কেদারায় হেলান দিয়ে নীরবে নভেল পড়তে পড়তে অধিকাংশ আনীল নয়ন নিদ্রাবিষ্ট। কেবল দুই একজন দাবা, ব্যাকগ্যামন কিম্বা ড্রাফ্ট খেলছে, এবং দুই একজন অশ্রান্ত অধ্যবসায়ী যুবক সমস্ত দিনই ক্লয়ট্‌স্ খেলায় নিযুক্ত। কোনো রমণী কোলের উপর কাগজ কলম নিয়ে একাগ্রমনে চিঠি লিখছে, এবং কোনো শিল্পকুশলী কৌতুকপ্রিয় যুবতী নিদ্রিত সহযাত্রীর ছবি আঁকতে চেষ্টা করছে।

ক্রমে রৌদ্রের প্রথরতা হ্রাস হয়ে এল। তাপক্লিষ্ট ক্লাস্তকায়গণ নিচে নেমে গিয়ে রুটিমাখনমিষ্টান্ন সহযোগে চা-রস পানে শরীরের জড়তা পরিহার করে পুনর্বার ডেকে উপস্থিত। পুনর্বার যুগল মূর্তির সোৎসাহ পদচারণা এবং মৃদুমন্দ তাশ্বালাপ আরম্ভ হোলো। কেবল

দুচার জন পাঠিকা উপস্থানের শেষ পরিচ্ছেদ থেকে কিছুতেই আপনাকে বিচ্ছিন্ন করতে পারছে না,—দিবাবসানের ম্লান ক্ষীণালোকে একাগ্রনিবিষ্ট দৃষ্টিতে নায়ক নায়িকার পরিণাম অহুসরণ করছে।

দক্ষিণ আকাশে তপ্ত স্বর্ণবর্ণের প্রলেপ, তরল অগ্নির মতো জলরাশির মধ্যে সূর্য্য অন্তমিত, এবং বামে সূর্য্যাস্তের কিছু পূর্বে হতেই চন্দ্রোদয়ের সূচনা। জাহাজ থেকে পূর্বদিগন্ত পর্য্যন্ত জ্যোৎস্না-রেখা যিক্‌যিক্‌ করছে।

জাহাজের ডেকের উপরে এবং কক্ষে কক্ষে বিদ্যাদীপ জলে উঠল। ছটার সময় বাজল ডিনরের প্রথম ঘণ্টা। বেশ পরিবর্তন উপলক্ষে সকলে স্ব স্ব কক্ষে প্রবেশ করলে। আধঘণ্টা পরে দ্বিতীয় ঘণ্টা। ভোজনগৃহে প্রবেশ করা গেল। সারিসারি নরনারী বসে গেছে। কারো বা কালো কাপড়, কারো রঙীন কাপড়, কারো বা শুভ্রবক্ষ অর্ধ-অনাবৃত। মাথার উপরে শ্রেণীবদ্ধ বিদ্যুৎ-আলোক। গুন্‌গুন্‌ আলাপের সঙ্গে কাঁটাচামচের টুং টাং ঠুং ঠাং শব্দ মুখরিত, এবং বিচিত্র খাওয়ার পর্য্যায় পরিচারকদের হাতে হাতে নিঃশব্দ স্রোতের মতো যাতায়াত করছে।

আহারের পর ডেকে গিয়ে শীতল বায়ু সেবন। কোথাও বা যুবকযুবতী অঙ্ককার কোণের মধ্যে চোকি টেনে নিয়ে গিয়ে গুন্‌গুন্‌ করছে, কোথাও বা দুজনে জাহাজের বারান্দা ধ'রে ঝুঁকে প'ড়ে রহস্তালাপে নিমগ্ন, কোনো কোনো জুড়ি গল্প করতে করতে ডেকের আলোক ও অঙ্ককারের মধ্য দিয়ে দ্রুতপদে একবার দেখা দিচ্ছে একবার অদৃশ্য হয়ে যাচ্ছে, কোথাও বা পাঁচসাত জন স্ত্রীপুরুষ এবং জাহাজের কর্মচারী জটলা ক'রে উচ্চ-হাস্তে প্রমোদকল্পে উচ্ছ্বসিত ক'রে তুলছে। অলস পুরুষরা কেউবা বসে কেউবা দাঁড়িয়ে কেউবা

অন্ধ্রশয়ান অবস্থায় চুরট টানছে, কেউবা স্মোকিং সেলুনে কেউবা নিচে খাবার ঘরে ছইস্কি-সোডা পাশে রেখে চার জনে দল বেঁধে বাজি রেখে তাস খেলছে। ওদিকে সঙ্গীতশালায় সঙ্গীতপ্রিয় দুচার জনের সমাবেশে গান বাজনা এবং মাঝে মাঝে করতালি শোনা যাচ্ছে।

ক্রমে সাড়ে দশটা বাজে,—মেয়েরা নেবে যায়,—ডেকের উপরে আলো হঠাৎ যায় নিবে,—ডেক নিঃশব্দ নির্জন অন্ধকার হয়ে আসে। চারিদিকে নিশীথের নিস্তরুতা, চন্দ্রালোক এবং অনন্ত সমুদ্রের অশ্রান্ত কলধ্বনি।

২৭ অক্টোবর। লোহিত সমুদ্রের গরম ক্রমেই বেড়ে উঠছে। ডেকের উপর মেয়েরা সমস্ত দিন তুষাতুরা হরিণীর মতো ক্লিষ্ট কাতর। তারা কেবল অতি ক্লাস্তভাবে পাখা নাড়ছে, স্মেলিং সন্ট শ্ব'কছে, এবং সক্রমণ যুবকেবা যখন পাশে এসে কুশল জিজ্ঞাসা করছে তখন নিমীলিত-প্রায় নেত্রপন্নব ঈষৎ উন্মীলন ক'রে স্নানহাস্তে কেবল গ্রীবাভঙ্গী দ্বারা আপন সুকুমার দেহলতার একান্ত অবসন্নতা ইঙ্গিতে জানাচ্ছে। যতই পরিপূর্ণ ক'রে টিফিন্ এবং লেবুর সরবৎ খাচ্ছে, ততই জড়ত্ব এবং ক্লাস্তি বাড়ছে, নেত্র নিদ্রানত ও সর্বশরীর শিথিল হয়ে আসছে।

২৮ অক্টোবর। আজ এডেনে পৌঁছন গেল।

২৯ অক্টোবর। আমাদের জাহাজে একটি পার্সী সহযাত্রী আছে। তার ছুঁচোলো ছাঁটা দাঁড়ি এবং বড়ো বড়ো চোখ সর্বপ্রথমই চোখে পড়ে। অল্প বয়স। নয় মাস যুরোপে বেড়িয়ে বিলিতি পোষাক এবং চালচলন ধরেছে। বলে, ইণ্ডিয়া লাইক্ করে না। বলে, তার যুরোপীয় বন্ধুদের (অধিকাংশই স্ত্রীবন্ধু) কাছ থেকে তিনশো চিঠি এসে তার কাছে জমেছে, তাই নিয়ে বেচারী মহা মুঞ্চিলে পড়েছে, কখনই বা পড়বে কখনই বা জবাব দেবে। লোকটা আবার নিজে বন্ধুত্ব করতে বড়োই

নারাজ, কিন্তু বিধাতার বিড়ম্বনায় বজ্রত্ব তার মাথার উপরে অনাক্রম্য অঘাচিত বর্ষিত হোতে থাকে। সে বলে বজ্রত্ব ক'রে কোনো "ফন্" নেই। উপরন্তু কেবল ল্যাঠা। এমন কি শত শত জর্ন্মাণ করাসী ইটালিয়ান এবং ইংরেজ মেয়ের সঙ্গে সে "ফ্লর্ট" ক'রে এসেছে কিন্তু তাতে কোনো মজা পায়নি।

২ নবেম্বর। ভারতবর্ষের কাছাকাছি আসা গেছে। কাল বোম্বাই পৌঁছবার কথা।

আজ সুন্দর সকালবেলা। ঠাণ্ডা বাতাস বইছে—সমুদ্র সফেন তরঙ্গ নৃত্য করছে, উজ্জ্বল রৌদ্র উঠেছে; কেউ ক্লমটস্ খেলছে, কেউ নবল পড়ছে, কেউ গল্প করছে; মুজিক সেলুনে গান শোঁকিং সেলুনে তাস ডাইনিং সেলুনে খানার আয়োজন হচ্ছে, এবং একটি সঙ্কীর্ণ ক্যাবিনের মধ্যে আমাদের একটি বৃদ্ধ সহযাত্রী মরছে।

সন্ধ্যা আটটার সময় ডিলন্ সাহেবের মৃত্যু হোলো। আজ সন্ধ্যার সময় একটি নাটক অভিনয় হবার কথা ছিল।

৩ নবেম্বর। সকালে অস্ব্যস্তি অনুষ্ঠানের পর ডিলনের মৃতদেহ সমুদ্রে নিক্ষেপ করা হোলো। আজ আমাদের সমুদ্রযাত্রার শেষ দিন।

অনেক রাত্রে জাহাজ বোম্বাই বন্দরে পৌঁছল।

৪ নবেম্বর। জাহাজ ত্যাগ ক'রে ভারতবর্ষে নেমে এখন আমার অদৃষ্টের সঙ্গে আর কোনো মনাস্তর নেই। সংসারটা মোটের উপরে বেশ আনন্দের স্থান বোধ হচ্ছে। কেবল একটা গোল বেধেছিল—টাকাকড়ি সমেত আমার ব্যাগটি জাহাজের ক্যাবিনে ফেলে এসেছিলুম, তাতে ক'রে সংসারের আবহাওয়ার হঠাৎ অনেকটা পরিবর্তন হয়ে গিয়েছিল। কিন্তু হোটেল থেকে অবিলম্বে জাহাজে ফিরে গিয়ে সেটি সংগ্রহ ক'রে এনেছি। এই ব্যাগ ভুলে যাবার সম্ভাবনা কাল চকিতের মতো একবার

মনে উদয় হয়েছিল। মনকে তখনি সাবধান ক'রে দিলুম ব্যাগটি যেন না ভোলা হয়। মন বললে, স্কেপেছ! আজ সকালে তাকে বুথা ভৎসনা করেছি। নষ্টোদ্ধার ক'রে ছোট্টেলে ফিরে এসে মনের পর আরাম বোধ হচ্ছে। এই ঘটনা নিয়ে আমার বুদ্ধিবৃত্তির প্রতি কটাক্ষপাত করবেন সৌভাগ্যক্রমে এমন প্রিয়বন্ধু কেউ উপস্থিত নেই। স্ততরাং রাত্রে যখন কলিকাতামুখী গাড়িতে চড়ে বসা গেল, তখন যদিও আমার বালিশটা প্রমক্রমে ছোট্টেলে ফেলে এসেছিলুম তবু স্তখনিত্রার বিশেষ ব্যাঘাত হয়নি।

৮ আশ্বিন, ১৩০০
